

**NATIONAL ASSEMBLY OF  
SEYCHELLES**

*Wednesday 26th October, 2022*

*The Assembly met at 9am*

*National Anthem*

*Moment of Reflection*

*Mr Deputy Speaker in the Chair*

**MR DEPUTY SPEAKER**

Bonzour tou Manm Lasanble Nasyonal. Tou bann *staff* Lasanble, piblik ki pe ekout nou ozordi bomaten.

Byenveni pou nou sesyon travay pou ozordi. E ozordi nou travay pou dominan par Mosyon e nou premye Mosyon i prezante par Manm *LDS* Onorab Rosie Bistoquet. Mon ti ava envit ou pou prezante, en Manm ava segonde, apre ou ava fer ou lentervansyon. Mersi.

**HON ROSIE BISTOQUET**

Mersi Mr Speaker. Bonzour Mr Speaker. Bonzour tou manm Lasanble e tou dimoun ki pe ekoute. Mr Speaker mon Mosyon i lir koumsa: -

Lasanble i demande ki Gouvernman, atraver Minister Lasante, i revwar son Polisi e

met an plas en kad legal anver akse ek bann metod kontraseptiv, e lezot servis lasante reproduktiv pou bann zenn anba 18an, ki aktiv seksyelman avek bi:

- a) Redwir lansentman anba laz, e osi
- b) Redwir bann risk lenfeksyon e lezot maladi asosye avek sistenm reproduktiv. Mersi.

**MR DEPUTY SPEAKER**

Mersi Onorab. Onorab Aglae.

**HON EGBERT AGLAE**

Bonzour Mr Speaker e tou Manm Onorab. Mr Speaker mon segonn Mosyon.

**MR DEPUTY SPEAKER**

Mersi. Donk Mosyon in ganny segonde. Alor mon ti ava envit *mover* pou fer son entervansyon.

**HON ROSIE BISTOQUET**

Mersi Mr Speaker. Mr Speaker sa i dezyenm Mosyon ki Komite Lasanble pou maladi transmisib *HIV/SIDA* ek lasante reproduktiv i table pou sa lannen.

Dapre *UNFPA* sa Lazans Nasyon-z-Ini pou lasante reproduktiv, i dir ki lasante reproduktiv i en leta konplet,

fizik, mantal, byennet sosyal, dan tou zafer relye avek sistenm lasante reproduktiv. Sa i enplik tou dimoun ki kapab annan en lavi seksyel ki san danze e satisfezan, e an menm tan i annan kapabilite pou reprodwir. E osi i annan sa liberte pou li decide si, kan, ki manner en dimoun i zer son lavi seksyel.

Pou asire ki dimoun i mentenir son relasyon lasante reproduktiv, fodre tou imen i ganny akse avek lenformasyon egzakt san danze, komodite efektif, afordab, metod kontraseptiv akseptab ki baze lo swa sak endividi.

Sak endividi fodre i ganny byen enformen, annan kapasite pou protez son lekor kont maladi transmet par sex. E dapre UNFPA sak endividi i annan son drwa pou li fer son prop swa lo son lasante reproduktiv, pou asire ki i annan akse iniversel pou lasante reproduktiv e lasante zeneral e sa drwa i enkli *family planning*.

Fer sex boner parmi bann zenn fiy son rezilta i en lansentman anba laz; maladi transmet par sex e nou tou nou konnen ki en lansentman anba laz i anmenn lefe advers i enpakte toultan, sirtou kot i konsern kontinyasyon son ledikasyon, son lasante an

zeneral e osi risk letan i ganny son baba.

De milyon bann zenn fiy i ganny forse pou antre dan en relasyon seksyel ou maryaz, ki met zot an risk pou ansent avek lansentman non dezire, aborsyon ki pa legal, maladi transmet par sex enkli *HIV*. Sa bann zenn fiy i trouv zot pe donn nesans zot baba lo en kondisyon tre danzere. Annou pa bliy nou bann zenn avek dezabilite, e nou konnen ki zot osi zot ganny abize seksyelman.

Ankor dapre UNFPA, tro bokou zenn i fer fas avek baryer pou ganny lenformasyon lasante reproduktiv ek swen e zot drwa pou ganny akse avek servis. Sa i tre esansyel pou protez zot lasante. In ganny estimen ki bann zenn fiy 15an i tre a risk pou mor letan zot ganny baba.

Mr Speaker Sesel avek larestan pei ki Manm Nasyon-z-Ini, in siny plizyer Konvansyon sirtou Trete e adapte gran laliny stratezi enternasyonal e rezyonnal, ki'n ganny asiste pou promot, protez, tret, *rehabilitate* lasante reproduktiv dan Sesel. Tel parey sa bann konvansyon swivan:

*United Nation International Conventions of the Rights of the Child -1989.*

*United Nations International Conference on Populations and Development 1994.*

*United Nations 4<sup>th</sup> World Conference on Women - 1985.*

*United Nations World Program for the Youth - 2000.*

*Convention on the Elimination of all forms of Discrimination against Women - 1992.*

*The Maputo Plan of Action - 2006.*

*The SADC Protocol on Gender Development - 2008.*

*Mahe Declaration in Seychelles 2011*

ki ti promote akse lenformasyon ek drwa servis lasante reprodiktiv par tou pei SADC.

*SADC Model Law To End Child Marriage - 2019.*

Konstitisyon Sesel Mr Speaker sapit 42 i annan en lalis 8, lartik: Sapit 3 parti 1 ki form parti Konstitisyon Seselwa, kot i donn Seselwa Drwa Fondamantal pou Drwa Imen e liberte relye avek lasante reprodiktiv ek drwa. Isi Sesel menm si nou en pei ki annan en pti popilasyon avek selman 98mil 347 zabitan, nou to fertilité i 1.1 ki reprezant ranplasman nivo fertilité.

Savedir isi Sesel en fanmir i kapab fer ziska 2 zanfan par fanmir. Lekspektasyon lavi 73.7

pou tou lede sex, me pou zonn i 71.3 e fanm i 79.7. Avek COVID lekspektasyon lavi in desann par 3an 8mwan. To mortalite ou lanmor zanfan anba 5an ti 11.4 pou sak 10mil pti baba ki ne vivan.

Mr Speaker dan en letid ki ti fer, Gouvernman Sesel i reste komet pou asire ki lasante maternel redwir mantalite parmi bann zenn i tre primordyal. Sesel in met, e in partisip dan devlopman stratezi rezyonnal pou lasante seksyel ek reprodiktiv e bann Drwa, ki ti fer pou SADC. Sa stratezi i ti ganny devlope an 2019 i pou ale ziska 2023.

Partisipasyon Sesel koman en Manm SADC, in ede pou Sesel devlop diferan stratezi Nasyonal. Parmi premye ti ganny devlope i en Polisi en *National Policy and Reproductive Health Policy 2015*.

Bi sa Polisi se pou asir bon kordinasyon enterogasyon e livrezyon konpreansiv dan servis prevansyon, tretman, rehabilitasyon e sipor pou tou servis lasante reprodiktiv dan Sesel, pou asir en bon lasante nou popilasyon.

Dezyenm, ti en Polisi tre spesifik apele *Adolescent Sexual Reproductive Health Policy 2015*. Premye Polisi pou Sesel ti

konsantre lo lasante reprodiktiv parmi bann zenn, pou adres zot konsern avek partisipasyon total bann zenn fiy avek bann zenn garson. Malgre tou sa devlopman ki Gouvernman in met an plas pou adres lasante reprodiktiv i annan defi pou adrese, pou asire ki tou zenn i ganny akse avek servis. Sa bann defi i ganny detekte dan diferan resers ki'n ganny fer e konklizyon sa bann resers i fon levidans pou amelyor servis lasante reprodiktiv e drwa bann zenn.

Mr Speaker en letid ti ganny fer an 2008 apele *Child Wellbeing Study*. Ladan nou ti trouve ki 46poursan garson e fiy aze ant 12 a 19an ti koman fer sex a laz 14an. E la lamazorite zot pa ti pe servi proteksyon. Dan en lot letid *HIV apele HIV/AIDS knowledge Attitude Practice and Behavioral (KAPB Study, 2012)*, rezilta ti montre ki 9.8 dimoun ti fer sex avan 15an. 0.6 zenn aze 15 a 24an ti *HIV positive*.

Nesans: annou get en kou nou bann nesans isi Sesel. Dapre statistik anyel pou lannen 2020-2021 par Lasante pibliye par *National Bureau of Statistics*, ti annan 1665 nesans sa ti konpare avek 1554 an 2020. Pou lannen 2020 ti annan 4 zenn fiy anba 15an, ki

ti osi donn nesans pou lannen 2021 e sa nonm i preski parey.

An tou ti annan 207 zenn manman aze 15 a 19an ki reprezant 12.4poursan dan sa total pou menm lannen ki ti ansent. An 2020 19 zenn fiy ant 15 a 19an i ti donn nesans dezyenm baba enn parmi ti donn nesans son trwazyenm baba.

Mr Speaker sa *trend* in toultan la pareyman pou bann zenn fiy ki ti donn nesans zot trwazyenm baba. An 2017 ti annan 10 zenn fiy ki ti donn nesans zot trwazyenm baba. An 2018, 9 e an 2019 ti annan 10. Nou pou get en pti moman prezan akse avek danze aborsyon.

Mr Speaker avortman i en topik ki laplipar imen pa oule koz lo la, akoz i ankor en topik ki tre *taboo* e akoz i konsern seksyalite. Me nou tou nou devret konsernen avek sa topik. Dapre *Center for Disease Control and Prevention – (CDC)* en Lorganizasyon Mondyal pou lasante *UNFPA* i defini aborsyon koman terminasyon en lansentman avan 20 semenn ziska zestasyon.

Isi Sesel aborsyon i legal, me i restrikte. Sa i dernyen opsyon - mon repete dernyen opsyon Mr Speaker, pou en manman termin son

lansentman, me fodre i ganny akse avek lasante reproduktiv. Parey mon dir avortman i ilegal, me i restrikte, parey tou pei dan leta SADC eksepte Sidafrik kot napa restriksyon, isi Sesel Minister Lasante i responsab pou donn sa servis.

Tou prosedir i ganny fer atraver en *Board* Medikal, baze lo kriter anba en Lalwa. Sa Lalwa i *Chapter 236* i apel *Termination of Pregnancy Act* i an Zen 1994 ki ti ganny konsolide le 30 Zen 2012. I annan 3 kriter ki *Board* i ganny gide pou determinen si sa manman i merit fer aborsyon e sa i *comme swivan*; -

Si kondisyon sa lansentman i pou poz ris ou blesir fizik ou mantal lasante sa manman;

Si i annan risk sibstansyel ki sa baba i ne e menm soufer avek dezabilite serye ki kapab rann li andikape ouswa annan gran dezabilite e lot fodre sa lansentman i pli ba ki 12 semenn zestasyon.

Mr Speaker menm si Sesel i annan en kad byen striktire pou lavortman, levidans i montre ki la kantite aborsyon i tro bokou pou la kantite popilasyon e la kantite nesans par lannen. Les mwan eksplike Mr Speaker. Mon a donn sif po

sa dernyen 5an lo la kantite aborsyon pibliye par *NSB*.

An 2017 ti annan 541 aborsyon,

An 2018 ti annan 473,  
2019 - 431,  
2020 - 204,

An 2021 ti annan 406.

*Sorry* an 2020 ti annan 504 *sorry*. Pli o sif an 2011 kot ti annan 579 aborsyon. Total aborsyon pandan sa dernyen 5an i 2335. Si nou pran transdaz 10 a 14 an ti annan 33, 15 a 19an - 340 aborsyon pou dernyen 5an. Laz ki ti annan plis aborsyon ti laz 25 a 29an ki ti 506 aborsyon.

Mr Speaker, Sesel i annan en popilasyon ki pe vyeyi. Nou to fetilite parey mon e dir taler i 2.1, savedir 2 zanfan par fanmir. Nou to nesans pou lannen i ant 1500 a 1600 par lannen. Si nou get la kantite aborsyon par lannen 400 a 500, sa i zis sa bann ki'n admet lopital, pa bann ki ilegal ki nou pa konnen.

Si par egzanp ti napa sa 500 ouswa sa 400 aborsyon par lannen, nou pran apepre 375 ladan ki vin apepre 75poursan, akoz larestan nou pa kapab i annan aborsyon ki inevitab, met avek sa 1600 nesans Sesel ti pou akeyir omwen 2000 nesans par lannen.

Eski sa pa ti pou ede pou ogmant nou popilasyon Sesel? Sirtou ki dan sa total aborsyon an mwayenn aborsyon parmi bann zenn, i 25poursan lo ka kantite nesans ki'n ganny anrezistre pou lannen 2021.

Mr Speaker zenn fiy ek garson i ganny serten difikilte pou ganny akse avek servis lasante reprodiktiv baze lo zot laz, zot ankor miner. Menm si parmi zot ki seksyelman aktiv. I annan en Lalwa ki apel *Majority Act* 1980 i dir ki miner i en dimoun tou lede *sex*, ki pa ankor ariv laz 18an.

Kod Penal Seksyon 130 (3), (b), (1) i site: - “okenn dimoun ki komet en *Act* endesan kont en lot dimoun ki anba laz, laz 15an, i koupab pou en lofans e i kapab ganny kondannen prizon pou 20an. E i re dir ankor leksplikasyon ki laz pou konsantman i 15an menm si laz mazoriter i 18an”.

Mr Speaker pou soulaz bann zenn pou akse servis Polisi Lasante Reprodiktiv pou adolesan in fer provizyon pou en protokol, ouswa en gidans pou bann zenn 15 a 17an e pou zot kapab ganny akse avek servis. Me zot ganny ankouraze pou diskite zot problem seksyel e ganny konsantman avek zot paran, pou zot kapab ganny servis lasante apropiye.

Sa dan li menm Mr Speaker, i dekouraz bann zenn po vin devan pou ganny servis lasante reprodiktiv. Si nou zenn ti pe ganny akse avek servis lasante reprodiktiv, i ti pou annan tre pe ki ti pou tonm ansent anba laz e osi tre pe ki ti pou fer aborsyon.

Laplipar zenn, zenn manman anba 17an ki seksyelman aktiv, i ganny difikilte pou akse avek servis. Zot pa ganny akse avek lenformasyon konkret ou menm kontraseptiv, *condom*, akoz zot pa ganny akse avek klinik *Family Planning*. Pou protez zot kont lansentman non dezirab ou maladi transmet par *sex*.

Laplipar sa ban zenn zot paran swa zot pa konnen si zot zenn fiy i seksyelman aktiv ou zenn garson, ouswa zot refize pou donn zot konsantman pou pran kontraseptiv, ou pou fer tes *HIV*. Vi ki zot vilnerab zot osi ganny abize seksyelman.

Zot osi dan labi drog, labi lalkol, zot pas dan bann sityasyon vyolan. I annan parmi sa bann zenn ki doue akademikman, me zot vizyon i ganny brize akoz lansentman anba laz, menm si i annan sa *Return to School Policy*. Me sa zenn i war li tousel pou okip son baba e parfwa i ganny viktimize.

Lansentman anba laz i osi anmenn en kantite konplikasyon lasante tel ki; aborsyon ilegal, bann baba ki ne avan ler, lannemi ek lanpsya ouswa bann bebelouka, ou koma ki pas zis dan lansentman e i tre fatal; tansyon, sennyman ler baba pe ne, kondisyon lasante i sever.

Mazinen avek konsonmasyon drog ki nou zenn manman pe konsonmen, nou trouv en baba ouswa bann baba ki ne avek drog dan zot pti lekor. I annan bann zenn manman anba laz ki'n ansent swa avek zot premye ou plizyer baba, zot al konsilte me si zot pou al fer *cesarean* ou avortman ou okenn entervansyon zot bezwen konsantman zot paran.

Sa bann zenn manman miner zot ganny difikilte pa zis lo sitasyon lasante, me osi difikilte finansyel ek sosyal pou sonny zot zanfan, si zot pa ganny siporte avek zot paran ou servis sosyal. Parfwa zot paran i met zot deor e zot war zot san en twa lo zot latet e san en travay. Mr Speaker sa i koz lo-nou annan en *Act* ouswa en *Lalwa* ki koz lo la *Employment Act 1990 - Act 9 of 1990 Conditions of Employment Regulations 1991* i dir: -

*“A person shall not have in the person’s employment minimum another or of less than 15 years of age. A person shall not employ another under the age of prohibited 18 years in a hotel, guest house, boarding house, any employed place where tourist are accommodated, restaurant, shop ... or bar, night club, dance hall, discotheque and similar places young people or entertainment or on a ship or aircraft.”* I annan restriksyon kote ki en zenn i kapab travay e i kler avek permisyon son Zofisye responsab.

Mr Speaker lalis i long si mon kontinyen.

Me pou Sesel bouz pli devan, zenn fiy ek zenn garson avek lasosyete, zot bezwen mazin zot fitir. Sa bann sityasyon i bezwen ganny adrese pou annan en popilasyon ki an bonn sante e vin en sitwayen reproduktiv.

Okenn Nasyon ki anvi adres krwasans rapid popilasyon ti e kritik pou rekonnnet lenportans lasante reproduktiv e konsern zenn, pou merit lansentman anba laz ou lansentman non dezirab. Adisyonnelman lansentman anba laz i osi anmenn lefe advers dan zot ledikasyon, zot

lasante, lefe lo rezilta nesans manman avek baba.

Alors Mr Speaker se pour sela ki sa Mosyon pe ganny demande ki Gouvernman atraver Minister Lasante, i revwar son Polisi e met an plas en kad legal, anver akse avek bann metod kontraseptiv e lezot servis reproduktiv pou bann zenn anba 18an ki seksyelman aktiv.

Avek sa Mr Speaker mon po demann tou bann menm fer en deba tre ris e pou siport sa Mosyon. Mersi.

### **MR DEPUTY SPEAKER**

Mersi Onorab Bistoquet. Onorab Aglae ou ti segonde e mon prezimen oule entervenir. E mon ti ava kontan ki ban man ki zot p entervenir zot en dike alor ki nou kapab fer lalis pou balans letan. Mersi. Letan Onorab Aglae pe entervenir zot kapab endike lekel ki pou koze silvouple.

### **HON EGBERT AGLAE**

Mersi Mr Speaker bonzour tou man Onorab e tou dimoun a lekout e osi spesyalman bann, si i annan nou bann adolesan osi ki pe swiv en pti gin deba ki pou annan ozordi lo sa Mosyon.

Mr Speaker loter Mosyon in fer zistis kot in kapab elabor en pti pe pli profon bann fe

atase ek sa Mosyon, e osi bokou statistik in ganny met devan.

E pou tou manm piblik ki a lekout osi, lo sit Minister Lasante si zot bezwen bann lenformasyon ekstra, zot kapab al lo sit e zot kapab ganny en pe sirtou atraver bann rapor kot i konsern lasante reproduktiv, ki Sesel i bezwen pibliye avek bann lorganizasyon enternasyonal baze lo bann legzisans komitman ki nou annan.

Mr Speaker avan mon komanse osi, mon oule siport e felisit Komite Lasante ki ti la dan Sizyenm Lasanble Komite *HIV/AIDS (SRHR)* ki'n la loter par deryer kreasyon e i pou a kapab anmenn sa Mosyon ozordi devan nou Lasanble swivan lot Mosyon ki ti ganny pase semenn pase.

E mon krwar ki travay ki nou annan devan nou i en travay ki pe aport fri e nou pe ganny rekonnèt sirtou lo nivo *SADC* koman en Parlman ki aktiv kot i konsern bann deba, bann Lezislasyon e osi bann Polisi. E osi kot nou zwenn avek bann lezot *partners* ek *stakeholders*, ki relye sirtou avek Minister Lasante, bann *NGOs* pou nou kapab donn zot sipor dan nou travay kont lalit sirtou *HIV/AIDS*.



E osi bann proteksyon pou nou bann zenn adolesan bann zenn ki pe aktiv dan lasante reprodiktiv. E osi nou osi mazin nou bann paran ki annan osi bann zenn fiy e menm ozordi nou bezwen en dizenn garson ki war zot parfwa en pti pe difisil pou zot kapab ouver en bon kominikasyon, e osi koz lo size ki nou pe debat lo la ozordi pour ki nou kapab kit nou bann zenn lo bon semen.

E Mr Speaker ti annan 2 size enportan ki Mosyon i anvi adrese ozordi. E avan ki mon tous sa 2 size, pou Mosyon ariv isi, ti annan 2 pwen enportan ki nou ti pe konsidere enn se ki manner nou kapab retir bann baryer legal.

Sa i osi bann Polisi pou fer ki akse avek bann tretman relye avek lasante reprodiktiv, i vin dan en fason pli eze. E osi i tous sa kous popilasyon ki dan sa group ki nou konsider zot pli aktiv. E osi permet ki i ava annan en fason - en proteksyon pou bann ki a risk, me ki zot osi zot pa kapab baze lo regilasyon ki egziste ozordi – Polisi, zot pa neserman kapab *freely* ganny akse avek bann servis lasante reprodiktiv.

E dezyenm osi se, ki manner nou kapab ankouraz ouswa vwar fason ki bann Minister sirtou Minister

Lasante - e la nou pe koz osi Minister Ledikasyon avek bann *stakeholders* pou kapab anmenn bann servis adekwa, ki sa i ava enkli osi bann prosedir, ouswa parey nou apel li bann *counselling* ki enportan ki kapab al ver nou bann zenn ki pe pas dan bann serten sityasyon ouswa *the key population* parey nou dir.

E Mr Speaker, se sa ki ozordi nou'n ariv lo sa pwen ozordi pou nou kapab soumet Mosyon. Mr Speaker Lorganizasyon Mondyal pou Lasante i definir adolesan koman okenn endividi ant 10an a 19an e i osi met lenportans lo zot Drwa Lasante Seksyel e Reprodiktiv pou fer sir ki tel drwa i ganny respekte.

Dan son Polisi Nasyonal lo Lasante Seksyel e Reprodiktiv ki ti ganny fer an 2015, Gouvernman atraver Minister Lasante in entegre en konponan lasante seksyel e reprodiktiv pou bann adolesan e dan sa tel Polisi. Pou fer sa servis vin pli targete, an 2018 Gouvernman atraver Minister Lasante e osi devlop en Polisi spesifikman lo lasante seksyel e reprodiktiv pou adolesan.

Sa ti ganny fer akoz levidans ki ti egziste. Ti konfirmen ki nou bezwen pou en lasante reprodiktiv sa bann

adolesan, pa pe neserman ganny byen adrese dan bann servis ki deza egziste. E en tel levidans in konfirman bann endikater lasante e zefor pou adres sa bann problem pou sa group popilasyon pe rankontre e pour nou sa ti tre, tre enportan.

E Mr Speaker, letan nou pe regard sityasyon aktyel Sesel i annan sa ki nou apel konportman e konportman ki kontribye sirtou pou transmet bann maladi e lezot maladi ki ganny transmet par sex e si nou pe koz lo bann lansentman anba laz i sa bann adolesan i pas atraver.

En letid pou *HIV* ti ganny fer an 2012 pou rod lenformasyon lo *HIV Knowledge Attitude Practice and Biological*, sa ki nou term li koman *cap (d)* ti demontre ki 9.8poursan zenn adolesan in fer sex pou premye fwa avan zot ti'n menm ganny 15an e zot pa'n zanmen ganny akse ek okenn metod kontraseptiv.

E en *global School Survey* ki ti ganny fer an 2013 ti osi endike ki 40poursan bann etidyan anba 18an in deza annan relasyon seksyel dan zot lavi. E ladan 50poursan in deza servi kapot. Mr Speaker si nou pou koz lo lansentman anba

laz, e sa mon pe koz lo sa group ki mon pe konsider adolesan.

Statistik i montre ki lansentman anba laz i kontinyen arive tou le-z-an e pour sa dernyen 5an Minister Lasante in rikord ant 289 a 307 ka par lannen. E pou 2021 dan en popilasyon 5936 zenn fiy aze ant 12 a 19an e ladan 279 adolesan ki tonm dan sa kad laz 12 a 19an ti tonm ansent.

54 ladan ti fer aborsyon e ladan 13poursan i parmi zenn fiy ki ti ankor pe lekol sa i vedir dan zot lekol segonder e pos-segonder.

*Now* Mr Speaker letan nou pe koz lo lasante reproduktiv i annan aborsyon osi ki ganny met an kestyon. E nou tou nou konnen poudir en topik aborsyon i en size ki vreman delika, baze lo nou sityasyon koman en pei Sesel ki annan diversite lopinyon kot i konsern larelizyon ouswa bann diferan *belief*.

E nou vwar poudir bokou pei sirtou lo Kontinan Lanmerik, in annan plizyer demars e osi plizyer *boycott* ki'n ganny touse lo size aborsyon. E se sa ki mwan mon krwar poudir atraver sa Mosyon osi, i annan en size moral atase avek e sakenn de nou i kapab get sa bann size dan zot fason pou zot, e pa pe neserman osi i annan ki pou agree lo metod.

Me pou nou sa ki enportan se ki i annan en labaz lapros syantifik ki bezwen antase avek bann desizyon ki pei i ganny fer. E letan mon pe koz lo aborsyon, sa se pou bann zenn fiy ki anba 18an, i osi i ankor pe ganny kontinyen pratike e Minister Lasante pou sa kategori group ki pe raport ant 54 a 93 ka pandan sa dernyen 5an. An 2021 ti annan 54 ka konpare 77 ka ki ti an 2020 e 70 ka ki ti an 2019.

Wi, i pe demontre ki an 2021 i annan en pti rediksyon, me aborsyon parmi nou bann zenn fiy i reste ankor pe arive. E dan sa 54 aborsyon parmi bann zenn fiy ki ti ganny raporte an 2021, 5 ladan ti aze 10 a 14an e 49 ladan ti aze ant 15 a 19an. E pou mwan sa bann statistik ki petet pou serten i pa paret en gro problem, me an realite i en pwen konsern ki la.

E pour mwan Mr Speaker statistik Minister Lasante ki li i annan, i pa vedir ki sa i sa statistik total kot i konsern lavortman anba laz. Akoz ozordi i annan sa ki nou apel bann *illegal abortion* e ki nou term ki koman bann *backstreet abortion*, ki li i pa ganny deklare sof si i annan konplikasyon e sa zenn i bezwen raport pou swen medikal dan en klinik ouswa dan okenn lopital.

E la Dokter i ava sispekte - e mon dir sispekte me nou pa pou kapab prouve si in annan en *attempt* pou *abortion*. Now Mr Speaker akoz ki mwan mon santi ki poudir sipor pou sa Mosyon i enportan? Sa Mosyon pou Gouvernman revwar Polisi e met an plas bann kad legal anver akse ek metod kontraseptiv e lezot servis lasante reproduktiv, pou nou bann zenn anba 18an.

Se akoz i pa pou zis ede redwir lansentman anba laz, ouswa redwir risk lenfeksyon ek lezot maladi asosye avek nou sistenm reproduktiv. Me akoz i enportan ki dan devlopman e adopsyon en tel Polisi, pou osi demonte nou komitman Gouvernman pou onor son bann langazman;- e lobligasyon enternasyonal e global ki'n ganny *set* sirtou par Nasyon-z-Ini *WHO*, *UNAIDS* e osi koman bann reprezantan dan bann pei *SADC*, kot nou bezwen swiv osi nou bann *model law*.

E osi kot i annan bann Konvansyon Enternasyonal kot i konsern drwa zanfan sirtou Konvansyon 1898, Konferans Enternasyonal lo popilasyon e devlopman ki ti ganny fer an 1994. E osi program mondyal lemonn pou zenn dan lannen 2000 zis pou nonm enn de i bann ki Sesel in partisip ladan,

e ki Sesel in adopte e nou bezwen swiv en pe sa bann norm.

E dezyenm pwen se ki i pou ede osi ede ouswa anmenn en form pledwari dan devlopman program e aksyon, pou fer sir ki lasante reproduktiv i ganny entegre dan lezot dokiman relye avek nou sosyoekonomik devlopman pei. E pour fer ki i a vin koman en priyorite lo langazman azanda nasyonal letan nou pe mazin travay kot bann Bidze, kot i konsern Minister Lasante li menm e devlopman pei.

Trwazyenmman, i pou ede pou retir en pe bann Lalwa e Polisi diskriminatwar, pou fer sir ki okenn lentervansyon lasante ki ganny fer i fer e en refleksyon total i ganny dir, ki baze lo nou Konstitisyon osi ki nou bezwen sofgarde. E i ava ganny anmennen lo en nivo kot i konsern dwa e lasante reproduktiv i anliny avek larealite, sirtou pou sa group ki li ki a en tre zenn-az i pe war li pe pratik bann aktivite seksyel.

E dernyen pwen, i pou ede osi kre bann relasyon stratezi avek kominote, pou asire ki oi annan komitman lo zot par pou kontribye atraver en servis lasante reproduktiv ki reste soutenab e rezilyan.

Mr Speaker dan sa Mosyon, mon bezwen osi fer zistis larealite ki pei pe fer fas avek e sa monn global kot nou bann zenn adolesan pe viv ladan ki ranpli avek bann diferan - E la ler mon pe dir diferan, i bann from tantasyon swa fason nimerik swa atraver nou bann prop zot bann prop pyez zot bann dalon.

E i annan en nivo responsabilite ki bezwen ganny partaze atraver. E letan mon pe koz responsabilite Mr Speaker, i osi pou atas en konotasyon valer moral, ki enportan koman mwan koman en paran. E nou koman bann Manm Parlman ki pou diskite e debat, e osi kapab a lavenir anmenn bann Prozedlwa pou kapab ed en partner kle - sa i Minister Lasante, ki mon santi zot bezwen nou sipor, pou kapab anmenn en armonizasyon kot i konsern Polisi, regilasyon ouswa bann Prozedlwa.

E letan Mr Speaker mon pou koz responsabilite, valer moral, e la mon pe koz pou sa an kad adolesan ki pe tonm dan sa kategori 10an a 19an. Pou zot konn zot priyorite ozordi, sirtou ler ou dan lekol, ou priyorite se pour ou ledikasyon.

Me dan lot kote mon konpran poudir lasyans sa i nou lekor nou devlopman

biolojik i fer ki zenn ozordi i devlop pli vitman. E i normal ki zot annan bann sansasyon seksyel a en tre zenn-az, me osi zot pou bezwen mazine ki zot bezwen annan en serten kontrol pou fer ki zot pa briz zot lavenir a en tre zenn-az.

E osi i enportan pas en mesaz avek nou bann paran ozordi, ki'n pas atraver bann tel sityasyon kot i annan enn son fiy ki'n ansent dan lekol. E ozordi mon fyer ki nou Polisi kot i konsern lansentman dan lekol, ki oparavan ki en parti pe mon kapab dir diskriminatwar dan en sans - ouswa en pti pe diktatir kot si ou ansent dan lekol *expression* i vedir ou ganny met deor - *imminent*.

E ozordi i annan posibilite pou ou kapab retournen kontiny ou letid. E bokou pei dan la rezyon sirtou Sidafrik i travay lo bann Prozedlwa ki'n ganny fer ki i annan fason fer e ou ganny sipor. Me sa i pa neserman dir ki ou bezwen al met ou lekor dan en lansentman. E osi nou bezwen koz avek bann zenn garson. En fiy pa ansent li tousel i bezwen annan en mal ek en femel, ki zwenn ansanm pou fer serten aktivite.

E osi zot bezwen annan en responsabilite e se la kot Mosyon nou, nou pe debat pou

annan en akse avek bann tretman, bann servis ki egziste pou zot pran zot responsabilite, letan zot tonm dan sa dezir ouswa dan sa tantasyon, ki mwan mon pa kapab anpes zot. Me selman nou bezwen konsyan poudir tou aksyon i annan en reaksyon.

E nou bezwen mazine osi ki sa zenn fiy letan ou pa ankor fini ou letid, ou pa ankor ganny en lanplwa, ou pa ankor ganny en resours dan ou lanmen, ki sa o vedir kot sa *burden* i tonbe e sa i tonm lo paran li menm.

E souvandfwa ki nou vwar e sa statistik i montre poudir sa bann lansentman anba laz, sa bann zenn fiy adolesan zot souvandfwa war zot, zot tousel e sa *partners in crime* avek li, i souvandfwa li i kontinyen viv son lavi e la tou *burden* i tonm lo paran. E sa i en realite.

E osi Mr Speaker i enportan ki ledikasyon - e la mon pe koz ek Minister Ledikasyon ki'n vin reponn kestyon dan Lasanble e sa i kestyon ki ti anmennen par Onorab Vidot kot bokou keksoz i bezwen ganny fer dan sa laliny, kot i konsern ledikasyon dan lekol.

E ler ou fer refleksyon en zanfan i pas en lazournen ant lendi a Vandredi ant 7 a 8rdtan dan sipervizyon dan

lakour lekòl, anba gidans nou bann *teachers*. E letan ou pe get lo kote paran li menm, ki sa ou travay 8er ziska 4er ouswa 8er ziska 5er ouswa 9er - 5er.

E ler ou ariv kot ou, mon mazine poudir i annan en kantite keksoz ki ou bezwen fer e ou annan petet apenn 2 ou 3erdtan ou lizye ouswa sa moman letan pou ou regard ou zanfan.

E souvandfwa i annan bann ki ariv pli tar ki pa neserman i arive baze lo son travay, ki zanfan in fini dormi e i pe leve bomaten pou li ale al lekòl. So i fer ki i an en dilenn kot ou annan en moman letan kot kominikasyon pa pe ganny arive lo sa peryod letan e ki fer ki zanfan i kapab ganny sape dan en fason.

E se sa kot Minister Ledikasyon atraver son *curriculum* i bezwen antre avek bann size. E la nou ti pe koz lo *PSE*, ki ava en konponan entegral pandan sa 8erdtan ki en zanfan i dan lakour lekòl, ladan en peryod a ganny dedye pou koz lo lasante reprodiktiv.

E nou koman politisyen nou, nou bezwen vwar poudir nou get sa *checks and balances* kot i konsern sa size. Pou fer ki bezwen arive. Nou pa kapab *focus* zis lo sa nivo akademik. Nou bezwen *focus* osi lo sa nivo

lasante, son pratik li menm. E osi anmenn sa bout kot nou akòz lo lekor imen dan en fason, ki nou pa devret pe kanmi pou koz lo la.

E se sa ki nou ti fer bann demann pou annan plis bann formasyon, ki ganny met devan atraver nou bann *Peer educators* ki zot, zot kapab delivre lo sa nivo lo sa standar ki'n ganny set par *WHO*.

Mr Speaker nou osi rekonnet ki size diskisyon i pa pou fini la. E mon krwar i devret annan bann deba nasyonal, akòz atraver travay ki Komite in ganny fer, nou'n kapab osi fer nou prop *survey* avek sa bann zenn adolesan, pou vwar lo zot fason panse. Zot fason fer e kwa ki zot pe ekspekte avek lasosyete Gouvernman, ek bann departman ki relye e travay avek size ki nou devan nou la. E enn bann konsern ki zot bann zenn i dir ou, akòz laz konsantman ki ganny mete a laz 15an, e nou, en kou pe vwar poudir pou ou kapab akse avek bann metod kontraseptiv, fodre ou annan 18an an montan, ouswa se avek konsantman ou paran.

*Now* mon pa pe dir ki poudir nou bezwen taye al revwar Polisi pou redwir laz akse, me mon pe dir annou anmenn en refleksyon nasyonal

lo sa size. E regard bann statistik ki'n ganny prezante avek loter Mosyon e sa ki mon elabor lo la pou war eski i fer sans? Eski i fer sans ozordi pou nou kapab anmenn - baze lo statistik fer ki akse avek bann metod e servis i vin a en pli zenn- az?

E nou tou nou konnen poudir sa lemonn global, sa lavi vitman ki nou pe viv, sa akse ek teknolozi ek lenformasyon, nou zenn e en tre zenn az lespri in vin pli ouver, e se sa ki ou war ki a en tre zenn az la nou pe war bann zenn pe angaze. So eski sa pa en pwen refleksyon ki nou pe met devan osi pou nou kapab pran desizyon?

Tout an respektan larelizyon;- tout an respektan valer moral li sak endividi i poze ouswa sa ki li i krwar ladan. E avek sa Mr Speaker mon pou siport en tel Mosyon. Akoz i pou anmenn nou dan en direksyon kot nou kapab minimiz sa aborsyon ki pe ganny arive avek nou bann zenn anba laz a en tre zen- az, e ki met zot konsantre a risk.

E osi briz serten fitir sa bann zenn adolesan. E osi pou ede ki maladi ki relye avek lasante reproduktiv, i pa kontinyen ganny propaze ozordi. E avek sa Mr Speaker mon siport sa Mosyon. Mersi.

### **MR DEPUTY SPEAKER**

Mersi Onorab. Akoz Onorab Aglae ti pe segonde mon'n donn li en pti letan an plis. *So from there on* tou bann Manm mon pe donn zot en *minimum* en maksimonm plito 20 minit, pou nou kapab fini sa Mosyon *at least* avan 5er.

I annan Manm *so far* 9 Manm ki'n endike zot oule koze, so mon kalkil letan. E mon krwar ki 20 minit i a rezonnab pou nou fini 5er. Apard sa 9 ki lo mon papye la napa ankor ki'n endike ki mon ti'n dir zot fer ler Onorab Aglae pe koze. So prosen lo lalis i Onorab Adelaide.

### **HON FRANCOIS ADELAIDE**

Mersi Mr Speaker. Bonzour Mr Speaker. Bonzour tou Manm Onorab e tou dimoun ki a lekout. Mr Speaker koman en Manm lo sa Komite, mon pa pou rat sa sans pou mwan aport mon kontribisyon lo sa Mosyon akoz mon krwar ki i en Mosyon ki annan tou son merit.

E mwan koman sa dimoun dan Lasanble ki'n ganny ete pou reprezant mon pep e nou'n ganny sa manda pou nou pran bann desizyon. Nou kapab apel li bann desizyon brav e menm par ler bann desizyon difisil.

Me koman en Gouvernman responsab parey nou kontinyen dir, nou pa kapab frenm lizye lo bann keksoz ki i reel dan nou pei. E nou'n deside reste labous fermen, an mezir ki nou kominote i kontinyen ganny afekte.

Mr Speaker dabor mon oule remersi tou bann dimoun ki'n pran par dan sa dyalog. Mon oule mersi pou Komite dan Lasanble Nasyonal. Nou'n fer tou sa ki nou kapab. Nou'n la lo Bonzour Sesel. Nou'n al lo preski partou bann medya. Nou'n envit Minister Lasante, bann lezot *NGO*.

Nou'n menm koz avek bann paran ki'n fer bann lesanz ouswa ler nou zwenn zot, swa lo telefonn. E nou'n sey nou mye pour ki nou kapab pas sa bann mesaz ki nou anvi pase, pou nou kapab protez nou bann adolesan vizavi lasante reproduktiv.

Mr Speaker yer ti annan dan Bonzour Sesel ti annan en deba byen enteresan. E atraver sa deba nou'n reouver ki sa size i ankor en *taboo*, e sa ki mon kontan se ki i annan dimoun ki pe vir devan avek tou zot bann *knowledge*, pou donn lanmen pou zot vin ede dan sa *field*, pour ki sa size ki sa size i a vin en size ki tou dimoun in ava

santi lo konfortab pou koz lo la. E ki vreman nou ava protez nou bann adolesan ki seksyelman aktiv.

Mr Speaker sa Mosyon ki nou pe dil avek la, vre ler nou gete i enn ki dimoun pa oule tro, tro koz lo la. Mon pa konnen akoz, nou kapab koz lo latet, nou kapab koz lo lipye. Nou santi nou ale pou koz lo nenport parti nou lekor. Me sa bout mon pa konpran akoz ki nou santi nou anbarase.

Bondye in donn nou, nou lekor e tousala i dan son fonksyon. Vre i annan son letan ki ou servi li, ou lipye ou annan son letan ki ou servi li, ou lanmen osi annan letan ki ou servis li. E ou parti seksyel osi i an letan ki ou servi li. E sa nou bezwen aksepte e nou bezwen koz avek nou bann zanfan laverite e nou bezwen eksplik zot.

Mr Speaker ler mon fer sa bann dyalog avek diferan parti prenan, nou'n trouve poudir kot lekol i pa vedir nou pe blanm lekol. Lasante reproduktiv i pou nou tou i pa zis pou lekol. Me parey mon bann koleg in dir avan ki nou bann zanfan i pas en pe letan dan lekol e sa i en size dan zot *syllabus*.

I annan en problemn nou'n konstate ki bann ansennyman, pa tou - me i annan



bann ansennyman i pa santi zot ki pou koz lo sa size. E ler nou'n tann pou nou frenmen lo en size byensir sa i kre lespas pou nou bann manrmay al rod ankor plis, akoz nou manrmay nou fournen. Nou pa'n ne gran nou osi nou ti pas sa staz adolesan. E nou tou nou konnen ki ti pase dan staz adolesan, e pa zis nou Mr Speaker parey Proverb i dir” en ponm pa tonn tro lwen avek son pye.”

Menm nou paran, kantmenm nou tant pou montre ledwa lo zenn - menm nou paran osi ti parey nou. Zot osi zot ti form e zot osi zot ti fer piti zenn. Konbyen nou la ki nou konn ler nou paran nou war paran in fer piti a laz zenn? So i pa en keksoz ki nou devret kanmi pou nou koz lo la e kontrer nou koman bann dimoun ki fer Lalwa nou devret kapab tonm dakor avek kanmarad pou nou fer bann keksoz ki byen. Menm ki nou pou ganny kritike - *anyway* nou ganny mete dan Lasanble pou fer deba.

Byensir i annan dimoun ki kontan nou deba e par ler i annan dimoun ki pa kontan nou deba. Me selman nou pe ganny peye pou nou fer en deba e sa landrwa i en landrwa edikasyonnel. E bokou dimoun i *look up to* nou, pou nou pran

bann desizyon ler zot, zot pa kapab pran.

E nou ozordi koman sa Lasanble nou pe fer en pa an avan, nou pe bouz en pe devan pou nou pran en desizyon, ki *a mon avis* atraver sa bann dyalog ki mon'n gannye, bokou bann lenstitisyon - bokou bann departman pa'n kapab pran sa bann desizyon.

E nou ozordi nou pou atraver sa Mosyon - byensir i pa en zafer ki *binding* lo Gouvernman parey nou dir. Me selman tou kou mon dir en Mosyon i en konversasyon ki nou, nou komanse. E an mezir nou koze, byensir i pou ganny anplifye, e ler nou sorti la nou pou annan sa *clear* portre ki Lasanble Nasyonal ti pe dir.

E nou, nou pou met sa a laporte Gouvernman, pou zot fer serten desizyon pou zot kapab ede dan rod en solisyon en pe pou sa problem.

Mr Speaker dan nou bann *meeting* tou nou pa'n kit bann zanfan deryer. Nou'n enkli bann zanfan dan nou deba, e ou a sirpriz ou a sirpriz keksoz ki nou krwar nou bann zanfan pa konnen be nou zanfan i- mon pa konnen is akademikman zot bon. Me lo kote lasante seksyel nou bann zanfan i bon, e zot koz menm pli for ki nou.

E sa, mon felisit zot pou sa akoz mon pa oule okenn zanfan ki kanmi pou li eksprim son drwa. Zis parey ou kontan ou lizye, ou bezwen kontan ou parti seksyel e ou bezwen konnen ki mannyer ou pou servi li avek tou respe parey nou pe dir.

Onorab Aglae in dir moral. Wi, mon dakor moral, legliz i zwe son bout, la kominote i zwe son bout, paran i zwe son bout. E menm lekol i zwe son bout, e ler ou gete i tout en kominote ki bezwen zwe en rol pou nou kapab sov nou zanfan.

Sa Mosyon ki pe demande i pa pe dir ki Gouvernman met kontraseptiv pou tou dimoun. Sak fwa i annan en Mosyon ki vini dimoun petet i mal enterpret sa Mosyon e petet i don li en lot splander. Sa Mosyon pe demande ki bann kad legal i ganny mete e akse avek kontraseptiv i annan pou nou bann zenn.

I pa pe dir ki tou zenn 15an ziska 18an pou le pou ale pou al rod kontraseptiv. Non Mr Speaker, sa i pe dir nou deza annan en problem, nou bann zanfan i deza seksyelman aktiv a en tre zenn az. *Be it* mon pa konnen parey nou'n dir, *be it* bann manze ki zot manze zot devlop pli vit.

*Be it* bann keksoz ki zot gete, byensir ler ou get bann keksoz ou lespri pe pans bann keksoz, byensir ou lekor i devlope e pou li kapab konpromi sa bann keksoz ki ou pe mazine. E se sa akoz ki nou zanfan i devlop sitan vit.

Mr Speaker i annan- mon pa konnen si nou mazine. Ti annan en kanpany dan Sesel pour ki zanfan i aret manz torti. Mr Speaker akoz ledikasyon in telman bon, ozordi si ou kwi en torti dan kastrol se ou, gard i kapab monte e vin met ou dan kaso.

Akoz ledikasyon in sitan efektif ki nou menm nou bezwen vey nou zanfan. Kantmenm par ler nou osi nou, mwan osi mon pa manze. So mon zanfan pa pou anmenn mon kot Lapolis akoz mon pa manze.

### **MR DEPUTY SPEAKER**

Veye ki ou pe dir Onorab.

### **HON FRANCOIS ADELAIDE**

Me solman Mr Speaker sa laspe ledikasyon i lakle dan sa deba ki nou pe fer ozordi. Zis parey atraver manz torti, ledikasyon seksyel si nou ganny li byen - si nou ganny li byen, i pou fer ki nou bann etidyan pou vreman konpran sa, e zot pou pas ban mesaz pozitiv avek zot bann

lezot zanfan. E byensir i pou pran en pe letan pou nou kapab fer sa arive. Me i pou arive en zour.

Me solman nou pe dir pou le moman ler sa problem deza avek nou, nou pou bezwen rod en solisyon.

Mr Speaker mon oule remerci tou bann paran ki'n *call* mwan. I annan ki eksprim zot konsern, nou'n asize nou'n koze. Byensir i annan ki pa'n konpran e ozordi mon pe sey ankor enn fwa pou mon sey eksplik zot. I pa vedir ki nou pe demann Gouvernman pou fer sa ki tou zanfan 15 a 18an pou ale pou al rod kontraseptiv, akoz nou pe dir sa Mosyon ozordi. So i enportan pou zot pa mal enterpret nou.

Mr Speaker, mon kontan ozordi, mon vremen kontan ozordi ki nou pe pran, parey mon'n dir avan nou pe pran sa desizyon. E mon oule demann tou bann dimoun dan Lasanble ozordi pou nou get sa Mosyon avek en laspe pozitiv. E pour ki nou tou san eksepsyon nou siport sa Mosyon.

Akoz sa Mosyon i enn ki vremen bon, parey mon pe dir avan. E mon repet ankor i en Mosyon ki korek. Nou pe pran bann desizyon serye ki bokou bann Minister ouswa bann departman pa pe pran. So parey

mon'n dir nou ganny peye pou nou fer sa ki bon pou Lepep. E nou pou bezwen fer sir ki nou respekte nou manda e donn Sesel sa ki meyer.

Mr Speaker mon pa pou long lo sa deba, be solman mon kontan fer zistis. Koman en Manm ki'n lo sa komite e ki'n depi Sizyenm Lasanble parey nou dir sa Mosyon nou'n pouse, nou'n konsilte. Se sa rezon ki in Onorab sitan letan, in pran sitan letan akoz i ti en Mosyon ki ti pran en pe letan pou li ganny *momentum*.

E konsiltasyon in lakle e nou'n fer sir ki ozordi sa Mosyon in ariv dan Lasanble. E mon fyer pou nou Komite e mon pe demann tou Manm Lasanble pou siport nou dan sa Mosyon pou nou anvoy kot Gouvernman, poudir i ava annan keksoz ki ganny fer pou sa bann zenn.

E ki tou nou bann fiy e nou bann garson Sesel, i ava ganny zot en bon lasante en ki nou pa pe vwar nou, nou pe met dey akoz en zanfan in mor kan i ti kapab ganny en servis, me ki pa'n ganny akse avek. E i fer ki nou perdi nou bann zanfan a en tre zenn-az.

So Onorab mersi bokou pou sa Mosyon e mon garanti ou tou mon sipor. Mersi bokou Mr Speaker.

**MR DEPUTY SPEAKER**

Mersi Onorab. Ou'n koz dan 10minit. Tre byen. Prosen lo lalis se Onorab Porice.

**HON DOYACE PORICE**

Mersi Mr Speaker. Tou bann Manm Onorab e tou dimoun ki a lekout bonzour.

Mr Speaker mon pou siport sa Mosyon anmennen par Onorab Rosie Bistoquet akoz nou Komite dan Lasanble nou'n fer bokou refleksyon ek resers pou nou kapab anmenn sa Mosyon ozordi. Nou'n vwar ki nou annan bokou zenn ki pe ansent anba laz e zot pe pran bann risk ki pe kout zot byen ser.

Nou'n santi ki nou zenn anba laz nou bezwen ed zot dan zot problem. Ganny akse avek bann metod kontraseptiv e protez zot kont lenfeksyon. Serten sa bann zanfan i ganny enfliyans-e tre vit atraver bokou aktivite negativ dan nou distrik, ki pe fer zot pran move desizyon.

Parey nou konnen ki i an bokou lenfeksyon la deor e lezot maladi asosye avek sistenm reproduktiv, e nou bezwen vwar ki mannyer nou bezwen ed nou zenn anba laz atraver e kad legal parey Mosyon pe demande.

Mr Speaker nou zanfan anba 18an pa ganny akse avek kontraseptiv e i annan ki aktiv seksyelman. Koman en manman, en endikater mon sant ki sa bann zanfan i parey nou zanfan e ki bezwen ganny proteze.

Alor se sa ki Minister Lasante i bezwen revwar kad legal pou ed sa bann zanfan. Pour ki zot osi zot a kapab protez zot lekor letan zot me mazin al ver aksyon seksyel, e ki zot a kapab ganny sans annan en konsiltasyon anver zofisye Lasante.

Nou konnen ki serten pou dir ki nou pe ouver laport, ouswa nou pe envit plis zanfan pou al fer sex. Pou mwan Mr Speaker i pa sa ki nou pe dir, statistik in montre pou plizyer lannen.

Mr Speaker nou'n vwar plizyer zanfan laz 13 a 17an ki'n ansent e nou war zanfan pe anmenn zanfan. E i ankor pe angaz zot avek bann desizyon ki pe afekte zot prop lekor, kot i vremen sagrinan.

En zanfan sa laz i ankor en pti baba pou mwan e ki zot annan bokou pou *achieve* dan zot pti lavi lo nivo zot ledikasyon e petet osi antre dan lemonn travay. E se zot ki pou pran nou plas demen. Parey nou tou nou konnen, ki met en zanfan o

monn i koute i anmenn bokou defi e nou bezwen responsab. Alor zanfan sa laz avek en zanfan i fer lapenn Mr Speaker.

Mon santi ki paran osi i bezwen zwe zot rol pou edik zot zanfan lo sa size fer sex. Spesyalman nou bann pti fiy kot paran i fer zot konpran son konsekans annan en zanfan ou sa fer sex anba laz. E petet annan en swivi osi avek nou zanfan anver zot latitud kot lakour, e osi dan nenport ki landrwa kot zot ete.

Lo kote lekol osi petet nou a demann bann *counsellors* pou ede detekte sa bann tel zanfan, e pou osi anmenn plis ledikasyon anver sa size seksyalite sirtou bann ki deza pe fer sex dan lekol.

Mr Speaker sa bann zanfan pa zis lo kote lansentman, me i konsern lenfeksyon atraver bann maladi asosye avek sistenm reproduktiv. E pour sa i demann bokou ledikasyon anver nou zanfan, pou sansibiliz zot lo danze sa bann tel aksyon e ed zot konn konsekans sa bann maladi atraver zot kontinyasyon lavi.

Menm si serten sa bann maladi i annan gerizon, me moralman e osi fizikman, i fer serten domaz ek nou lekor e koz defi tou dilon nou lavi. E se sa

Mr Speaker ki nou Komite *HIV/AIDS* dan Lasanble nou'n santi i nou bezwen anmenn sa problemn devan e rod en solisyon pou ed sa bann zanfan anba laz.

Kot nou pe demann Minister Lasante pou revwar zot Polisi pou ed sa bann zanfan pou ganny akse avek kontraseptiv me petet an kolaborasyon avek paran.

Nou konnen ki pa tou paran ki pran zot responsabilite. Me i kapab vin atraver gran paran, sa dimoun ki responsab sa zanfan e men *counsellor* kot lekol kot i annan bokou zot ki konn nou zanfan byen ki nou. Alor i ava en lavans pou nou zanfan. E osi pou paran ki pa kapab kontrol zot zanfan ki anba laz.

Avek sa de mo, mon asir Onorab Bistoquet ki mon pou donn sipor sa Mosyon e demann tou lezot Onorab pou donn zot sipor. Mersi.

### **MR DEPUTY SPEAKER**

Mersi Onorab Porice. Prosen entervenans Onorab Vidot.

### **HON AUDREY VIDOT**

Mersi Mr Speaker. Bonzour Mr Speaker. Bonzour tou mon bann Koleg Onorab. Bonzour tou bann dimoun ki a lekout e

en bonzour spesyal zabitan Roche Caiman.

Mr Speaker, sa size ki devan nou Lasanble ozordi i en size ki serye, ki nesesit annan e i bezwen annan bann desizyon serye ki bezwen ganny pran, pou kapab byensir ede protez a tou moman lasante nou bann adolesan, met zot an priyorite e ki kapab osi annan en lenpak lo lasante nou popilasyon e lasante pei.

Mr Speaker, parey mon koleg Onorab Aglae in fer resorti dan son lentervansyon. sa size ki devan nou dan sa Mosyon ozordi, in en size ki'n komans depi Sizyenm Lasanble, kot bann Manm ki ti lo Komite *HIV/AIDS and Sexual Reproductive Health and Rights* in met lespri ansanm, pou vwar ki mannyer nou kapab ede amelyor lasante nou bann adolesan, e adres bann konsern lo stil lavi nou bann adolesan ozordi.

E sa in ganny ranforsi byensir avek zefor ki setyenm Manm Lasanble Komite ki'n kontiny sa travay, pou nou arive ozordi prezant sa Mosyon. E mon remersi Onorab Bistoquet pou prezant sa Mosyon pou Komite devan nou Lasanble e byensir Onorab Aglae pou segonde.

Mr Speaker, konsiltasyon lo sa size ki nou pe koz lo la dan a Mosyon ozordi, in enn ki vremen entans kot in annan bokou dyalog, pa zis avek bann profesyonnel lasante, me avek bann group sosyete sivil, osi byen ki nou bann ansenyan dan bann lekòl, kot letan nou'n zwenn avek bann group zanfan dan lekòl segonder, zisteman pou konn en pti pe zot reaksyon lo size lasante reproduktiv.

E ti enteresan pou ekout sa bann zanfan kot pe donn zot pwennvi, e zot konesans lo sa size. E i montre nou bann Manm Lasanble kantite konsern koman bann adilt, koman bann dirizan e osi koman bann paran, ki pe pase dan leta lespri nou bann adolesan.

Mr Speaker, nou tou ki la anndan nou kapab agree ki i vizyon en paran, en paran responsab pou li vwar byennet son zanfan. Ler nou dir byennet son zanfan se ki ler en paran in nobou annan nesans son zanfan, i anvi vwar son zanfan grandi dan en lanvironnman ki sen, sof, kot lasante son zanfan i byen ganny okipe, i byen ganny prezerve. E ki i grandi pou li vin en bon sitwayen demen.

E ki li osi i a zwe son rol dan sosyete pou kontiny nou

kiltir Seselwa, kot nou ede kontribye dan devlopman personnel, devan pei e devlopman nou bann kominote kot nou grandi. Sa mon asire bokou nou bann Manm nou pou agree lo la.

I enportan ki letan nou koz lo ledikasyon, nou komans li dan lakour. Dan lakour, laplikasyon valer moral i komans dan lakour. Se sa paran ki annan sa responsabilite pou li donn legzanp e disiplin son lakour. Pou li byensir kapab annan sa kontrol e sa gidans lo son zanfan. E son stil lavi ki li i demontre kot son lakour, se la kot sa zanfan ki pe grandi i komans aprann. E si kot sa lakour i annan problem sosyal, i annan problem disiplin, i annan problem pou enplimant valer moral definitivman i pou difisil pou sa zanfan dan son parkour ledikasyon pou li kapab protez e defann son lekor.

Mr Speaker, paran i bezwen annan en konversasyon avek son zanfan a en tre zenn-az. En laz kot i komans vwar poudir son zanfan pe konpran, espesyalman son parti lekor. Akoz si sa paran pa komans fer sa konversasyon ek son zanfan, definitivman son zanfan pou al rod lenformasyon lot landrwa. E

nou konn tre byen ozordi dan sa sosyete ki nou pe viv ladan, i danzere ler ou zanfan i al rod li lot landrwa. Akoz i kapab annan en gran lenplikasyon negativ lo son lavi personnel.

I enportan ki paran i ed sa zanfan, pou li konnen ki son drwa e responsabilite pou li okip son lekor personnel. Son parti lekor parey Onorab Adelaide in fer resorti, latet ziska lipye. Tou son parti lekor. E i bezwen annan respe pou son lekor e respe pou sa lot zanfan ki swa i angaz li pou zwe avek, koz avek edik avek partou kot i ale. Ki swa dan kominote, ki swa kot fanmir, ki swa dan lakour lekol.

Mr Speaker, si ozordi nou'n vwar poudir i annan adolesan ki vwar li difisil annan konversasyon avek son paran lo serten size ki parey nou pe koz lo la ozordi, ki relye avek son parti lekor, lo lasante prodiktiv pou li edik son lekor, se akoz sa mankman konversasyon ki'n annan ant sa paran e sa zanfan.

Ozordi nou bann Manm Lasanble nou pe debat lo en size, pou nou kapab sipliy e demann bann paran ozordi ki pa pe fer sa konversasyon avek son zanfan pou reflexir byen e komans konsidere.

Mr Speaker, mon koleg Onorab Bistoquet in fer resorti ki in annan plizyer letid ki'n ganny fer par bann eksper lasante, pou vwar e konn leta lasante nou bann adolesan. E in vwar poudir i en realite ozordi e i en konsern ki bokou nou bann adolesan zot aktivman pe angaz zot dan bann aktivite seksyel a en tre zenn-az.

E se sa rezon ki ou vwar nou bezwen vin ozordi pou nou komans piblikman sa travay par koz avek tou popilasyon. Enkli nou kominote, enkli bann profesyonnel lasante, sosyete sivil, tou Manm Lasanble, tou dimoun ki angaz epou vwar ki manner nou kapab met lespri ansanm pou nou ed nou bann adolesan.

Wi, napa paran ki responsab ki anvi vwar son zanfan angaz li dan aktivite seksyel a en tre zenn az. Napa paran ki anvi vwar sa. Me lefe ki ozordi nou konnen baze lo statistik ki'n ganny montre, ki mon bann koleg in koz lo la i klerman montre ki poudir larealite la deor, e menm si i ansan nou ki pe panse poudir pa sa direksyon ki nou anvi ale, me i realite ozordi. E nou bezwen komans en landrwa.

Dan plizyer sa bann diskisyon, dan dyalog ki nou'n annan nou konnen poudir nou

politisyen nou pa ekspertiz dan sa bann laspe medikal. Apart ki nou bann ki'n deza dan lasante ki annan serten konesans. Me nou pe demann avek lasante pou li revwar son Polisi zisteman aköz se zot, zot ki resevwar bann adolesan. Zot ki rankontre bann adolesan ler dan bann sitasyon kot sa zanfan swa in ganny abize, swa in tonm ansent anba laz. Swa in vwar li pe annan serten problem avek son lasante aköz in aktivman angaze dan aktivite seksyel a en tre zenn-az.

Se zot ki annan sa pouvwar, sa konesans pou zot kapab annan sa lenfliyans fer nou konpran ki danze ki i annan ler nou bann zenn pa ganny akse avek bann fasilite, bann metod ki pou kapab protez son lekor ler li i pe angaz li dan bann aktivite seksyel.

Se pour sa rezon ki nou pe komans sa konversasyon. Pou zot osi bann profesyonnel sorti e vin devan.

Mr Speaker, nou'n vwar levidans, mon asire dan bann kominote kot nou annan zenn fiy ki'n vwar li in tonm ansent 2 fwa ler son laz i par anba 18an.

E nou konn bann zenn garson ki'n vin papa par anba 18an - pa zis 1 fwa, me plizyer fwa. E si nou, nou pa fer sa zefor pou nou komans edik nou



zanfan lo responsabilite zot parti lekor, protez zot lekor e bann risk ki vin avek ler zot angaz zot dan bann aktivite seksyel, nou pei pa pou tonm enn ki an bonn sante.

Moralman nou'n vwar ki lenpak in annan lo en zenn adolesan, en zenn fiy kot in vwar li vin pran responsabilite en rol manman, menm en zenn garson. Kot i pa ankor menm kapab aste son prop keksoz avek son lasyer travay, i bezwen depan ankor, me plis sa presyon o paran pou donn li sa sipor. Nou'n vwar sa.

Se, i enportan alors ki paran i bezwen zwe sa rol pli enportan. E la mon pou antre osi lo ledikasyon dan lekol. Wi, resaman mon'n anmenn en kestyon pou Minis Ledikasyon pou ranforsi lo en size i ganny pratike dan lekol par nou bann ansenyan lo size *PSE*. En size kot i donn loportinite sa bann ansenyan tous lo bann diferan size ki enportan dan lavi nou bann adolesan. E parmi i en loportinite pou edik nou bann adolesan lo lasante reproduktiv.

E la mon pou met plis lanfaz ankor lo sa size. Minister Ledikasyon i bezwen pe kontinyelman donn sipor e donn valer sa size dan lekol. Ler nou dir donn valer, tret li parey zot tret bann lezot size

akademik. Fer, donn sans bann zenn fer legzanmen. Pa zis *assignment* me legzanmen. Pou konpran si nou bann adolesan in byen konpran sa size.

Asire ki zot konnen poudir zot annan sa drwa lo zot lekor pou dir non, ler zot santi poudir i pou afekte zot lekor. Edik nou bann zenn lo abstinans. Donn zot sa formasyon neserer pou konplimant sa ki petet paran pa pe donn ase kot lakour.

Menm nou'n konpran poudir i annan serten ansenyan i vwar li en pti pe difisil pou edik lo sa size. Mwan mon krwar i en size ki vremen enportan, nou kapab dir poudir i difisil. Mon pa vwar li i difisil, akoz mwan koman en Manm mon annan en garson 8an, mon pe komans fer li avek mon zanzan.

Konnen, edik li poudir son parti lekor i pou li. Person napa drwa touse e i bezwen respekte ki swa sa lot garson, ki swa sa lot fiy ki otour li dan son zanmerant lekol ou landrwa kot i frekante. Ou bezwen komans li boner e sa i ganny konplimante dan lekol.

E ansenyan pe enport ki ou krwayans relizyee, i en loportinite ankor pou ankouraz li lo spirityalite, lo prezervasyon son lekor. Sa i merit en size ki fasil pou ed li pou li protez e

disiplin son lekor, pou li kapab anpes li ganny tante par okenn move tantasyon ki egziste dan son lanvironnman.

Mr Speaker, profesyonnel lasante mon'n dir i annan en rol enportan pou zwe lo sa topik ki nou pe koz lo la. Zot bezwen komans sa deba nasyonal parey mon kole Onorab Aglae in fer resorti. Zot bezwen vin devan, donn plis detay sa bann statistik ek bann fe, realite ki pe pase la deor avek nou bann adolesan. Bann leksperyans ki zot rankontre. Sa pou ede pou ki nou popilasyon i byen ganny edike, espesyalman nou bann paran. E vwar sa size en size serye e aret li koman en size *taboo*.

Akoz si zot pa vin devan pou vin koz lo la, i pou kontinyelman reste en size *taboo*. I enportan ki zot vini, zot dir avek popilasyon fe ozordi e ki direksyon nou bezwen pran pou prezerv lasante nou bann adolesan. Pou nou kapab garanti en popilasyon pli an bonn sante e pli prodiktiv.

Lezot partner tel parey Departman Sosyal, Minister Lafanmir, zot osi zot annan en rol pou zot zwe. Mon rapel i annan serten Lorganizasyon ki'n angaz zot ek sa bann departman dan lepase, kot in annan bann sesyon paran.

Edik bann zenn paran ki manner pou zot kapab pli byen okip zot fanmir, edik zot zanfan e gard sa linite, sa lanmour ek respe dan bann lakour. Sa i bezwen kontinyelman ganny ranforsi.

Sosyete sivil in enn bann Lorganizasyon enportan ki'n kontinyelman zwe en rol e zot bezwen kontinyelman zwe sa rol pou edik bann diferan groupman dan kominote lo sa bann size. Bann risk ki nou bann zenn i kapab met zot lekor ladan, ler zot angaz zot dan bann aktivite seksyel a en tre zenn-az.

Mon asire ki ler nou bann adolesan i ganny byen enformen lo zot responsabilite, zot rol ki zot lekor i annan e ki lenportans pou prezerv zot lasante, mon asire i pou ed zot fer bann bon desizyon e konsantre lo zot letid pour ki demen zot vin bann bon sitwayen.

I pa en travay ki fasil. I pa en travay ki enposib. Me nou bezwen komans fer li. E lo sa not mon oule termin par dir ki mon pou aport mon sipor anver sa Mosyon, baze lo bann pwen ki'n ganny fer resorti lo ledikasyon, lo siport nou bann adolesan pou ki zot ganny sipor e swen nesaser, pou protez zot lekor e edik zot lekor pou ki

demen nou kapab ganny zot pou vin bann meyer sitwayen Sesel.

E donn bann bon legzanp pou zot zenerasyon ki swiv. E mon dir mersi tou bann Manm ki'n koze lo sa Mosyon e bann ki pou aport ankor zot kontribisyon e aport zot sipor. E mon demann tou Manm pou donn sipor sa Mosyon. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab. Donk nou pou pran en *break* la ziska 11er. E letan nou retournen bann lezot entervenans a ganny sans fer zot prezantasyon. Mersi.

**(BREAK)**

**MR DEPUTY SPEAKER**

*Welcome back* tou Manm Onorab. Alors nou pou kontinyen avek deba lo Mosyon ki devan nou ozordi prezante Onorab Rosie Bistoquet. Mosyon ki pe demande ki Lasanble i demande ki Gouvernman atraver Minister Lasante i revwar son Polisi e met an plas en kad legal anver akse ek bann metod kontraseptiv e lezot servis lasante reprodiktiv pou bann

zenn anba 18an ki aktiv seksyelman ek bi

a) Redwir lansentman anba laz e osi.

b) Redwir bann risk lenfeksyon avek maladi asosye avek sistenm reprodiktiv.

Prosen entervenans lo nou lalis se Onorab Andy Labonte.

**HON ANDY LABONTE**

Mersi Mr Speaker. bonzour tou Manm ki a lekout e tou Manm Onorab e tou dimoun ki a lekout.

Mr Speaker, sa Mosyon ki'n ganny anmennen parey in ganny dir, i en Mosyon ki en Komite ki mon form parti e nou'n travay for pou nou kapab anmenn li. E mon vreman apresye ki ozordi atraver sa nouvo ladministrasyon ki la, ki nou kapab kontinyen pran bann desizyon e anmenn bann Mosyon ki tous pep Seselwa an antye e ki oparavan petet nou pa ti anvi koz lo la.

Me parey Onorab Adelaide in dir, nou bezwen koz lo la. Akoz nou'n ganny elekte, malgre ki i sansib nou bezwen koz lo la.

Mr Speaker, parey ou'n dir ou menm ou, sa Mosyon pe demann Gouvernman atraver Minister Lasante pou revwar son Polisi e met an plas en kad legal anver akse ek bann metod

kontraseptiv, e osi lezot servis lasante prodiktiv pou bann zenn anba 18an ki aktiv seksyelman.

E pou mwan Mr Speaker, ler mon get sa Mosyon, mon mazin en keksoz. Parey nou kapab realize, i annan bokou dimoun dan lasosyete, nou Seselwa an zeneral ki nou vremen spirityel, sirtou nou lo Sesel. Nou spirityel, me malgre ki nou spirityel, me laverite nou pa kapab kasyet.

Parey Bouda in deza dir, in toultan dir ki i annan 3 keksoz ki nou pa kapab kasyet pou kontan, soley, lalin e laverite. E sa i en laverite ki kler devan nou. Akoz ler en dimoun pe noye, nou pa kapab dir ek en dimoun sov son lekor, me nou bezwen sov li, apre ki nou bezwen ankouraz li pou li aprann naze.

Alors laverite se ki zenn oubyen vye, si ou seksyelman aktiv i enportan ki ou konn son konsekans parey Onorab Adelaide in fer sorti. Mon pou pran en lot dimansyon nou diskisyon ozordi, mon tann plizoumwenn nou'n koz lo mal ek femel. Be mwan mon pou al dan diferan direksyon.

Premyerman si en mal ek en femel i annan relasyon seksyel, i annan de konsekans, sirtou ler ou pa byen enformen

lo sa size e ou pa pran prekosyon;- swa sa fiy i tonm ansent, swa ou ganny enfekte avek nenport ki lenfeksyon si enn parmi sa de in deza enfekte avek swa *HIV* ou lezot maladi ki ganny transmet par sex.

Me si 2 dimoun menm sex ankor, i annan sa risk ki si enn ant le de partner in deza enfekte i propaz maladi oubyen lenfeksyon.

Mr Speaker, nou koz bokou zis lo condom. Me mon krwar ki zis condom ki pou ede dan sa sirkonstans. Alors avek lespri protez bann zenn anba 18an ki fitir nou pei, nou bezwen kontinyen edik zot lo danze lezot lenfeksyon si zot seksyelman aktiv e sirtou protez zot pou zot pa tonm ansent.

Mr Speaker, Onorab Naidu plizyer fwa in koz lo *PSE* e *PSE* i en keksoz ki nou'n diskite lo la e nou pou kontinyen diskite ki i enportan ki nou bann zenn dan lekol i ganny byen edike.

Onorab Adelaide ankor in dir Bondye in donn nou en lekor e sa lekor i annan plizyer parti e nou pa kapab negliz enn. Akoz en lekor i bezwen tou son parti pou li fonksyonnen. Alors i enportan ki nou donn nou zenn ledikasyon lo ki mannyer pou servi zot parti lekor sirtou

la ki nou pe koz lo kote seksyelman, zot parti seksyel. Servi li avek konesans e konnen ki risk i kapab anmenn pou nou pei e pou nou endividyelman.

Me nou koman bann dirizan ki responsab e konsernen avek lavenir e fitir nou lazenes, nou bezwen pran bann desizyon dan zot faver e la mon bezwen dir ki nou tou nou imen, nou fer fot, nou pa en Sen. Nou pa ni pli rwayalis ki Lerwa ou Larenn. Alors ler ki enn nou zenn i seksyelman aktiv Mr Speaker, nou bezwen donn li ledikasyon ki enportan akoz sa i pou ed li pou pran bann desizyon ki finalman pa pou met li dan en problenm.

E sa Mosyon pe demann Gouvernman atraver Minister Lasante pou revwar sa Polis akoz nou pa kapab dir dan Lalwa poudir en zenn si i annan konsantman i kapab annan relasyon seksyel serten laz, me par kont i pa kapab ganny akse avek bann servis ki konekte avek sa ki i deza pe angaz ladan.

Mr Speaker, pou mwan mon pou siport mon komite e mon pou siport sa Mosyon akoz pirman mon pou dir ki nou bann zenn i bezwen nou. I bezwen nou pou ed zot, pou edik zot poudir i pa zis sex osi ki enportan. Si ou pa ankor

komanse, ou pa angaz ou ladan. Akoz abstinans i premye swa pou nou zwenn la deor. Me par kont si ou'n deza angaz ou ladan e sirtou ler en zenn in tonm ansent premye fwa, dezyenm fwa, me selman i anvi protez son lekor li.

Nou tou nou ki konnen poudir ler ou'n komans en keksoz ki ou vwar poudir ou ganny lanmizman ladan, ou kontinyen. Me selman i anvi protez son lekor, me i pa kapab. Alors nou pa pe akoz pou tou zenn pou dir zot al anver seksyalite. Pa sa ki nou pe koz lo la, nou konnen i sansib. Mwan mon'n koz ek plizyer mon zabitan distrik e mon ankor pe koz avek. Me par kont ler sa Mosyon in mont lo latob, mazorite mon bann dimoun in dir avek mwan, be sa i en Mosyon ki pou anmenn bokou byen pou nou kominote, me selman fodre nou pran li dan son vre sans e akte lo la dan son fason ki i merite.

Mon pa pou long Mr Speaker, me selman avek sa de mo mon pou dir, mon pou donn sipor mon Komite e sa Mosyon akoz mon vwar son lesansyel ladan. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Labonte. Prosenman lo lalis se Onorab Uranie.

### **HON ROCKY URANIE**

Mersi Mr Speaker. Bonzour tou koleg Onorab. Byensir lafanmir Digwa, nou bann adolesan ki petet tanto oubyen zot a kapab get *YouTube*, vwar lo kwa nou ti pe diskite.

Mr Speaker, i rev tou pran ki ler son zanfan, ki pou li ler in met son zanfan lo later, i oule vwar son zanfan grandi, resevwar en bon ledikasyon, fer en karyer dan domenn ki li menm li in swazir. Viv byen, vin sa bon sitwayen egzempler dan lasosyete pour ki lasosyete i ganny mwens problem sosyal - mwens problem ekonomik pour ki pei li menm i progresse, i anmenn plis prosperite pou benefis nou tou.

Mr Speaker, bann bon fason viv ki nou montre nou zenn i vin en legzanp pou bann pli pti ki par deryer pou osi swiv. Me nou tou nou konnen ki sa i pa leka dan nou pti pei Sesel, aköz i annan plizyer laköz faktor ki antre e ki fer ki keksoz pa mars parey i sipoze.

Mr Speaker, i annan bokou paran ki fer letan ouvertman pou koz ek zot zanfan lo diferan size a en tre zenn-az, me nou osi konnen poudir i annan paran i ganny

difikilte pou konekte e koz avek zot zanfan lo serten konversasyon lavi, lavi toulezour ki kapab afekte lavi lafanmir e sirtou bann zanfan zot menm.

Mr Speaker, apard lanmor, en keksoz ki kas leker en paran, en papa, en manman i ler i tante oubyen i ganny met okouran, ou byen li menm li i obzerv son zanfan e vwar ki son zanfan in tonm ansent lo bann lekol parey nou dir, anba 18an.

Pou bokou pran Mr Speaker, ler en keksoz koumsa i arive zot vwar sa koman en laont e lasosyete osi ti vwar sa koman en laont, e sa bann paran ti ganny montre ledwa ki *comme quoi* zot pa'n fer zot devwar byen koman paran pou elve zot zanfan, edik zot zanfan, vey zot zanfan aköz priyorite bann zanfan sete etidye, al lekol, etidye pou fer zot menm zot zanfan fyer, zot paran fyer. Lakominote, ou vwazinaz fyer e byensir pei fyer.

Mr Speaker, mon'n en ansenyan pou 23an, mon'n vwar bokou zanfan, rankontre bokou paran. E mwan mon asir ou Mr Speaker, ki sak zanfan i annan son abilite spesyal e sak zanfan i devlop dan son fason, li menm, *both* fizikman e mantalman. Nou bann fiy e garson, baze lo zot devlopman, i

annan ki vin seksyelman aktiv pli boner ki en lot.

Zot ganny difikilte par natir pou kontrol zot lanvi. E an rezilta en fiy i kapab vwar li tonm ansent oubyen tou lede group, fiy ou garson, i kapab atrap bann maladi ki ganny transmet par bann aksyon seksyel.

Mr Speaker, dan lekol nou annan sa size ki apel *PSCE*. Bann ansenyan i koze lo sa bann topik avek bann zanfan pou sey devlop zot abilite e donn zot serten pouvwar pou zot kapab mentenir zot abstinans ziska ki zot vin adilt. Me parey statistik i montre, sa i pa le ka. Pa tou zanfan ki kapab fer li e an rezilta zot fer sex boner oubyen zot atrap bann maladi transmet par bann aksyon seksyel.

Mr Speaker, ler sa sityasyon i arive sa i met bokou stres lo sa zanfan li menm, bann lezot lazenes ki pe obzerve, ki pe mazinen zot osi zot kapab pas parey. Nou paran e byensir lo lasosyete. E mantalman nou vwar poudir nou bann zanfan ki pas atraver sa bann sityasyon, sa i afekte zot bokou. E bokou i tant pou al ver bann aborsyon, byensir ilegal. Ki met zot a risk.

Sa Mosyon ki sa Komite, ki ganny reprezante par Manm

lo tou lede kote latab e anmennen par Onorab Bistoquet, segonde par Onorab Aglae, pe demande ki Gouvernman atraver Minister Lasante i revwar son Polisi, e met an plas en kad legal anver akse ek bann metod kontraseptiv e lezot servis lasante reproduktiv pou bann zenn anba 18an, ki aktiv seksyelman avek b,i redwir lansentman anba laz e osi redwir bann risk lenfeksyon e lezot maladi asosye avek sistenm reproduktiv.

Mr Speaker, pou lenformasyon, apre konversasyon ki mon'n fer avek en ners, i dir mwan i deza annan bann fiy anba 18an ki vin avek zot paran ,pran kontraseptiv e paran i siny en serten form pou donn zot konsantman zot zanfan pou ganny sa servis.

Mr Speaker, nou tou nou'n zenn. Mwan mon annan mon en garson e mon'n kapab konekte avek li a ter zenn -az e nou kapab koz lo tou keksoz. Me Mr Speaker, sa i pa fasil pou tou larestan. E sirtou bann fiy. I pa fasil pou en fiy dir son paran ki i seksyelman aktiv e i bezwen kontraseptiv. Akoz paran pa oule aksepte sa realite. Akoz sa i en size en pe *taboo*, en pti pe petet enn ler zot

vwar li kontroversyel. Akoz paran li pou li son zanfan i anba laz, 18an, son priyorite se lekol.

E alors ler zenn fiy pa kapab koz ek son paran, so i angaz li dan bann aksyon seksyel boner, la i annan gran risk ki i kapab tonm ansent.

Mr Speaker, nou bezwen pran aksyon serye osi avek sa bann - mon pou servi sa mo - sa bann predater adilt ki abiz sa bann zenn fiy, abiz zot linosans ki annan en menm bann ki pa ganny letan pou li petet apros son paran pou li dir ki i seksyelman aktiv, ki mannyer keksoz in sitan vit.

E pandan sa bann letan ki zot pe ganny parey nou dir tante, zot a sa lenstan la, nou tou nou'n zenn, mazin proteksyon ou lekor *is at the far back of your mind*, i pa la deswit ki ou mazin sa zafer ou bezwen protez ou lekor. *Usually* zot al mazin sa ler zot in fini fer aksyon, la apre ki zot komans mazin ki kapab arive.

Mr Speaker, mon'n temwanny bann zenn fiy ase entelizan ki'n pas atraver bann sityasyon, zot in tonm ansent, zot in nobou kapab ganny zot baba byen. Me kantmenm mon ti'n koz ek zot apre pou sey retourn lekol pou zot kapab kontinyen zot ledikasyon, zot in vwar ki zot pa kapab. Pa ki i

enposib, me zot pa kapab aköz zot pa pe ganny sa kantite led, sipor ki zot bezwen pou zot kapab retourn lekol, oubyen al swiv serten kour pou zot kapab re atrap sa ledikasyon ki zot in manke pou zot kapab fer en karyer.

Mr Speaker, nou konnen ki en Mosyon i pa *binding*, i pa met lobligasyon lo Gouvernman pou fer sa ki in dir. Me si Gouvernman i deside konsider sa Mosyon e met an plas sa ki'n ganny demande, la mwan mon ti a enplor bann zenn pou pa abiz sa servis *comme quoi* ki zot in ganny en *license* pou angaz zot dan bann aksyon seksyel.

Akoz mwan mon 'n swiv bokou nou bann zenn. Mon'n en kantite letan parmi nou bann zenn. Enn ler zot tant pou swiv serten keksoz ki ou pa pe espekte. Zot tant pou swiv en *trend*. Zot vwar enn fer, zot osi zot oule fer. Mon vwar mon koleg Philip Monthly i get mwan laba, i konnen ki mon pe dir aköz li osi in dan ledikasyon.

Alors la Mr Speaker, mon pou enplor bann paran pou kontinyen koz avek zot zanfan. Reste konekte dan lavi zot zanfan, fer zot konpran bann konsekans aksyon fer sex boner. E zanfan osi, otan ki posibil fer sa zefor pou labstinans. Reserse, rod



lenformasyon pou zot kapab vremen *empower* zot lekòr, pou zot kapab tenir e protez zot ziska ler zot vin en adilt.

So, alòrs Mr Speaker, bokou bann lezot pwen in ganny dir par bann Onorab, mon pa pou repete pou mwan fer sa pli long. Me mon ti a swete ki bann paran ki pe ekoute, zot mazin lo la. Bann zanfan osi zot mazin lo la e alòrs zot fer bann swa pozitiv, bann swa ki byen dan lavi pou anmenn bann sanzman ki bon pou zot menm. Mersi Mr Speaker.

**(APPLAUSE)**

### **MR DEPUTY SPEAKER**

Mersi Onorab. Mon pou pas laparol aprezan avek Onorab Desheila Bastienne.

### **HON DESHEILA BASTIENNE**

Mersi Mr Speaker. Bonzour Mr Speaker. Bonzour tou koleg MNAs e bonzour tou dimoun a lekout.

Mr Speaker, Mosyon anmennen par Onorab Bistoquet i pe tous en size sansib me i osi annan bokou leson pou pep an zeneral tire ladan. I enportan ki nou regard lo son kote pli enportan e akòz sa Mosyon i dan Lasanble ozordi. Sa Mosyon Mr

Speaker, pe rekomann fasilite neser pou sipòrt nou bann zenn fiy ki vwar zot pe tonm ansent sitan boner e anba laz. E pe osi fer fas avek bann lenfeksyon e diferan maladi atraver sex.

Mr Speaker, i osi enportan ki nou pran an kont ki lansentman anba laz tre zenn i osi kapab devlope dan bann sityasyon konplike e osi fatal. Bokou bann zenn anba laz 18an pe tonm ansent ozordi akòz zot seksyelman aktiv. E zot pa pe ganny akse avek kontraseptiv akòz Lalwa pou kontraseptiv i 18an an montan.

Mr Speaker, dan Kod *Penal Act, 1996* date le 2 Out i kler ki zanfan 15an i kapab donn son konsantman pou li fer sex, me akse avek kontraseptiv li i 18an.

Bokou pran i konnen ki zot zanfan depi laz 15an i seksyelman aktiv. E zot menm fini pe angaze dan sex. Me zot pa pe pran zot responsabilite pou koz avek zot zanfan lo son konsekan. Swa pran sa pa pou fer en keksoz pou anpese ki sa sityasyon i deborde. Akòz zot menm zot, zot ankor tre zenn e zot pe zis mazin zot lanmizman.

Wi, Lalwa i dir akse avek kontraseptiv i 18an. Me ou sa paran ki tou keksoz i kler devan. Ou ki'n deza ganny

rapor ki ou zanfan pe angaz li dan *sex*, ki ou, ou pe fer? Eski nou pou kontinyen esper ansenyan edik ou zanfan lo lafason pou li konport son lekor? Eski ansenyan ki pou dir ou zanfan kan ki zot merit pe fer *sex* ou pa pe fer *sex*?

Mr Speaker, dan nouvel yer swar Mr David Savy, *Chairperson Board* Lenstiti pou Devlopman Petit Anfans ti dir ki ler ou met en bon fondasyon dan ou lakaz i pou reste debout. Pou mwan mon osi pran li ki fondasyon ou lakaz i pou reste for e solid pou bokou letan, ler en paran i komans edik son zanfan e komans koz avek li lo lavi depi byen zenn. E i kontinyen repete, kontiny remind li e montre li ki ou ape swiv li de pre. E la ou ava vwar ki keksoz pou otreman.

Konmela Mr Speaker i pa en sekre ki zanfan ziska laz 10an pe fer *sex*. I annan rikord ki zanfan a laz 10an in tonm ansent. E kote nou tir laliny la? Ki mannyer nou ed en zanfan 10an, 12an, 15an avek en baba kan li menm li i ankor en zanfan? I ankor bezwen tou lafeksyon son paran li menm i pe vwar li pe met son ledikasyon akote pou donn lafeksyon en baba.

Eski en zanfan sa bann laz parey ki mon'n nonmen, pou

kapab antre dan en lanplwa, pou arive siport son zanfan? Byensir non, e avek en papa ki kekfwaw li osi i ankor lo ban lekol ouswa i zis disparet. Ler baba in ne en sel kou papa napa non, papa napa ladres. Personn pa konnen lekel ki ote i ete, in deklar perdi li. E la tou responsabilite lo ki i tonbe? Lo sa paran.

Mr Speaker, nou tou nou imen e napa personn ki perfe, nou tou nou fer fot. Me eski letan nou pou kontinyen tann sa bann kalite nouvel, kot en pti baba in ganny anmase dan en bin, pou nou i normal? I en bon repitasyon pou nou pei? E lekel plis ki fer sa bann keksoz. Laplipar letan se bann zanfan anba laz.

Mr Speaker, dan mon letan kontraseptiv pa ti annabondans parey koman ozordi. Ti napa leson *PSE*. Nou bann ansenyan pa ti koze lo *sex* avek nou. Ou ti antre dan nenport klinik, ou pa ti vwar bwat *condom* ekspoze partou kote. Tou sa bann leksplikasyon lo radyo, lo medya ti napa tousala.

Alors nou ti kapab dir nou dan nou letan ki nou pa ti ganny edike lo ki fason nou pou tenir nou lekor, ki son konsekans ler ou pe fer *sex* anba laz. Me ozordi kozri lo

lasante reproduktiv i ouver, ansenyan i pare pou koz avek etidyan. Fiy koman garson. Bann *flyers* lo lasante reproduktiv e lo bann diferan metod kontraseptiv, partou i mete pou edik nou bann zenn. Me eski oz tep pran sa, sa on lenportans.

Mr Speaker, i annan paran ki dir i kanmi pou al avek son zanfan kot klinik, akoz zot dir ki napa konfidansyalite e ki zot krwar zot nouvel pou sorti. Wi, tou sa bann keksoz i kapab egziste. Me ankore, farmasi prive i donnen sa bann servis li osi. Alors mwan mon pe demande kwa ki pe arive avek nou. Ki nou pe tandé, ki nou vwar ozordi lo kote *sex*, lo kote lansentman anba laz?

Mr Speaker, mon santi ki ozordi pe annan en pti pe tro bokou lesefer osi. Akoz pou serten zanfan i *ok* li, akoz letan zot in fini donn nesans baba zot retourn lekol, pou li i *ok*. Tousala keksoz pou nou reflexir lo la. Eski sa pou kontinyen? Par ler letan nou pe senpatize ouswa nou pa pe ede, nou pa pe realize ki nou ape ouver en laport ki donn sa bann zenn fiy pye pou zot pa pran zot responsabilite koman bann zanfan lekol, e sa i osi aplik pou bokou paran ki zot, pou zot i *ok*.

Mon fiy mon retournen lekol apre li.

Mr Speaker, en lot problem ankore ki tou dimoun i konnen, ki laz travay ofisyelman i 18an. Ler kot Biro Lanplwa i dir avek en fiy 16an ou 17an ki ou napa laz pou ganny anploye, me nou a met ou dan en program *training* kot ou a ganny en pti *allowance* pour lemoman ziska ler ou a ganny ou laz travay, kote ki tou sa bann problem i vin tonbe aprezan? Mon poz sa keston la.

Ozordi Mr Speaker, sa Mosyon pe demande ki Minister Lasante i revwar son Polisi e i met an plas en kad legal anver akse ek bann metod kontraseptiv, ek lezot servis lasante reproduktiv pou bann zenn anba 18an. Wi Mr Speaker, lansentman anba laz in vin vremen alarman dan nou pei Sesel. E menm sa, pa tou dimoun ki pou konpran sa Mosyon e aksepte sa ki pe ganny diskite lo la.

Letan en zenn fiy i debout devan ou, i pe fer en konversasyon avek ou, i pe plenny son sor. I deza ansent e i pe atrap lanmen en zanfan 2an. Ouswa i ansent i dir ek ou mon premye i kot *daycare*. Ler ou demann li be akoz ou pa'n pran prekasyon e esper sa

zanfan grandi, la ou pe al ganny en dezyenm? Son repons i senp, “mon napa laz, mon anba laz, mon napa drwa al pran kontraseptiv.”

Dan sa ka kot sa Mosyon i konsernen, letan nou pe get sa statistik lansentman anba laz ki kontinyen monte, mon vwar li apropiye ki enn fwa en zenn fiy in donn nesans en baba, in fini vin en manman. I kler ki i pa pe retourn zanfan ankor li. I pa pou retournen pti fiy ankor li. Alor i toutafe normal ki i annan son drwa konmans servi son kontraseptiv. In fini donn nesans en zanfan. Akoz prezan i napa drwa pran kontraseptif? Kwa ki pe anpes li pran kontraseptiv. Eski nou pou pli dakor ki in donn nesans en zanfan a laz 16an, 17an i donn nesans ankor enn, avan i ganny 18an i donn nesans ankor enn. Kote tousala i pou al apiye ?

Mr Speaker, apre tou sa ki mon'n vwar personnelman, ki mon'n siporte, ki mon'n fer tou dan mon kapasite pou ede, lo size zanfan anba laz ki annan 1 ou 2 zanfan e ki pe pas martir pou fer grandi sa bann pti inosan, mwan mon pou dir ankor ki ozordi bokou dimoun la deor pa pou pran an kont sa Mosyon, e pou zot i pou en problenm pou nou aksepte ki

zanfan anba laz enn fwa ki in donn nesans en zanfan i annan son drwa pou li servi kontraseptif.

Senpleman par ler nou fer keksoz konplike akoz nou pa pe get *the bigger picture*. Nou pou zis konplent zanfan i annan zanfan. Zot pe sey rod en led avek *welfare, welfare* pa pe *entertain* zot, nou pe fer zot soufer. Me selman nou pa pe gete son lot bout akoz zot in ariv dan sa kalite semen.

Mr Speaker, mon pou donn mon sipor sa Mosyon kot mon swete vwar en amelyorasyon lo bann lansentman anba laz dan nou distrik e dan nou pei an zeneral. Alors Onorab Bistoquet, mwan mon pou siport ou lo sa Mosyon. Mersi.

**(APPLAUSE)**

**MR DEPUTY SPEAKER**

Mersi Onorab Bastienne. Aprezan mon pou envit Onorab Samynadin pou fer son prezantasyon.

**HON KELLY SAMYNADIN**

Mersi Mr Speaker. Bonzour tou mon bann Koleg Onorab e tou dimoun a lekout. Mr Speaker, dapre sit Lorganizasyon Mondyal pou Lasante an 2019, parmi 1.9 bilyon madanm ki

form parti group laz reproduktiv ki ant 15 a 49an, 1.1 bilyon ladan i annan en bezwen pou servis *family planning* e ladan 842milyon pe servi en metod kontraseptiv. Malerezman 270milyon pa pe kapab zwenn zot bezwen pou akse avek kontraseptiv.

Sa menm sit i *site* ki proporsyon bezwen pou servis *family planning* ki ganny satisfè par bann metod modern ki ganny trouve anba edikater 3.7.1 bann *sustainable development goals* in desann globalman. E sa i environ 77poursan depi 2015 ziska 2002.

Me par kont sa in ogmante dan rezyon Lafrik sorti 55 pou ariv 58 poursan. I osi enportan pou note ki *WHO* i afirman ki litalizasyon bann metod kontraseptiv i anpes bann madanm devlop bann risk lye a lansentman, espesyalman bann zenn fiy. E letan lansentman i ganny separe par mwens ki 2an, tou mortalite pou bann zanfan i 45poursan pli ki bann lansentman ki 2 a 3an separeman. Evantyelman bann ki 4an ou plis zot risk i 60 poursan pli o.

Mr Speaker, parey nou tou nou konnen, malgre nou pti popilasyon, bokou zenn fiy anba laz zot pe angaz zot dan

aktivite seksyel. I annan ki swa zot annan en *boyfriend* dan zot laz. I annan i annan ki angaze ek en partner bokou pli aze ki zot. I annan ki pe angaze dan bann aktivite omoseksyel e i menm annan ki pe fer bann aktivite seksyel komersyal. E souvandfwa sa bann zenn fiy pa pe pran ka avek zot lasante reproduktiv. Setadir zot pa pe asire ki zot pe servi en metod kontraseptiv ki konvenab.

Dan mon parkour koman en ansenyan, mon'n ganny sans enterakte avek bokou zenn fiy adolesan ki seksyelman aktiv e bokou parmi zot pa ti pe servi okenn lezot metod kontraseptiv apard ki *condom*, e sa ti ganny provizyonnen par zot partner an vi ki laplipar zot, zot paran pa ti okouran ki zot seksyelman aktiv.

Les mwan partaz avek zot en temwannayaz vremen rasker ki en zour enn mon etidyan ki a sa letan ti aze 14an ti akont mwan. Par konsekans aktivite seksyel non proteze i ti tonm ansent, apre bokou ezitasyon i deside pou met son manman okouran. Pou evit imilyasyon lo tou lede kote sa manman ti aste pilil avortman e met avek li pou tir sa fetis. Avek larm dan son lizye, malgre ki i ti aze selman 14an, sa zenn fiy ti dir mwan ki i aktyelman ki sa ki

in fer ti mal, e ki sa ti en krim. Akoz se lavi en inosan ki pa'n zanmen demann son nesans ki'n ganny detri.

Dan sa ka Mr Speaker, mon pe enplor avek tou paran ki annan son zenn adolesan dan lakour, i kapab en fiy oubyen en garson, akoz i pran 2 dimoun pou angaz dan aktivite seksyel non proteze e i pran 2 dimoun pou konsevwar en lansentman non prepare. Pou pran letan, pou koz avek zot zanfan lo danze angazman dan aktivite seksyel non proteze.

Annou asire ki nou okouran ki nou zanfan pe fer malgre ki nou pa pou arive konn tou. Annou konsey zot lo bann opsyon kontraseptiv ki zot annan e annan akonpany zot lo sa traze si zot deside aktiv seksyelman a en zenn-az. Akoz si non, nou tou nou pou fer fas avek lakonsekans en lansentman anba laz.

Mr Speaker, konmdir Angle, *a child is a blessing*. Me en lansentman non-prepare par en zann anba la zi poz bokou defi lo sa manman li menm, lo sa papa e menm lo son fanmir. I osi annan en lenpak lo Gouvernman kot souvandfwa lasistans *welfare* i bezwen ganny donnen akoz papa in deside negliz son rol e

responsabilite anver sa manman e sa zanfan.

Oubyen nou vwar statistik dan bann orfelina i ogmante an vi ki sa zenn manman anba laz in swa trouv li dan en sityasyon kot in ganny met deor par son fanmir. E pou fini kont li napa swa me pou abandonn son zanfan.

Mon santi ki sa Mosyon Mr Speaker i enn ki tre valab an vi ki sa bann sif ki Onorab Bistoquet in anmennen, in mansyonnen oparavan i tre alarman. I montre ki bokou paran pa pe okouran ki zot zanfan pe fer, lekel e kote ki zot pe frekante. E i menm montre ki kot lakour napa en serten lord, prensip e gidans apropiye par ki zanfan pe merit swiv.

Zanfan pa pe ganny gidans pou zot kapab anmenn en lavi ki sen e respektab. Apre ki revwar polisi pou fer provizyon akse avek bann metod kontraseptiv, mon santi ki Minister Lasante i devret kree bann servis lasante reprodiktiv ki pli *customer friendly*. Mon santi ki dan sa Polisi i ki ava ganny revwar, bann program outreach i devret pe ganny enkli e antreprann dan nou bann lekol e kominote pou edik nou bann zanfan lo danze en lasante reprodiktiv non proteze, bann konsekans lansentman

anba laz, danze lavortman. Me pli enportan lo bann diferan metod kontraseptiv ki annan a zot laporte. Ki swa dan bann farmasi Gouvernman oubyen prive.

Bann ansenyan i merit osi devlop en relasyon en pti pe pli entim avek zot bann etidyan. I annan bokou zanfan ki pa arive kapab fer en konversasyon avek zot paran. E souvandfwa zot vwar zot pe tourn ver zot ansenyan pou konfirm zot bann problemn.

Mon osi santi ki bann travayer sosyal dan bann distrik i devret osi zwe en rol dan sa demars, an vi ki zot travay i prensipalman avek bann fanmir. I dan zot manda pou donn konsey, sipor ek resours a bann endividi ensi ki lafanmir pou ed zot rezourd zot problemn. Zot osi ganny mandate pou evalye bezwen, sityasyon, pwen for, bann lezot sipor, zot bann kliyan afen ki zot bann bi i kapab ganny determinen.

Lekol i en lenstitisyon par ki zot kapab devlop en sinerzi avek bi pou edik nou bann zenn adolesan lo zot lasante reprodiktiv.

Pou konklir Mr Speaker, mon ti a kontan remersye Komite *HIV/AIDS and Communicable Diseases*, pou sa

bann Mosyon tre valab e enportan ki zot pe anmennen dan nou Lasanble depi semenn pase.

E parey Onorab Adelaide in fer resorti pli boner, tou parti nou lekor i egalman enportan e fodre ki nou aret konsider serten koman en size ki taboo, ki nou pa santi nou konfortab pou koz lo la.

E lasante reprodiktiv ki sen e annord, i demontre ki dimoun i kapab annan en lavi seksyel ki satisfezan. Annan kapasite pou reprodwir e sa laliberte pou deside si, kan e lo ki frekans pou fer li.

Avek sa Mr Speaker, mon pe senserman siport mon sipor pou sa Mosyon. Mersi.

**(APPLAUSE)**

**MR DEPUTY SPEAKER**

Mersi Onorab. Aprezan mon pou donn laparol Onorab Lemiel.

**HON SYLVANNE LEMIEL**

Mersi Mr Speaker. Bonzour tou dimoun ki a lekout. Mr Speaker, sa size ki devan ou, sa Mosyon li menm mon krwar depi bomaten letan Onorab Bistoquet in fer son prezantasyon e lezot mon bann Koleg manm Onorab ki'n koze, zot in fer resorti en kantite

pwen, en kantite keksoz ki pe pase dan nou pti pei Sesel vizavi sa size lansentman anba laz. Kot ou vwar zanfan lekol ki sipoze lo ban lekol pou li ganny son sertifika pou li kapab annan en lanmen travay, ou vwar ki en bon pe zot malerezman pe *involve* dan bann aktivite ki anmenn a en lansentman anba laz.

Ler nou regard sa mo adolesan, *WHO* li menm lo kote lasante, i pe dir ou ki i pe konsider adolesan sa laz 10 a 19an. I pe konsider sa laz. E nou isi Sesel, nou deza annan en Polisi ki an plas, ki loter Mosyon in nonmen dan son lentrodiksyon e sa i apel *Adolescents Sexual and Reproductive Health Policy*. Sa mon krwar ti ganny drafte an Zanvyè 2015 e i ti ganny *edited* ankor an Zilyet 2018.

Mr Speaker, mon pa pou al tous bokou sa bann lezot pwen ki tou mon bann Koleg in fer sorti parey mon'n dir. I bann pwen valab ki merite ganny konsider letan petet nou pou pe fer rekomandasyon avek Minister Lasante.

Mwan mon pou al direktman lo sa Polisi li menm. Sa Polisi li menm depi ler in ganny drafte, in ganny re *edit* an 2018, in ganny revwar en pti pe. Petet mwan mon ti a kontan

konnen ozordi swa atraver Minister Lasante oubyen atraver loter Mosyon menm, petet ou'n travay avek Minister Lasante e pou annan bokou lenformasyon petet osi lo sa size dan ou *summing-up* petet pou ou fer nou konpran eski en evolisyon sa Polisi in ganny fer depi sa dat? Eski nou'n vwar ki sa Polisi li menm ler ti fer ziska ozordi in en Polisi ki efektiv.

Akoz sa Polisi i annan en kantite keksoz ladan, i en Polisi ki ti'n ganny mete pou zot fer sir ki nou adres sa bann *challenges* ki nou, nou'n met devan la ozordi, ki bann zenn zot menm zot ti pe rankontre, se sa ki sa Polisi in fer.

Polisi i ganny fer letan i annan en problem ki *arise* e nou, nou pe fer en Polisi, ou fer Lalwa oubyen, ki pou adres sa bann problem.

So, me eski enn, mon'n demande - in ganny evalye, eski in efektiv, eski in marse? Ki rezilta pozitiv sa Polisi li menm in anmenn. Loter Mosyon pe demande dan son rekomandasyon ki Minister Lasante i revwar sa Polisi. Mon krwar ki wi, i en bon rekomandasyon ki Loter Mosyon pe demande pou revwar. Me dan son revizyon ki i pe fer pou revwar, mwan mon ti a kontan sa detrwa kestyon ki



mon'n demande atraver sa Polisi li menm, ki rezilta pozitiv in anmennen, si in vreman efektiv.

Mr Speaker, dan tou keksoz ki nou fer parfwa, par egzanp la ozordi nou pe *tackle* lansentman anba laz. Nou pe koz sa bann, mon konsider zot koman zanfan mwan. Zot ankor zanfan. Mon pou donn ou legzanp Mr Speaker, mon krwar ou osi ou'n sorti anler dan *Room 3* ozordi, Onorab Samynadin in fer en laranzman pou anmenn son group etidyan isi e i bann zanfan, konmsi i dir 10an an montan?

Mr Speaker, mon'n ganny sans pou al enterakte en pti moman mon osi avek zot, bann zanfan lekol Au Cap. Be mon'n met sa kestyon devan sa bann zanfan. E tou *my surprise*, ki mon'n vreman kontan osi, i annan enn sa zenn fiy, mon demann zot, eski zot in tande ki topik nou pe diskite dan Lasanble ozordi? Enn sa pti fiy, mon krwar i sign Onezime sa pti fiy. I lev son lanmen i dir ek mwan, "wi. Nou'n tande - konmsi zot pe diskite"... , la sakenn in met son bout la. "Zot pe diskite konmsi sa bann zafer seksyel, sa bann zafer tretman." Prezan mon dir *ok*. La mon vin lo sa ki vreman pe diskite.

Mon dir ek zot, mon dir be ki zot panse. Donn mwan zot pwennvi. Ki zot panse lo sa size ki nou pe diskite? Sa pti fiy i lev son lanmen i dir ek mwan. "*Miss* mwan mon pa krwar poudir zanfan nou laz", sirtou li, i dan sa laz 10an 11an..." mon pa krwar " (Akoz adolesan i komans 10an a 19an *WHO* i dir) I dir li i pa krwar ki zanfan son laz, 10, 12an an montan i merit pe ganny *involve*, ditou dan *sex*. E mwan mon dir li felisitasyon, koman en zenn pti fiy.

E pti garson osi. Pti garson i kriye laba li osi i dir, "*Miss* mon pa krwar nou osi nou merit *involve* ladan, aköz nou ankor tro zenn. Sa laz nou annan bokou keksoz ki nou merit pe fer. Nou pa merit al dan sa bann zafer nou!"

I tre byen, me sa i zis sa group etidyan sa la. I zis sa group etidyan sa laz. Me eski tou etidyan sa laz pe mazin menm keksoz? I pa le ka Mr Speaker, pa tou etidyan ki pe mazin menm keksoz. Ozordi dan nou sosyete i annan tro bokou keksoz ki pe enfliyans nou bann zenn zanfan. Aktivite partou ki nou pe fer, nou'n deza ganny blanmen *comme quoi* ou fer aktivite kot sant sosyal, ou vwar - Manman i trenn piti ek li. Manm i al sepa ki kote, piti

pa konnen ki pou fer. Piti i perdi.

En boug i vini i pran piti i al avek. Swa i pran piti i met dan loto i al avek. I annan i dir ou Mr Speaker, manman menm ki a en tre zenn-az i komans trenn son zanfan dan bann lavi parey. Mwan mon pa pou dir wi, mon pa pou dir non. I kapab i annan sa bann keksoz.

Mr Speaker, nou ganny dir ler nou pe desid lo okenn keksoz ki nou fer pou en zanfan, i devret ganny fer *to the best interest of the child*. Ozordi size ki nou pe diskite Mr Speaker, nou tou isi dan sa Lasanble, eski nou krwar *it's for the best interest of the child* 10an a 19an? Wi parey Onorab Adelaide e tou mon bann lezot koleg i dir, i bann pwen. Nou pe diskite la. E mon pou dakor ek zot tou.

Mr Speaker, la deor i annan dimoun ki pe dir, be sa bann zans laba dan Lasanble, napa en pli bon size pou zot koz lo la. Bann sirtou ki pa oule tann ou parle lo la. La bann granmoun pli move, bann granmoun laba pe donn nou en bon pe zafer. I pe dir la, konmsi ki zot pe sey dir. Al donn kontraseptiv manrmay? Napa en pli bon size pou zot diskite. Konmsi mon tann zot, ou konpran?

E relizyez, ki pe dir nou la deor li? Be i pa kapab esper maryaz? Eski 10an, 19an I -? non, i bann pwen ki i fer en sans. Nou isi dan Lasanble, Komite Madanm in zwenn avek bann dimoun sorti kot Minister Lasante, Komite *HIV/AIDS* avek Lasante Reprodiktiv ki'n amenn sa Mosyon ozordi, in zwenn ek Minister Lasante e diferan lezot sekte zot in diskite sa size.

Kot Minister Lasante zot in vini zot in vin vwar nou, i annan serten bann groupman, zot in vini, zot in vin vwar nou. Zot in koz ek nou lo sa size. Be bann Manm Lasanble ki zot kapab fer zot, lo zot kote pou nou adres sa size? Sa size i en size ki Minister Lasante wi ki merit pe revwar. I merit pe regarde. Me i byen nou pe diskite, i a ganny nou *input*, i ganny nou sizesyon. Nou osi ki nou pe dir, si demen i vin ek son Lalwa, nou a konnen poudir petet nou osi nou'n form parti ladan, nou'n amenn en Mosyon, nou'n diskite, in ale, in ale in al revwar son Polisi osi.

So, nou bann zenn ozordi Mr Speaker, sirtou letan ou vwar in ariv sa bann laz 10an la an montan la, sanmenm sa bann letan ki zot pe komans devwal zot bann dezir. Zot lekor i komans devlope. Akoz mon'n get la anler, manrmay

10an pti tete lo lestoman. Konmsi lekor zanfan konmela i devlope e i devlop vitman.

E se sa parfwa ki mwan Mr Speaker, ler nou lo sa size, i annan serten keksoz ki vreman fatig mwan. Ki sa size ki fatig mwan, ou koman sa zonm, ou en papa, ou annan ou fanm dan lakaz ou'n marye, konman ou vwar sa zenn pti tete lo lestoman sa pti fiy i fatig ou? Se zot parfwa sa bann zonm ki estig nou bann zenn fiy. Pa sakouy latet bann Onorab zonm, dir mwan i vre!

Pa tou Onorab zonm ki pe sakouy latet. Me selman, i annan enn mon krwar pe dir mwan non, non pa nou tou, pa vre. Mon dakor ek ou si ou ep dir mon pa nou tou. Akoz mon konnen la dan Lasanble tou sa bann zonm Onorab i responsab.

**(APPLAUSE)**

**HON SYLVANNE LEMIEL**

E mon pa krwar i annan en Manm Onorab zonm la ki koman pou vwar en pti piti 10an, en fiy 19an, 18an menm si byen bel, byen gra parey mwan menm. Konmsi ki pou vini, ki pou vin dir, pa ni pou demann son laz, oubyen kantmenm in demann lis on laz i dir be sa in bon. Konmsi

annou. E li pti fiy deswit, la sirtou si vwar sa boug i annan, ou konnen, en loto, en sepa kisisa. In dir li mon a donn ou.

Ou konnen, zanfan i ganny enfliyanse vitman e i ale. A la ki arive, al tonm ansent ou ankor annan 15an. Sa boug oli li? In trenn ou dan son gro loto, in anmenn ou partou. Oli li? Be i annan son madanm laba, i pa dir ou li. Oubyen ou konnen i annan son madanm, ou kontinyen ou. Ou konpran? I pa pou kit laba pou li vin anmas ou. E i dir ou, fer sir personn pa konnen en? Oubyen i dir ou, mon pou donn ou en pti zafer, tire. I bann keksoz.

Mr Speaker, toultan nou dir, nou Lasanble i en landrwa osi kot nou edik dimoun. Sa i en size pou nou koz lo la, pou nou edik osi nou bann zenn fiy. Anvoy mesaz kler pou nou bann zenn fiy. *It's high time* pou nou bann zenn fiy pran letan. Pran letan dan lavi. Sanson i dir, Marie-Cécile Medor i sante. Madanm Jany De Letourdie osi ki ti enn nou Onorab, li osi i sante. In deza sante la ek nou dan nou Lasanble. "Pran letan pou viv e pran letan pou grandi." E sa i pou mars ek nou tou ziska lafen.

Zanfan ou annan ou letan pou ou zanfan. I annan letan ki ou pou gannyen pou ou vin

adilt. Pran ou letan etidye. Pran ou letan aprofondir ou pou ou kapab ganny ou sertifika. Ozordi sa lemonn kot nou pe ale la i pe koz ou fodre ou annan *Masters, Doctorate*. I pe nepli oule en sertifika. Si ou annan en sertifika i dir ou, be ou al fer dernyen louveraz laba. I difisil pou ou ganny en promosyon, pou ou monte Mr Speaker.

Pran letan nou bann zenn fiy, nou bann zenn garson. I fermal, i terib ler ou vwar lo en telefonn, eska zot sirkile. Zenn fiy ek zenn garson dan *toilet* pe fer *sex*, zot filmen, zot sirkile. Be napa respe pou nou lekor? Akfer ki ou bezwen filmen ou pe fer *sex* dan *toilet*? Eski ou paran ti anvoy lekòl pou fer *sex* dan *toilet*, oubyen i ti anvoy ou lekòl pou al aprann?

Ler nou paran nou la, nou pe diskite, nou pe koze, nou krwar poudir nou piti pe fer sa ki byen lekòl. Nou piti pa pe fer sa ki byen lekòl en ler. Parfwa en ler, oubyen nou oule bat en dimoun, nou oule bat sa *Miss* ler i vini i dir ou, ou piti pe fer tel keksoz. Ou pa oule krwar akòz kot ou, ou piti i bon piti dimoun. Me kot lekòl i en lot piti li, i pe fer *sex* dan kabinen! Be kisisa sa? Nou bezwen annan en serten respe pou nou lekor.

E ou sa garson osi ou pe fer *sex* ek sa fiy, ou a dir met *camera* koumsa, met koumsa. Konmsi la pa vwar byen la, met koumsa. Apre ou a pran ou a sirkile? Be kisisa tousala? Ler ou pe fer sa *sex* dan kabinen, arive ou tonm ansent prezan, sa boug ki pe dir ou met sa telefonn koumsa pou li ganny oubyen, pou li filmen ou byen la, ou pou vwar li ou?

Mon bann koleg in dir la, kote nou al *end up* avek sa bann zanfan? Zot donn manman pou okipe. Be ler ou get sa Mr Speaker, i vin en *trend* sa. Manman i tonm ansent laz 18an, ler son piti i ariv 10an i komans an vi, li osi pou fer *sex*. 14an i tonm ansent. Ou konnen sa i vin en nespes mayon sa? Manman i tonm ansent boner, piti letan i ariv 28an in vin gran manman 2 piti. Or in ganny li 4 piti, tou sa bann piti i ankor piti menm pe fer piti pe anmenn kot li piti pou li sonnyen, li osi i ankor ek en gro vant.

I pe marse ek en gro vant, son premye fiy i anba laz, i ansent. I vin en nespes serk visye sa. Enn ler si nou swiv byen bann fanmir ki'n komans annan sa bann keksoz, ou pou vwar. E se sa ozordi ki letan nou gete, mwan sa bann size koumsa Mr Speaker, i tous

mwan for. I tous mon for sa bann size.

Aprè i annan en keksoz ki ler ou regarde ki'n arive dan nou sosyete ozordi. I annan serten mon bann koleg ki'n nonmen, in dir poudir sa bann size, sa bann keksoz lontan pe arive dan nou bann kominote. Wi, i pa ti bokou li, i pa ti alarman li. I ti annan sa bann zafer. Kouzen pe dormi ek kouzin, lot. Ou konnen ti annan tousala.

Ler msye, en ser, ler i fini ek sa enn i ale i dormi ek lot msye sa lot ser. Aprè ou tande piti ou ser avek lot piti olye vin tonton, vin kouzen kanmarad, zot frer ek ser! Tou sa bann keksoz Mr Speaker, i sorti depi dan nou lansyen sa. Ti annan sa. I ankor annan ozordi. Me nou ki nou pe dir ozordi, i vin pli alarman. Konbyen ler ou pou al get statistik ozordi.

Loter Mosyon in donn en bon pe statistik, konbyen sa bann zenn fiy ki'n *end up* ganny en zanfan. I annan ki'n *end up* fer bann *backstreet abortion*. I annan en bon pe dimoun ki'n ede pou fer sa bann zafer.

*Backstreet abortion*. I annan ki'n mor. I annan ki'n perdi lavi aköz sa. Be nou pa ti pou kontan vwar ankor sa bann keksoz i arive, *ok?* Mon krwar sa size ki nou pe diskite

la ozordi se ki nou pe sey rode ki fason ansanm avek Minister Lasante nou kapab anmenn serten rekour, serten solisyon pou sa problem alarman ki pe deroule la ozordi dan nou sosyete.

Wi parey mon'n dir, nou kapab ganny dir nou pe diskite bann keksoz ki ozordi i annan bann keksoz ki pli fer en sans ki sa, me sa osi i en size ki fer en sans e i annan son plas pou nou kapab diskite li ozordi, pou nou met en lafen avek sa bann problem ki pe arive, kot zanfan anba laz pe tonm ansent boner. Wi nou'n dir selman ou zanfan, i pa en priyorite pou ou al *involve* ou lekor dan sa bann zafer, dan sa bann aktivite.

So, Mr Speaker mon krwar mon'n dir en bon pti pe keksoz. Mon krwar ki mon bann koleg laba i pou le ki mon dir ankor en pe. So, mon krwar mon a les ankor en pe pou mon lot koleg ki'n lev son lanmen laba koze pou li dir ankor en pe li osi. Aköz mon konnen li osi i annan en bon pe pou li vin dir.

So, sa i mon pti *fair share of contribution* pou sa Mosyon Mr Speaker. Mon espere ki avek sa deba tre ris ki'n ganny diskite ozordi, mon esper ki enn;- nou bann zenn fiy e zenn garson. Aköz *mind you*, i annan nou bann zenn garson e sa

bann zonn ki pe abiz nou bann zenn fiy - Wi Onorab pa tou, eskiz mwan - pa tou. Me sa group dimoun - (Pa ankoler bann Onorab zonn), sa group dimoun i konnen lekel li. Konpran?

So, mon espere ki zot osi zot ganny konsyantiz en pti pe lo sa bann size. Akoz i kapab zot osi sa bann dimoun zot annan en fiy zot kot zot. Zot pa pou kontan sa bann keksoz, en lot garson oubyen en lot msye pe fer avek zot fiy. Fer zot fiy ansent anba laz.

So, *therefore* Mr Speaker, atraver ou, mon esper ki Onorab Bistoquet dan ou *reply* parey mon pe dir ou. Mon ti a kontan vreman lo kote nou Polisi, nou vreman konnen kwa ki'n abouti. Ki in abouti nou, ki nou'n kapab gannyen avek. E mwan Mr Speaker, mon en dimoun relizyez wi - me selman parfwa nou bezwen regard keksoz. Nou bezwen get larealite keksoz osi. Parfwa i annan serten desizyon ki nou pran, nou bezwen pran li ler ou pe get larealite.

Avan mon fini, yer mon ti ganny en konversasyon avek en zenn manman, dan son 40an koumsa. Mon demann li, mon dir ki ou panse lo sa Mosyon? Ou, ou annan de pti fiy. Ki ou pou panse, eski ou ti a kontan

petet en Polisi i aranze ki *make available* pilil kontraseptiv, bann keksoz koumsa pou bann zenn fiy ki seksyelman aktiv?

I ti dir ek mwan koumsa, mon pou napa problem ek sa. I dir akoz lemonn ozordi in evolye. E ozordi bann zenn zannfan i rod leksperyans boner. Alors, i dir mwan koman en zenn manman, mwan depi boner mon pe edik mon pti fiy dan lakour. Mon pe fer li konpran parey zot tou zot in dir, lo koz son parti, ki sa i fer, respe pou lezot e tou sa. Mon pe koz ek mon zannfan.

E toulezour mon pe fer li konnen koman son langaz zannfan, mon pe eksplik li lo kote si ou al fer tel keksoz, tel keksoz i pou ariv tel fason. E zannfan osi i annan ki fournen, i demann ou manmi ki mannyer pti baba i vini? Manmi, mannyer i fer sa? Dan ou fason, ou bezwen rod en fason pou kapab eksplik li byen.

Me li sa madanm i ti dir ek mwan poudir mwan mon napa en nosyon pou mon dir mon kont, me sa problem i la, i devan nou laport. Nou bezwen rod en fason pou nou adres li. Menm si i ti dir mwan, mon konnen ki pa tou zannfan ki menm si sa keksoz i a zot laporte, ki zot pou *access* li.

Konmsi ki zot pou oule vin servi li. Ou konpran?

Akoz i annan zenn ki konn pran zot bon prekosyon avek zot lekòr. I pa pou neseserman i pou oule vin *access* sa kontraseptiv. Me par kont kot i konsern egzaminasyon lasante zot lekòr, sa i vremen enportan ki zot ganny akse avek.

Ozordi nou'n tann pikir, ki manner i apele Onorab Bistoquet - HPV? Pikir HPV byen boner, pe komans don nou bann zenn fiy. Sa osi pou protez zot kont bann malad, matris, whatever ki pou arive. Sa i enn ki pou *deal* avek zot lo zot kote reprodiktiv, byen boner, menm si zot pa *sexually active*, me zot pe pran li. I en keksoz ki bon.

Par kont sa bann lezot keksoz osi ki pou regard en pti pe zot lasante reprodiktiv, i bon ki petet mon krwar bann zenn i ganny akse a sa boner, pou ki i prezerv zot kont okenn maladi e an menm tan kontraseptiv e lezot keksoz pou evite ki nou annan bokou sa bann zanfan ki parey Onorab Samynadin, Onorab Desheila Bastienne in nonmen. Nou pran nou donn manman, manman i vin kot sosyal avek. Ou vwar ki sa i vin en nespes zistwar lasenn trennen ki nou pa kapab vwar en solisyon avek.

So, avek sa mon ava dir loter Mosyon mon pou donn ou sipor pou Mosyon e mersi Mr Speaker.

**(APPLAUSE)**

### **MR DEPUTY SPEAKER**

Mersi Onorab. Donk i reste nou zis en dernyen entervenans lo nou lalis avan ki nou antann *Right of Reply*. Laparol i pou *Leader of Government Business*.

### **HON BERNARD GEORGES**

Mersi Mr Speaker. Bonzour Mr Speaker. Bonzour Deputy Clerk. Bonzour tou bann koleg Onorab. Mr Speaker, mersi pou donn mwan laparol pou koz lo en deba ki'n vremen anrisesan e en Mosyon ki mon krwar i ariv a en moman apropiye, parey tou bann dimoun ki'n koze ozordi in fer resorti.

Sa size ki devan nou i en size sansib e mon krwar bokou Manm in fer sorti sa pwen. Me i pa aköz i sansib ki nou pa devret abòrd li. E la mon dakor avek Onorab Lemiel, i nou devwar koman bann *leaders* dan sa pei, pou nou kler tors lo bann keksoz. Nou pa kapab e nou pa devret pe fer krwar ki problem pa egziste, ler problem i regard nou dan nou figir.

E dan sa konteks Mr Speaker, mon ti a kontan anmenn ne gran remersiman pou Onorab Bistoquet ki'n propoz, ki loter sa Mosyon. Me deryer li, pou tou sa Komite ki mon konnen zot in travay ansanm lo sa 2 Mosyon, *including* sa enn ozordi. E mon anvi felisit, lo lapar nou *Caucus* e si ou permet mwan, antan ki Dirizan dan Zafer Gouvernman, lo la par Gouvernman. Mon ti a kontan felisit sa Komite *HIV/AIDS* eksetera, pou travay ki zot in fer.

**(APPLAUSE)**

### **HON BERNARD GEORGES**

Mr Speaker fasil, i fasil pou nou al lo bann Komite ki pe tret bann size en pti pe pli *sexy* parey *Bills*, ouswa Medya. I pa fasil pou asiz lo en Komite ki pe regard lasante reproduktiv, ki pe regard bann maladi parey *VIH* avek *SIDA*. E mon krwar zot annan bokou kouraz sa bann Manm Lasanble ki pa selman manm en Komite, me zot manm en Komite ki travay e ki toultan pe esey rod solisyon pou sa en gro, gro problem lo nou lasosyete.

E nou tou nou rekonnèt ki sa problem promiskirté dan nou pei, avek tou son konsekans ki i vin avek, i en

problem enorm. E donk ankor enn fwa mon anvi ozordi lo lapar nou *Caucus* ek lo lapar Lasanble an antye dir avek sa Komite *bravo*, e zot annan tou nou sipor dan sa travay ki zot pe fer.

Mr Speaker, bokou propozisyon in ganny resorti dan sa deba e sa deba i diferan avek bann lezot deba ki nou'n annan dan Lasanble aköz dan sa enn, preski tou dimoun ki'n koze in annan en propozisyon, ou 2 ou 3. Ou plizyer propozisyon pou met devan, pou amelyor sityasyon. E se sa travay Manm Lasanble.

E se sa ki fer ki nou Lasanble i relevan e ki nou kapab dir avek Lepep Seselwa laba deor nou pa pe zis asize koze, me nou pe fer bann propozisyon. E a lafen mon pti parkour la ozordi, mon pou demann avek Gouvernman ekout sa bann propozisyon ki'n ganny met devan.

Lasanble mon konnen pou fer en sentez sa Mosyon ek tou sa ki'n sorti ladan e pou anvoy kot Gouvernman. Demann avek Gouvernman pran sa bann keksoz an konsiderasyon, aköz napa move lide ki'n sorti la ozordi. Tou sa bann lide se bann bon lide, pou amelyor en sityasyon tris e en sityasyon



grav ki nou pei pe fer fas avek. E sa se sityasyon sosyal.

Si nou pa veye Mr Speaker, si nou pa veye koman en Nasyon e la nou bezwen nou tou, met zefor ansanm, se sa bann problem sosyal ki pou anpes devlopman nou pei. E sa problem sosyal, sa se enn ozordi ki nou pe regarde lo nivo seksyalite pou bann zanfan anba laz.

Mr Speaker, mon ti a kontan partaz avek Lasanble bomaten en seri refleksyon. Me avan mon fer sa, permet mwan donn 3 legzanp ki mwan mon konnen personnelman, pou sitye nou en pti pe dan sa problem sosyal, ki lye avek seksyalite dan nou pei.

Ou ava eskiz mwan Mr Speaker, si mon al en pti pe an deor topik, e pa reste zis lo zanfan anba laz, me regard en pti pe nou bann adilt osi. Preme keksoz ki mon anvi partaze se en zenn *homme* dan mon distrik ki i annan tou son lavi devan li, in ganny kondannen, in al prizon. In antre prizon sen, in pas detrwa lannen prizon e ler in sorti in sorti avek *HIV*, in sorti avek *Hepatitis C*. En lavi detri - en zenn *homme*.

Mr Speaker, sa bann kalite keksoz pa devret arive dan nou pei. Nou pa kapab-

ou konnen ki nou problem. Nou problem se ki nou'n vin telman *immune* avek sa bann keksoz isi Sesel, ki malgre ki nou vwar sa, nou dir *well* ou konpran, ou konnen. In fer son fot, eksetera e nou *shrug it off*.

E mon krwar sa Mosyon pe demann nou ozordi pa *shrug it off*. Annou pa pran *the easy way out* parey Angle i dir. E pou dir, *well* ou konnen in ariv enn, annou fer sir ki i pa ariv ankor e nou pa fer naryen. Sa se enn.

E i annan en kantite konsekans akoz sa dimoun i annan en manman, i annan frer ek ser, i annan zanmi. E zot tou zot pou ganny afekte par lafet ki la se en lavi, akoz pa'n annan proteksyon oubyen akoz sa dimoun li menm li pa'n anvi pran bann proteksyon ki neseler. Pourtan sa Gouvernman ek tou bann Gouvernman avan, in met a dispozisyon dimoun bann proteksyon neseler.

Dezyenm legzanp;- detrwa lannen pas en zenn *homme* i vin vwar mwan, i ti'n ganny sarze akoz i ti'n fer sex avek en fiy anba 15an. Mon dir li ke laz sa fiy ti annan? 14an. Ou ki la ou ti annan, 14an. Sa fiy li pa pe ganny problem li, li i *ok* li. Li i konplenan li. Se sa garson 14an ki pe ganny sarze,

pe ganny prosekite, in amenn Ankour pou li ganny zize. Ou vwar?

E plizyer nou, nou'n dir ozordi. Nou bezwen 2 dimoun pou fer en zanfan. Akoz ki Lalwa ozordi mannyer i ete i egzonor sa fiy e i met tou blanm lo sa garson? La ankor se en keksoz ki fodre i sanze. Akoz i pa byen. I pa byen si nou annan Lartik 27 dan nou Konstitisyon ki dir ki nou tou nou bezwen egal devan Lalwa, nou tou nou bezwen egal devan Lalwa. Swa personn pa ganny pourswiv, swa tou lede in komet en lofans. E sa se bann keksoz ki ankor en realite dan nou pei.

Trwazyenm legzanp, mon'n bat ek en zenn fiy detrwa lannen pase, ki mon'n konnen depi i ti en manmay, en zanfan. E i ti annan apepre 15an, mon vwar li ansent. E mon dir li, mon dir zot! I dir mwan, ou konnen mon'n manke, eksetera. E mon fer menm keksoz avek li ki mon fer toultan, mon dir, tou ou keksoz i a ou dispozisyon. Tou kontraseptiv i la, *condom i free*. "Ah ou konnen, mon'n manke." *Alright fine*.

Apepre 18 mwan pli tar mon monte, mon bat avek li ankor, en lot vant. Mon dir dan tou mon naivte Mr Speaker, dan tou mon naivte mon dir li,

mon dir be sa enn lekel papa? Espekte ki i pou dir mwan menm papa ki mon enn premye, ou konnen ki i dir mwan? Mon napa en lide. Mon pa konnen lekel papa sa zanfan. E sa i en larealite, mon pa pe envante. In sok mwan. In sok mwan akoz i montre ou Mr Speaker.

I montre ou en keksoz ki kouran. I pa zis sa enn zann fiy ki'n pas dan sa sityasyon, oubyen ki'n les son lekor pas dan sa sityasyon. I annan lezot parey, e parey sa in ganny ankor enn ou 2 zanfan.

E dan bokou ka - dan bokou ka sa bann zanfan ki'n ne avek bann manman ki pa'n prepare oubyen ki pa konn papa zot zanfan, sa bann zanfan i al *end up* dan en fwaye, oubyen dan vilaz Prezidan. E se pa en fason pou viv koman en pei modern, koman en pei ki pe lead Lafrik e lemonn dan bokou keksoz ki nou fer.

Mon krwar atraver sa Mosyon, nou bezwen revwar en pti pe lafason ki nou pe viv dan sa pei. E pa zis demann Gouvernman, malgre ki mon pou siport sa Mosyon akoz i byen. Demann Gouvernman pou revwar son Polisi, wi sa i byen.

Me i pa zis sa, nou pa devret zis kay lo Gouvernman

revwar ou Polisi e nou, nou mont kot nou. Tou keksoz i byen, nou'n fini travay. Nou'n demann Gouvernman revwar son Polisi, nou'n vot an faver, *job done, let's move on*. Nou pa devret fer sa.

E nou pa devret fer sa Mr Speaker, akoz? Akoz premyerman nou annan dapre statistik ki Onorab Bistoquet in donn nou bomaten, nou annan annou pa bliye, en *abortion* legal ek en lot lanmwatye *abortion* legal toulezour dan nou pei. Toulezour. Depi le 1 Zanvyè ziska 31 Desanm. Sa i devret en statistik ki devret fer nou per.

Savedir ki, e demann zot lekor sa keston, savedir ki toulezour oubyen ki tou lede zour i annan 3 madanm ki al Lopital pou fer en *abortion* ofisyel, legal akoz swa zot lavi i an danze, lavi zot zanfan i an danze. Zot in ganny rape oubyen zot on fer *incest*. 3 madanm lo tou lede zour. Demann zot lekor, eski sa se en keksoz ki premyerman i akseptab e dezyenman, ki normal? San konte bann ki pa ofisyel.

Mr Speaker, sa problemn kontrasepsyon avek *abortion* la i en problemn delika e bokou dimoun pou ofanse ler nou,

nou pe koz lo la dan en fason ouver, fran e normal.

Ou vwar Mr Speaker, i annan en dilenn ki sa Lasanble i konn tre byen akoz bann nou ki ti la dan Lasanble presedan ler nou ti pe regard *Code Civil*, tanzantan nou ti bezwen fer sa remark, eski Lalwa i devret gid nou sitwayen, oubyen eski Lalwa i devret swiv semen ki sitwayen in pran. E nou ti bezwen fer sa refleksyon ler nou ti deside, eski nou pou les bann koup ki pa'n marye annan menm drwa propriyete ki bann koup ki'n marye? E nou'n deside fer li akoz?

Akoz se sa desizyon ki lamazorite Seselwa in pran. Lalwa i bezwen ankadre zot. E si donk, si donk nou konnen - parey nou konnen ki si ou anpes de dimoun divorce, zot pou zis kite. Ou pa pou kapab fors de dimoun kontan kanmarad e reste avek kanmarad zis akoz ou pa les zot divorce.

Oubyen, oubyen si ou dir ou bezwen marye ler ou annan 18an, parey nou'n dir dan *Code Civil*, nou konnen ki si de dimoun i anvè reste ek kanmarad avan 18an, zot napa drwa marye. Ki zot pou fer? Zot pou zis *move in together*. E si nou konnen, parey nou konnen ki si ou pa permet lavortman e

pa krwar ki mon pe koz an faver lavortman.

Pa sa, pa sa deba ki lo latab ozordi. Sa se en deba Nasyonal ki nou pou bezwen fer a en serten moman pa ozordi. Me nou bezwen osi konsyan ki si nou pa permet lavortman legal, sa ki pou arive se ki bann ki annan larzan pou al Sidafrik. Nou'n aprann bomaten ki Sidafrik i legal. E bann ki napa larzan malerezman pou al, si zot napa ase larzan, zot pou al dan balenn parasol avek lekors zavoka. Si zot annan larzan zot pou al aste pilil avortman R4mil. Nou konnen tousala nou. Nou adilt nou. Nou'n vwar tousala toulezour.

So, i en balans ki nou bezwen fer e sa balans i anmenn mwan lo kontrasepsyon. Si nou konnen ki bokou nou bann zenn fiy pe fer sex avan laz kot zot kapab ganny kontrasepsyon legalman, eski i byen pou nou dir zot non.

Lalwa i a fors zot pa fer sex, aköz zot pa kapab ganny kontrasepsyon, oubyen fer sex san kontrasepsyon avek tou bann risk ki sa i anmenn, aköz Lalwa i dir ki fodre zot ariv 18an.

Se sa bann refleksyon ki nou pe ganny demande pou fer ozordi e i pa en size fasil. Nou tou nou konn repons a tou sa

bann kestyon. Nou adilt nou. Nou viv dan en sosyete ki ouver e ki modern.

E Mr Speaker, en lot keksoz. Ou vwar ler en zenn fiy i ganny en premye zanfan 15an, i ganny en dezyenm zanfan 17an. Ler in ariv 21an i lo katriyenm. Ki lefe ki sa i annan lo alokasyon lakaz. Aköz en sel kou i bezwen en lakaz li, i bezwen en *housing unit* aköz i annan 4 zanfan.

Sa enn ki pe peye depi 15an, pe espere li sa enn ki pa'n montre okenn responsabilite dan son lavi. Minis Rangasamy ti dir nou sa lot zour dan sa Lasanble. Li i pou mont par lao prezan aköz li sosyete i dwa li en lakaz, aköz in mal anmenn son lavi. E donk i bezwen ganny en priyorite lo nivo sosyal.

E Mr Speaker, aköz sa bann problem - aköz sa bann problem Gouvernman in bezwen met an plas en Tribunal ekspre zis pou *deal* ek problem lafanmir. Zis pou *deal* ek bann papa ki fer piti apre zot pa sonnyen. Fer zanfan apre zot pa sonnyen. Annefe sa bann kalite papa nou bezwen dir zot pa fer zanfan, zot fer piti. Aköz si zot ti fer zanfan zot ti ava sonny zot zanfan.

Ou vwar Mr Speaker, kot tousala i tonm lo lasosyete. Lasosyete i bezwen trouv

*welfare*. I bezwen pey en Tribinal avek tou son bann Ziz, bann Mazistra, eksetera ki vin avek. I bezwen tay deryer papa. I bezwen pran sa bann papa anvoy zot prizon zis pou zot pran zot responsabilite. Akoz? Akoz nou en pep ki pa pran son responsabilite. Nou pa pran nou responsabilite ler nou fodre.

Alors ki mannyer tousala pou kapab ganny ankadre par en Gouvernman? E i pa ni en problemm Gouvernman les mwan dir. Par en lasosyete pou fer sir ki nou devlope dan en fason normal e nou pa kontinyen lannen ale, lannen vini viv dan en sitasyon ki ekstraordiner, me ki nou pa anvi konfronte, akoz i en problemm sansib e ler nou konfronte, i annan serten dimoun ki pa pou kontan.

Mr Speaker, parey mon'n dir, bokou propozisyon in ganny met devan. E napa okenn move propozisyon ki'n ganny met devan ozordi. Fodre i annan plis ledikasyon. Fodre bann paran i konn koz avek zot zanfan. I konn abort sa bann size, i konn gid zot bann zanfan. Sa i normal sa. Sa i *ok*. Nou pa pe re envant larou. Sa i bezwen fer.

E dan gran mazorite bann paran i fer sa. Bann lekol i

ankadre, bann *social workers* i fer sa bann keksoz. Me *still* nou annan en problemm. Alor si vedir ki nou bezwen vwar en lot solisyon, akoz sa bann solisyon ki nou annan ozordi pa pe marse, oubyen pa pe mars ase byen.

E Mr Speaker sa ki forse fer, e les mon dir li kler la ozordi, fodre ki Seselwa i sanz son mantalite. Fodre ki nou komans pran nou responsabilite. Fodre ki en paran i bezwen fer sir ki son zanfan i ganny proteze.

Enn nou bann gran problemm se *peer example*. Si ou viv dan en lankadremman, si ou'n grandi dan en lakaz kot ou manman en zour ou vwar li i avek en partner, en lot lannen ou vwar li avek en lot partner, en lot lannen ou vwar li avek. E pa krwar ki i pa arive Mr Speaker. Parey mon dir, nou tou nou viv dan sa sosyete e nou konn nou sosyete, ki mannyer ou espekte ki sa zanfan pou devlope? *Of course* i pou krwar ki sa i byen e i pou swiv. Se *peer education*.

Nou pa kapab, malgre ki mon dakor avek Onorab Vidot, i bezwen Lalwa ganny proteze. I bezwen annan plis ledikasyon. Minister Lafanmir i bezwen *get involve*. Me tousala pa ase. Sa ki fodre *get involve* se bann

paran, bann dimoun ki'n met sa zenn fiy o monn, ki li i pe fer fas avek en problemanm seksyalite avan i ariv laz mazorite.

Alors Mr Speaker, paran i devret *lead* par de keksoz. Ledikasyon, wi. Me aksyon osi. Fodre zot kapab demontre aksyon, bon konportman pou ki zot zanfan i swiv bon konportman. E nou ariv alor a lafen sa deba. E a se nou annan lo en kote tou sa bann sistenm *peer education*, ledikasyon lekol, konportman paran, ledikasyon paran. Tou sa bann keksoz tanzib, si mon kapab dir. Me nou annan lo lot kote, se sa fondamantal sa Mosyon. En keksoz tanzib e sa se proteksyon.

Tousala i byen. Si tou dimoun ti kapab viv dan en lankadreman kot zis zot konnen ki sa ki byen, ki sa ki mal, nou pa ti bezwen annan sa deba. Me zonn ek fanm i fay. Tanzantan nou tonbe, nou napa sipor oubyen, nou napa lefor personnel pou nou reziste.

Alors Gouvernman i bezwen *step in* e met en lankadreman pou protez sa bann zanfan. E sa lankadreman i bezwen vin lo aksesibilite avek proteksyon. Ou pa kapab, si ou an fas avek en sistenm kot ou konnen ki zenn fiy avek zenn garson pou

fer sex anba laz mazorite, ou pa kapab ferm ou lizye e pa regard lafason ki ou Polisi, proteksyon ou Polisi Kontrasepsyon i bezwen ganny *tailored* pou sa bann zanfan. Ou bezwen met sa devan, sansan ou ipokrit si ou pa fer li.

*Of course* sa i devret en *last resort*. Me i devret en *resort* kantmenm. I devret la pou anpes sa bann keksoz ki mon'n fek koz lo la. Pou anpes sa de manrmay *end up* Ankour;- pou anpes sa zenn *homme and up* ek *HIV*. Pou apes sa fiy *end up* avek en premye zanfan 15an avek en dezyenm zanfan ki'n bliye lekel ki'n fer li ansent.

E donk Mr Speaker, Polisi i bezwen ganny revize. E sa ki mwan mon ti ava demande ozordi, se ki sa Polisi ler i ganny revize i fer 2 keksoz;- Premyerman i pran an kont tou sa ki'n ganny dir dan sa Lasanble, akoz i annan bann sizesyon valab ki'n ganny resorti. E dezyenmman avan ki sa Polisi i ganny met an pratik, Gouvernman ler ou'n drafte ou Polisi, retourn devan Lasanble, re met sa bann Polisi devan Komite *HIV/AIDS* eksetera, diskrit avek zot pou fer sir ki Polisi prezan i ganny sipor sa Komite, akoz son bon travay ki in fer. Sa ki mon pe demande ozordi Mr Speaker.

E avek sa de mo, mon ti a kontan renouvle mon remersiman a *mover* Mosyon, a Komite *HIV* e a sa Lasanble pou sa sipor ki nou pou anmennen pou sa Mosyon. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Georges. Nou ava zis demann en pti leskiz *SBC* pou dekalaz dan zot *schedule* program. Me selman nou ava fini ek sa Mosyon pou la. Ki en mannyer letan nou retournen apre midi nou a pran en Mosyon ki nouvo e *fresh*.

So, mon ava donn laparol *mover* Mosyon pou li fer son *Right of Reply*. Onorab Bistoquet.

**HON ROSIE BISTOQUET**

Mersi Mr Speaker. Mr Speaker, mon krwar mon tre zwaye ki mon santi pou tou bann Manm ki'n koze la bomaten. Zot in koz avek zot leker ouver, zot lespri kler. Kot en antite issues in monte lo sa topik e an menm tan en kantite propozisyon ki tre, tre, tre valab e mon pou remersi zot tou pou sa bann kontribye ki zot in anmennen. E mon pou pas en pti pe lo revi ki zot in diskite.

Par egzanp Onorab Aglae, i dir zenn annan plis valer moral pou konnen ki zot anvi fer dan lavi. Annan kontrol pou pa briz zot lavenir. I vre Onorab Aglae, ki osi i *Vice-Chair* nou kominote.

E in dir osi enkli bann garson e angaz zot pou pran zot responsabilite vizavi zot lasante reproduktiv. E an menm tan Onorab Adelaide, mon pa pou al dan sa zafer ki i pa manze. Me selman Onorab Adelaide i dir get sa Mosyon avek en laspe pozitiv, pou annan en desizyon serye. Ki mon krwar i vre.

Koman bann Manm elekte par lepep nou pa pou kapab fer lize lo sa problem ki afekte nou popilasyon. Seksyalite i devret ganny dekriminalize pou redwir *taboo* ki egziste. E in menm dir osi met kad legal pou zenn ki seksyelman aktiv pou akse avek servis reproduktiv baze lo levidans aktyel ki annan.

Onorab Porice osi in dir nou vwar zanfan pe anmenn zanfan ki i pa normal isi Sesel. Paran i devret edik zanfan lo size seksyalite e swivi.

Onorab Vidot in dir nou ki ledikasyon e valer moral i komans dan lakour e touzour dan lakour. Sa size i komans depi sizyenm Lasanble, ki mon tre kontan ki parey in dir. I pa

ti en keksoz ki nou'n tay avek. Ki Lasanble in tay avek. Nou'n pran letan pou reflesir e la dan Setyenm Lasanble ki nou'n kapab anmenn sa de Mosyon. I vedir ti annan en kantite, kantite konsiltasyon ki'n ganny fer e menm Manm Lasanble osi in ganny sans pou zot konn en pe pli aprofondir dan sa topik lasante reproduktiv avek diferan spesyalis mon pou dir, dan Sesel.

Paran ganny en konversasyon avek zot zanfan sirtou bann adolesan lo seksyalite. E Onorab Vidot osi in menm dir, Minister Lasante i devret enn son manda pou akseler sa dyalog pou revwar Polisi Lasante.

Onorab Labonte; Kit nou zenn in dir, byen enformen lo ledikasyon seksyel. *Whereas* Onorab Uranie i dir pa fasil pou en zenn fiy demann konsantman son paran pou kontraseptiv, aköz i seksyelman aktiv. Vre i pa fasil, aköz en kantite nou la nou'n paran, swa nou pe vin paran. E nou'n trouve dan nou komite poudir i pa fasil pou en zenn pou vin dir "Manman, manmi anmenn mwan kot klinik. Mon seksyelman aktiv, mon oule al pran kontraseptiv". I pa fasil ditou.

E Onorab Uranie in menm dir bann zenn fiy ki'n ansent i pa kapab retourn lekòl, aköz i napa sipor. Swa son paran pa pe sipor li. Swa napa personn pou vey son zanfan. Li napa larzan pou pey *daycare*. Alors sa osi i kre en kantite keksoz, en kantite presyon lo sa zenn fiy.

Onorab Bastienne; Sa i en topik tre sansib. Ler en zenn in fini vin en manman. En fwa, de fwa, trwa fwa, i devret ganny akse avek servis kontraseptif, kot nou a swete vwar rediksyon lansentman anba laz dan nou distrik.

I vre Onorab Bastienne, mon konnen i pa fasil pou en manman ki annan en zanfan anba laz, 17an. Nou premye zenn fiy isi Sesel ki ti ganny baba ti aze 10an e i kapab petet in ganny en lot ankor dan 15an e i annan ki'n ganny trwazyenm, i pa ankor arive son 18an. So, ki mannyer nou pou kapab anmenn sa lalit pou nou fer sir ki nou zanfan i reste zanfan until such time ki zot grandi?

Onorab Samynadin; Paran pran letan e fer sir ou okouran ki ou zanfan pe fer. Sa mon krwar paran i devret annan en bon pe swivi. Lansentman anba laz i met bokou presyon lo sa zenn fiy,



paran, kominote, Gouvernman e menm bann fwaye ki nou'n trouve dan Sesel kot bann zanfan zot semi orfelen ouswa orfelen. Laplipar zanfan zot pa orfelen. Zot semi orfelen. Zot paran i annan i la, enn. Be selman i pa kapab *take care* avek zot zanfan.

E fer bann *outreach*, i en keksoz ki Onorab Samynadin in dir. Fer bann *outreach* dan kominote lo lasante reproduktiv. Donn kozri. Zwenn bann pti group dimoun. Swa dan lekòl, swa dan kominote. E an menm tan in dir, Minister Lasante i a kapab met an plas en bon *customer service*, sirtou en servis *user friendly*. *Youth user friendly*, ki zot kapab annan en *one-stop shop* pou tou zot servis ki zot bezwen.

E in menm dir, ansenyan vin pli sansib avek nou bann zanfan kot lekòl. Ki zot kapab rakont zot ki zot pe pas ladan dan lakour ouswa dan kominote. E an menm tan servis sosyal vin pli aktiv e donn sipor nou zenn.

Onorab Lemiel; Tre emosyonnel avek sa topik. Zenn fiy pran letan pou viv, pran letan pou grandi. Tou sa ki nou fer pou nou zanfan i devret *at the best interest of the child* ouswa nou zanfan.

E Onorab Lemiel in demann mwan de kestyon;- enn i konsernan revyè Sa Polisi, i vrey sa Polisi ti ganny drafte an 2015, apre i ti ganny revwar an 2018. Akoz? Se akoz letan nou ti pou *submit* sa *cabinet memorandum* avek *Cabinet of Minister*, sa bann statistik ti'n fini perdi son valè. So, nou ti bezwen refer tou, re *update* li pou nou kapab ganny bon statistik.

E apre ou'n demann mwan en kestyon, ki rezilta in anmennen sa Polisi e si i ti efektiv? Letan nou ti re ganny sa Polisi laprouvasyon, Minister Lasante ti devlop en *communication plan* e sa *communication plan* i ti enkli 12 topik ladan. 12 priyorite sirtou. E sa bann priyorite i pa zis Minister Lasante ki ti pou enplimante, i priyorite ki lezot sektè ti pou enplimante. I ti pou annan 7 lorganizasyon ki ti pou enplimant sa Polisi. I annan Minister Ledikasyon, i annan Medya, Minister Sosyal, Minister Ledikasyon. Ti annan diferan. 7 an tou.

En *communication plan* ti ganny devlope, ti komans travay lo la tou. Nou'n komans enform bann sektè, me a lafen dizour 19 COVID in vini. So sa in ganny poz la e parey ou pe dir, petet la i le moman vi ki

nou annan nouvo statistik avek nouvo defi. Sa i le moman petet nou kapab revwar li, met li annord.

E sa *communication plan* i deza la, zis *update* li si i annan nouvo Lazans ki'n antre ouswa nouvo Minister. Petet sa i a kapab ede, nou a kapab demare.

Me selman i pa vedir ki Minister Lasante avek son travay ki'n ganny fer avek bann diferan resours imen, zot in ganny *train*. E an menm tan en bon pe zenn in ganny akse avek kontraseptiv. Nou ti annan sa *Youth Health Centre* kot in reste donn program, servis pou bann zenn. Me son defi parey nou dir, i annan defwa i annan sa larmonizasyon dan nou Lalwa sirtou kot konsern bann zenn.

Akoz i annan defwa si ou kapab, bann Dokter i napa naryen pou dir ouswa bann ners pa donner. Zot kapab donner, me si i ariv en keksoz avek sa zanfan san konsantman son paran? Meton ou'n donn li en latizann in ganny alerzi avek? Ouswa i annan serten antibyotik, meton in vin parey en lafeksyon. En serten antibyotik in donn li en alerzik *reaction* ki a lafen dizour i al dan en *coma*. So, sa paran

i kapab annan serten kontrent dan sa kote.

So se sa ki nou pe dir, si par egzanp nou revwar sa Polisi, petet re organiz nou, petet dan tou lede kote nou a kapab travay ansanm.

So, sa i plizoumwenn kestyon ki ou'n demande Onorab Lemiel. E bann pwen ki ou ti dir pou konsider, akse avek lenformasyon. Sirtou egzaminasyon lekor. Mon krwar petet dan *PSE* sa pti bout ki petet i devret fer antre, akoz i vre. Pou en dimoun grandi e devlope i bezwen konn tou son parti lekor pou konnen kian manner i fonksyonnen. Ki son normal e ki son abnormal. Si ou konn son normal ou bezwen konn son abnormal.

So, sa mon krwar i en bon size ki ou'n anmennen. Ki manner Lasanble i kapab travay avek Minister Lasante pou kapab rezourd sa bann problem e met en lafen avek zanfan anba laz pe tonm ansent boner? Mon krwar *LGB* osi in antre dan sa pti bout ladan ki mon krwar nou bezwen travay ansanm.

*Age of menarche*; Laplipar nou bann zenn isi Sesel, sirtou bann zenn fiy, mon pe koz lo la. Mon konn bann zenn fiy e bann statistik ki nou'n gannyen, zot

komans vwar zot peryod 8 a 9an.

So, 8 a 9an, letan in ariv li dan son 9an, in fini ganny son pti tete, in byen gonfle la anler - 10an. So, sa mon krwar i bann peryod kot bann zanfan i ganny zot *menarche* en pti pe boner.

Onorab Georges i dir sa i en topik ki byen sansib, nou bezwen kler en tors lo la. I annan bann problemn sosyal lie avek lasante reproduktiv. Epi in demande osi, i napa sa legalite ant dan Lalwa pou tou lede sex parey 15an, en fiy i kapab ganny fer sex. Me selman i pa kapab ganny akse avek kontraseptiv. Me selman bann garson pa'n ganny kouver anba la. Pa'n koz lo la ditou.

In demande pou revwar en pe ki mannyer nou pe viv pou nou sanz nou mantalite anver lasante reproduktiv e menm kree en ankadreman kot nou zenn i ganny akse avek program prevansyon, servis, komodite, tretman, reabilitasyon avek *counselling*, sipor pou met en bon program stratezik, vize ver nou bann zenn e an menm tan petet sa i a ede petet letan nou ava petet enkli li letan nou vwar nou Polisi.

*LGB*, Onorab Georges in dir nou osi eski Lalwa i devret swiv nou sitwayen ou nou

sitwayen i devret swiv Lalwa pou redwir lansentman anba laz, redwir lavortman pou Sesel kontribye e ogmant son endikater lasante reproduktiv e asire ki Sesel i annan en meyer lasante liniversel pou tou Seselwa e realiz nou devlopman soutenab par lannen 2030. Mersi Mr Speaker.

**(APPLAUSE)**

### **MR DEPUTY SPEAKER**

Mersi Onorab Bistoquet. Mon krwar nou'n byen debat depi bomaten. E donk in ariv ler aprezan pou nou pran en vot lo Mosyon prezante par Onorab Bistoquet. Tou bann Manm ki an faver endike silvouple? Mersi. Okenn Manm ki kont?

Mosyon prezante par Onorab Bistoquet ki lir koumsa;-

Lasanble i demande ki Gouvernman atraver Minister Lasante i revwar s on Polisi e met an plas en kad legal anver akse ek bann metod kontraseptiv e lezot servis lasante reproduktiv pou bann zenn anba 18an ki aktiv seksyelman avek bi,

- a) Redwir lansentman anba laz, e osi
- b) Redwir bann risk lenfeksyon e lezot

maladi asosye avek sistenm reproduktiv.

I annan 24 Manm ki vot an faver, napa ki'n vot kont e napa ki'n abstenir. Donk sa Mosyon in pase par linanimite.

**(APPLAUSE)**

**MR DEPUTY SPEAKER**

Nou pou aprezan *adjourn*. I annan ABC 1.15 e nou pou rebran travay Lasanble 2er edmi. Mersi.

**(BREAK)**

**MR DEPUTY SPEAKER**

Bonn apre midi tou Manm Onorab. Byenveni pou nou sesyon apre midi. Nou annan en lot Mosyon prezante par Onorab Waven William. Donk mon ava envit li pou prezant sa Mosyon. Nou ava segonde apre ou ava fer ou entervansyon. Mersi.

**HON WAVEN WILLIAM**

Mersi Mr Speaker. Bonn apre midi tou dimoun ki a lekout. Mr Speaker, Mosyon ki mon pe anmennen i lir *comme* swivan;

An vi kanpany e demann pou koup plis pye dibwa otour pei, sa Lasanble i demann Gouvernman, pou entrodwir en plan rebwazman e

mentenans nou bann lafore. Mersi.

**MR DEPUTY SPEAKER**

Mersi. Lekel Manm ki pou segonn Mosyon. Onorab Roucou.

**HON MICHEL ROUCOU**

Bonn apre midi Mr Speaker. Mon annan gran loner pou mwan segonn sa Mosyon anmennen par Onorab William. Mersi.

**MR DEPUTY SPEAKER**

Mersi Onorab. Donk mon ava envit Onorab William pou fer son prezantasyon.

**HON WAVEN WILLIAM**

Mr Speaker, sa ki mon ganny trouve pe vin konverti serten dan Lasanble par lev non Bondye anler isi dan sa lasal. Mon pou kontinyen fer li toulezour e mon pou sezi sa lokazyon ankor ozordi pou remerci nou Bondye Tou Pwisan pou son faver e lagras lo nou pei e nou pep.

Mr Speaker, mon osi remerci li pou sa pei beni e sa lanvironnman e ekosistenm inik. Mr Speaker, Mosyon i tonm byen pandan ki globalman bann pei pe prepare pou Sa gran *meeting* ki annan pou fer ek sanzman klima, i nou

apel COP27 e bann aksyon e sipor ki bezwen ganny pran e trouve pou anpes lesofman later dan en fason soutenab.

Mr Speaker, mon osi anvi fer konnen ki le 12 Oktob dan 145enm Lasanble Zeneral, Linyon Enter-Parlmanter, Komite Devlopman Soutenab in debat lo en rezolisyon anba tenm “Zefor Parlmanter ver target balans negativ karbonn nou lafore”.

Kot mon ti dir ki mon pou siporte pouse ki bann Lalwa Konservasyon e Proteksyon i ganny respekte. Ki mon pou siport bann zefor e kanpany pou rebwazman e management nou ekosistem.

Mr Speaker, Sesel i annan plis sirfas anba konservasyon ki en kantite later ki i annan. Plis ki 50 poursan Mr Speaker. Bokou travay in ganny fer e ankor pe fer pou protez nou lanvironnman ki enkli nou fore.

I annan en divizyon ki okip konservasyon nou bann biodiversite e *management* ki seksyon lafore i tonm avek.

Mr Speaker, konpare avek sa ki nou ti konnen lontan ki pe ganny pratike par departman lafore sa letan. Ozordi i pa sitan vizib sa aktivite rebwazman e ladministrasyon nou fore.

Levidans konkret ki vizib ozordi se lanvaisman nou fore

apre bann lalyann ki ganny regarde koman en move eleman dan konservasyon nou leko sistenm dan en fason soutenab. Bann pye albizya ki nou’n les grandi lo lateras e dan bor ouswa dan larivyer. E mank swivi e pou plant bann nouvo plan ki pous pli ba.

Mr Speaker, pou tou manm ki onnet ek zot menm e bann ki pli aze, zot pou dakor avek mwan diferans ki annan ek s aki nou ti konnen e trouve lontan. Ozordi ek dinamiz devlopman keksoz i nepli parey.

Letan Mosyon pe dir kanpany e demann pou koup plis pye dibwa, i annan pou fer ek devlopman lenfrastruktir tel parey semenn, lakaz, devlopman lagrikiltir parmi lezot. Netwayaz bann laliny telekominikasyon, fasilite pasaz pli gro transpor lo larout, dan lakominote kontra netwayaz enkli bann aksyon iresponsab serten sitwayen ki zis pa get pli lwen ki zot bout nennen.

Ki ozordi Mr Speaker, olye servi en golet ouswa lesel pou kas fri, zot bezwen koup sa pye dibwa ki’n pran *des années* pou matir e prodwir son bann fri. Par lefe ki ozordi napa travayer fore ki pe netway fore nou bann fore, vwazinaz i sibir bokou labi, pert e *neglect*.

Mr Speaker, alors se dan sa direksyon ki Mosyon pe demann Gouvernman pou entrodwi en plan rebwazman e ladministrasyon ki kler e kapab ganny mezire anyel lo son progre.

Pou asire ki nou vreman prezerv e konserv nou verdir, fore ki osi kontribye ver atir viziter e etranze pou vin admire, apresye e respir sa ler natirel nu group zil inik. Konmsi santer Joe Samy, "respir sa ler laliberte."

Mr Speaker, semenn pase, mon ti tous lo sa size *agroforestry* dan konteks ogmante rezilyans ver asir en nivo sekirite alimanter e souvrennte manze dan nou pei. Mon okouran ki Departman Lagrikiltir e Lanvironnman pe koze pou ganny plis kare later dan lafore, kominote pou promot s asize *agroforestry*.

Mon'n ganny dir ki deza dan rezyon Montaigne Posée, Anse Boileau, 10 kare later in ganny idantifye pou met a dispozisyon antreprenner ki enterese pou lans dan sa sekter.

Mr Speaker, i sa direksyon ki Sesel i bezwen ale si i anvi maksimiz itilizasyon son teren pou kreasyon plis larises e lanplwa, par entegre plantasyon fri, legim, zepis,

plan medisinal e pa oubliy nou friyapen ek pye koko Mr Speaker.

Mr Speaker, nou bann gran paran in touzour dir nou ki "sa ki nou tap ek koudpye nou pou anmas ek labous." Se dan sa loptik ki ozordi koko ek friyapen pe vin bann msye. Pe trouv son lenportans dan nou lavi toulezour.

Mon tann koz lo en demars pou fer en evalyasyon lo lakantite pye friyapen ki annan dan pei. Sa i bon Mr Speaker. ki fer ou kestyonn stratezi pou asire ki koko, friyapen parmi lezot pa disparet, me ki prodiksyon ouswa en kanpanny plante dan kominote kot sa ki annan lespas, zot ganny bann plan pou plante parmi lezot plan.

Mr Speaker, ozordi lo en plan mondyal, resers syantifik lo plizyer lespes plan , ozordi bann santiyon pe ganny retire, rafinen e ganny donnen valer azoute pou plis benefis larzan.

Mr Speaker, plizyer lakonpanyen miltilateral ozordi pe aste plizyer sa bann prodwi e pe fer bilyon lo la. Akoz ki pti Sesel li osi pa kapab dekouver serten sa bann demann pou ankouraz Seselwa ki anvi pran risk antre e delivre dan sa sekter? Konvansyonnel oparavan sete patsouli, kopra,

delwil koko, kannel e lavannir. Ozordi Mr Speaker nou pe koz lo bred mouroum, parmi lezot ki bokou larzan pe ganny fer lo la atraver lemonn.

Mr Speaker, serten nou bann artizan ozordi i bezwen fer vini materyo brit sorti deor pou zot kapab sirviv, akoz dan nou fore ozordi, par egzant parey rafya, pe vin en problem pou zot e zot bezwen enporte. Ki fer mon rapel en letan kot mon ti anmenn en Mosyon lo sa plantasyon rafya. Pou serten zot ti vwar li en pti pe drol. Me pou bann artizan deor, zot ti kontan akoz zot ti konnen ki problem ki zot pe fer fas avek *overexploitation* e akoz napa en plan pou re plant sa bann plan rafya.

Mr Speaker, ou a dakor ek mwan ki letan ou'n sorti en misyon ouswa vakans aletranze pou detrwa zour, ouswa plis ki en semenn, letan ou pe retournen e avyon pe desann pou apoze, sa verdir, sirtou apre en pti lapli, i anmenn en lazwa e en lakey enkrwayab zis pou admir sa kado ki nou kreater in donn nou.

Mon panse ki sa i osi eksit bann viziter etranze pou apresye kouler nou delo lakot ek melanz ek kouler sa verdir. Pou eksperyans sa metiz Kreol Seselwa.

Alors Mr Speaker, ver sa portre ki mon'n penn an fas ek kwa ki kapab arive, si nou pa pran konsyans nou bann aksyon ki kapab osi kout nou ser. Mon pou fer sa bann rekomandasyon swivan;-

Premyerman, ki Minister konsernen ansanm ek bann lezot Lazans Gouvernman kle, zot antreprann en legzersis evalyasyon ek *stocktaking* sitasyon nou fore pou etabli fe e realite nou fore. Pou en plan amenazman pli fonde lo nou lavenir.

Dezyenmman, ki en konsiltasyon zeneral dan tou kominote i ganny fer pou anbelir stratezi Minister konsernen. An aplikasyon ki kominote i vin pli konsyan pou pran rol gardyen e *ownership* sa kanpanny e demars, pou pli byen okip nou fore, nou lakot e nou montanny.

Trwazyenmman, ki sipor teknik e ledikasyon kontinyel lo meyer pratik e norm enternasyonal i ganny donner e tou bann lekol. Swa ki annan klib lanvironnman ouswa non, pou adopte en stil lavi e konportman ki pli konvenab anver proteksyon nou lanvironnman.

Katriyenmman, ki le neser i ganny fer pou elimin bann lalyann e lezot lespes

anvaisan an konzwent ek en program rebwazman pou minimiz gravite lerozyon.

Senkyenmman, ki en kanpanny rebwazman e koupir pye dibwa dan bann rezyon ki sansib, i ganny fer an konzwent tel parey La Misère, rezyon kot lekol Otelyer parmi lezot landrwa, pou anpes en dezans ki kapab kout lavi ouswa andomaz propriyete.

Sizyenmman Mr Speaker, ki enn fwa pour tou sa prosesis pou koup ouswa tay en pye dibwa danzere, ouswa ki pe koz en nwizans i vin dan en *one-stop shop approach* i ganny etabli. Annou nivle sa pti din later dan plas vwar en montanny pou retir en danze. Linaksyon i kapab kout nou ser Mr Speaker.

Setyenmman, ki Lazans konsernen pa dekouraz investiser ki anvi ede pou koup pye dibwa e netway fore kot i pa demann larzan. Dan plas dir li non, donn li gidans e siperviz li pou li fer sa travay byen.

Wityenmman Mr Speaker, ki Gouvernman i osi annan en dyalog fran ek bann Lorganizasyon Non Gouvernmental ki fason ki zot kapab travay ansanm ek Gouvernman lo en plan nasyonal. Kot olye dan bann proze *silo*, nou adopte detrwa

proze nasyonal pou donn latansyon ki rezilta ava vin pli konsekansan.

Nevyenm, ki *Planning Authority* a tou pri, kot teren i favorab pou lerozyon zot enkorpor dan Lalwa sa eleman rebwazman ouswa plant serten nonm pye dibwa par lakaz e vilaz, dan en dele letan rezonnab kot i posib.

Mr Speaker, dizyenm, ki sektor prive, ki propriyeter e Leta an partenarya, zot devlop serten mekanizm finansman anver plan zesyon nou fore, lakot e montanny, san ki sa size i vin zis en zafer Gouvernman tousel, kan se Sesel e Seselwa ki pou benefisye lo son retonbe.

11, Mon demann Departman Lanvironnman pou degaze ek sa novo Prozedlwa pou manage nou fore. Sa Lasanble i ava donn son sipor letan sa Prozedlwa i arive. E mon demande osi ki sa size en *White Paper stage* i osi ganny konsider Mr Speaker.

Douzyenmman, ki sa nouvo Komite Sekirite Alimenter e Devlopman Soutenab ki'n ganny kree dan Lasanble, i pran sa size koman enn zot travay pou swivre enplimantasyon plan stratezik administre nou fore, parmi lezot konsern.



Mr Speaker, an terminan mon pou demann gidans Bondye Tou Pwisan pou diriz nou lo sa deba, tenir kont ki Bondye in donn nou en lanvironnman sen pou viv e nourri lo la. In donn nou zonnm konesans pou gardyen e soutenir sa ki in donn nou, pou rezouir me pa pou detri. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab. Lekel Manm ki pou entervenir? Onorab Roucou ou ki ti segonde, mon donn ou laparol.

**HON MICHEL ROUCOU**

Mersi Mr Speaker. Bonn apre mdi a tous e bonn apre midi spesyal bann dimoun ki pe anmenn sa kanpany ki Sesel li menm li, nou kapab kontinyen pou plant bokou pye dibwa. Ki nou a kapab kontinyen ganny sa bon ler ki ler touris i kit zot pei pou zot vin isi, pou zot vin admir nou labote.

Mr Speaker, mwan osi mon pou donn laglwar Bondye akoz nou en pep ki vreman sanse. Kot nou'n ganny beni avek en zoli pei; kot son lanatir i vre li menm li e parey bann resers ki'n ganny montre, se ki ler ou viv dan en pei ki son

labote i ver, sa i bon pou lasante osi tou, espesyalman pou ou lizye.

Mr Speaker, mwan mon pou vin devan pou mon kapab dir de pti mo lo la, mon pa pou tro long. Me selman mon pou partaz en pti pe bann pti resers ki mon'n kapab fer. Annefe i annan en kanpany ki ti'n komans epou plan apepre 500 pye dibwa dan bann lafore, espesyalman bann landrwa ki'n ganny andomaze swa ek dife, swa avek sanzman klima li menm li. Kot sa ti pe fer par en group volonter, kot zot ti pe targete pou zot kapab fer li dan bann, pou apepre dan 5an kot la zot avan kapab plant zot apepre en 50mil pye dibwa.

Sesel li menm li letan ou pou marse, bokou nou, nou pou vwar se ki nou viv nou dan en pei kot dan lanatir, bokou bann plant ki ou kapab dir, nou bann gran paran in servi dan lepase pou medisinal. E nou vwar si nou, nou a vin devan pou nou kapab protez sa labote ki nou annan, nou menm nou, nou pou perdi li. Akoz souvandfwa imen li menm li ki ede pou nou detri bann keksoz ki annan bokou valer.

Kwa ki fer mon dir sa Mr Speaker? Nou vwar avek devlopman bokou lakaz, espesyalman dan bann

montanny, souvandfwa nou tant pou destabiliz lanatir ki mannyer i ete akoz nou vwar kot nou bezwen kraze, menm koup bokou pye dibwa. E apre sa nou pa ale pou nou re plante, pou nou donn lanmen pou nou, ou kapab dir re organiz nou labote li menm li.

Onorab William in dir se ki osi ler nou pe koz lo kote pou plant bokou pye dibwa, nou bezwen mazine poudir i annan bann lalyann anvaisan. Mwan dan mon distrik mon annan en bout ki tanzantan ler nou pase, nou zwenn ek bann dimoun, nou vwar poudir i annan sa bout kot i demande pou lanvironnman li menm li, ouswa pou bann dimoun volonter pou zot monte, pou nou rod en solisyon pou sa zafer lalyann anvaisan.

E ler ou pe get outou dan lemonn osi espesyalman dan Lafrik Mr Speaker, pli gran landrwa kot ou kapab dir kot i annan pli gran lafore, ler mwan mon'n kapab gete i Demokratik Kongo laba, kot zot annan zot apepre en 126 milyon bann dibwa dan sa lafore, ki sa i montre ou poudir se ki lemonn i konsyan valer ki ler ou annan ou lafore, kot ou protez li menm, espesyalman bann pye dibwa ki ede pou li kapab ede

pou *clear* ler li menm li e imen i depan bokou lo la.

Akoz osi ki mon panse se ki nou bezwen nou bann pye dibwa, Mr Speaker nou bezwen kontinyen plante. Sa osi tou pou ede pou bann lespes, ou kapab dir nou bann lanatir li menm li, kot sa i ava ede li menm li akoz avek *COVID* in montre nou en gran leson i nou bezwen sov nou lanatir Mr Speaker.

E dan bann lekol li menm li, i annan bokou promosyon, li menm li kanpany ki pe ganny fer ki bann zenn ki mannyer pou apresye, demen sa lot zenerasyon mannyer pou apresye, pou ede pou zot plante, espesyalman bann pye dibwa.

E mwan Mr Speaker, mon pa en dimoun ki dan bann zafer plante, me selman mon reste dan en landrwa kot ou kapab dir i annan sa bokou laverdir li menm li, souvandfwa nou vwar bokou dimoun i vini sorti lwen pou zot servi sa pti landrwa pou zot vin fer legzersis. Ki sa i vremen ede akoz i vin parey en terapi osi tou pou ou.

E mwan mon panse se ki nou bezwen anmenn plis kanpany lo la, bokou nou, nou bezwen plis ankor pou nou groupe Mr Speaker, pou nou ede. Apre osi nou bezwen

kontinyen edik nou pep. Akoz ek devlopman parey mon'n dir lo komansman e ki *once* ki nou pe fer bann devlopman konstriksyon e nou pa re ale pou nou kapab rod en fason pou nou ranplas bann pye dibwa ki nou'n koupe.

Nou konnen poudir se ki i ansan bann pye dibwa ki petet i en menas pou bann lenfrastruktir, me selman nou kapab osi rod bann opsyon, kot petet nou kapab dan plas koup li net, swa debrans li, kot sa i a kapab ede li menm li. Akoz bokou etranze Mr Speaker, letan zot vin isi Sesel, toultan zot dir ou zot vin *enjoy* sa labote ki nou, nou annan.

E en lot keksoz ankor ki mon panse se ki nou bezwen fer tre atansyon lo la, se ki nou pye koko. Nou vwar poudir bann pye koko zot ganny koupe souvandfwa e menm pres pou nou aret vwar Mr Speaker. nou bezwen li osi tou fer sir poudir nou protez li, akoz parey zot konnen, pye koko li menm li i donn nou bon delwil ki nou kapab servi dan nenport ki fason an term dan lepase bann madanm ti servi swa pou labote menm. E nou, nou bezwen protez li Mr Speaker.

Nou bezwen annefe edik plis ankor nou pep e petet anmenn sa kanpany en pti pe

plis lo medya, kot nou kapab eksplik bann dimoun plis ankor ki mannyer pou kapab ede e ki benefis plante sa i kapab anmennen.

Mr Speaker, mon osi mon pou donn sipor sa Mosyon avek sa detrwa mo ki mon'n kapab partaze dan sa pti resers ki mon'n kapab fer akoz mon santi poudir i enportan Mr Speaker. I enportan.

En fwa mon ti pe get en dokimanter, mon ti tann bokou bann gran zournalis pe koz lo la en pti pe, ki mannyer li menm li menm li nou pe ede pou nou kapab detri lemonn avek sanzman klima ki pe arive. E mon swete poudir se ki sa Mosyon li menm li i kapab vin en, ou kapab dir en sipor pou bann volonter la deor ki tanzantan zot pe donn zot letan pou zot kapab ale al plante bann landrwa, espesyalman lo bann montan li menm li pou ede kit sa lonbraz li menm li.

Mr Speaker, mwan mon pou donn mon sipor, mon dir mersi. Mon dir mersi Bondye li menm li pou ki'n donn nou sa zoli pei e i a donn zonm sa lasazes pou nou kapab vin pli smart ki mannyer nou pou kapab ede pou kontinyen anbelir nou bann zil. Mersi.

**(APPLAUSE)**

**MR DEPUTY SPEAKER**

Mersi Onorab Roucou. Mon a pas laparol avek Onorab Loze.

**HON JOHAN LOZE**

Mersi Mr Speaker. Mr Speaker. Mon pou komans dan en fason ki petet i ava *sound* en pe drol. Be, mwan mon pou komanse mon anvi dir, Sesel nou en pei ki ganny pini! Kot tou mon bann koleg pe dir Sesel en pei ki ganny beni, mon pou dir Sesel nou en pei ki ganny pini. E nou ganny bokou pini.

Letan mon dir nou ganny pini, nou ganny pini prensipalman aköz nou bann bon zanfan. Koman en pei, nou en pei *bonne enfant*. Nou pa ganny pini aköz nou fer move. Nou pa ganny pini aköz nou move zanfan, me nou ganny pini aköz nou en pei *bonne enfant*.

Nou ganny pini letan zot get nou Lendeks Devlopman Sosyal ki tre o. Zot dir be bon, annou al a kote. Nou al ed enn son vwazen ki son lendeks devlopman i pli ba. Letan zot get Sesel koman en *high income country*, sa osi i servi pou pini nou. E tandis ki lezot ki pa pe *gêre* zot lekonomi, ki pa pe *gêre* zot finans osi byen ki nou, zot, zot benefisyè.

Sesel i en pei ki en gran parti son teritwar i deza anba proteksyon. E sa osi i defavoriz nou dan konteks sa deba ki nou pe anmennen ozordi. Letan ou get bann keksoz parey bann *projet* parey *carbon sequestration*. *Carbon capital*. Pou ou ganny en akse normalman avek *carbon capital*, ou bezwen pe koz en *projet* reforestasyon.

Mon krwar ki zot dir *minimum* 12 ektar later. E Sesel nou napa sa kantite reforestasyon pou nou fer. Nou senpleman napa aköz nou'n en pei ki'n fer konservasyon pandan tou sa lannen ki sa bann lezot pei ki annan li 12 ektar later, pou li fer reforestasyon, ti pe detrir se li. Nou, nou napa.

Par kont sa ki nou annan pou fer, se letan nou pe koz reforestasyon, nou annan konservasyon pou nou fer, wi. Nou bezwen fer konservasyon. E nou bezwen fer reforestasyon nou bann plan natif. Nou bann plan andemik. Nou bann plan lokal.

Be, Mosyon in sit en tout en lalis keksoz ki Gouvernman i a fer, i kapab fer, i devret pe fer. E mon agree avek loter Mosyon. Be mon ti a kontan azout en keksoz pou mwan, koman mon kontribisyon. Mon

krwar ki Gouvernman i devret pe sers sours finansman. I annan en ta larzan. En kantite larzan.

Sa lannen, sa, i annan en lorganizasyon non Gouvernmental Lanmerik - Langleter (*sorry*), *United Kingdom*, ki apel *Bankers without Boundaries*, in *estimate* ki kou reforestasyon global total i pou ariv a \$2.6trilyon Dolar Ameriken. E i deza annan en kantite *carbon financing* ki *available throughout the world*. Ou annan ou bann lorganizasyon parey *World Wildlife Fund* ki deza pe donn bann *grants* pou *reforestation*. Kot ou kapab akse *up to \$15mil*, \$12mil, \$15mil, pour en par proze.

E Sesel mon krwar sa ki nou bezwen petet se en *form* kordinasyon kot Gouvernman i a kapab fasilite resers. Fasilite bann diferan lorganizasyon pou *put up zot projet*, pou *bid* pou kapital. Si zot kapab ganny zot kapital. E pou zot ale fer sa bann diferan proze ki annan pou ganny fer.

E mon pa pou antre dan detay bann proze. Mon asire bann lezot Manm ki'n koze. Ki probableman pou koze, i pli byen verse e pli byen doue ki mon pou koz lo la.

Be sa ki mon santi nou kapab fer, Mosyon lo reforestasyon, konservasyon, i pa limite zis avek plant pye dibwa li. I annan en laspe sosyoekonomik enportan ki nou kapab *tap into* pou akseler devlopman nou pei, be pou osi adres en kantite *social issues* dan pei ozordi.

Si kapital i kapab ganny anmennen, i kapab ganny antre dan pei, *hard currency* ki pa larzan Gouvernman. Pa larises ki nou pe *generate* nou menm, i ganny anmennen dan pei pou fer sa bann *projet*. I kapab ede pou al tir manrmay lo *ghetto*. Ki zot, zot anvi fer travay zournalye, ki anvi ganny peye lazournen. E pou annan larzan *hard currency* pou pey zot pou sa bann lorganizasyon. E larzan ki avan vini atraver bann *projet*, atraver bann *grants*.

E si nou sey en *maximum* zefor pou ganny akse avek kapital. Mon krwar sa i a kapab menm *lead* to en revolisyon sosyoekonomik, dan lafason ki nou fer sa bann keksoz, isi dan sa pei.

E la kot i ava menm *enchaine* sa proze kannel ki mon war zot, zot in vin avek. Be i paret mwan ki'n ganny en probleman masin, pa'n *start*. Akoz Minis ler ti vini ti poz de kestyon kannel, i ti reponn lo

lavannir. Be *as part of a greater project of* konservasyon e rebwazman, reaforestasyon, mon krwar sa zafer kannel. Si deza annan larzan pou fer bann lezot proze. Nou deza pe an menaz nou lafore.

E si nou pou *move in permanently* pou nou okip lafore parey loter Mosyon pe swete, mon krwar sa zafer kannel i a marse mwan. Be *as part of a greater project, of a greater vision*. Pa zis sa kannel li menm lo li tousel, kot li i bezwen *struggle* koman en pti mikro konponan lo li menm. Be si i annan larzan ki'n vini pou fer sa bann proze lo en leta pli larz, mon krwar kannel osi i ava pase.

E mwan mon sipor pou sa Mosyon i vin dan sa sans kot nou bezwen *aim higher, reach for better* pou nou pei. E mon annan lartik devan mwan la, kot mon pa anvi antre dan son bann detay, kot i dekri bann finansman enternasyonal, ki annan pou bann *projet* reforestasyon dan bann pei.

I annan nou pou *locked out of* akoz, i annan enn mon war tre enteresan la, be selman i zis pou bann pei kontinan Ameriken. Be i annan en kantite finansman *still*. E mwan mon senserman swete se sa direksyon ki nou kapab al

ladan. E si nou kapab fer li, i pou bon pou nou pei. I pou bon pou nou tou. E se la mon krwar ki i a donn en valer vreman, sa ki Onorab William pe swete pou vwar.

E an terminan Mr Speaker, *just as an aside* - Onorab William in koz nou COP27. Onorab, be zot in fek dan en *motorcade*. Ki mannyer i ale avek COP sa e nou *carbon credits* koman en pei? Mersi Mr Speaker.

### **MR DEPUTY SPEAKER**

Mersi Onorab. Prosen entervenans Onorab Georges.

### **HON BERNARD GEORGES**

Mersi Mr Speaker. Bonn apremidi Mr Speaker. Bonn apremidi tou bann koleg Onorab e tou dimoun ki pe swiv nou.

Mr Speaker, mon pran laparol apremidi akoz, kekfw bokou dimoun pa pou konnen. Me mon annan en serten koneksyon avek lafore. E sa i vin dan plizyer fason. *In fact*, enn bann keksoz ki mon ti anvi vini, apre mon'n pran en lot brans pou mwan al travay ladan, me mon ti toultan enterese pou mwan vin en botanis. Sa, e mon ankor annan ziska ozordi en gran lanmour

pou tou keksoz ki annan pou fer avek botanik.

E kekfwa sa in vin aköz mon granpapa, lo kote mon papa, ti en forestye. I ti en boug ki ti plant lafore. Malerezman i pa'n plant lafore isi Sesel. Aköz pou bann rezon ekonomik dan bann lannen 30, i ti al rod lavi *Kenya*. E mon rapel, mon rapel dan bann lannen 1970, ler nou ti al vizit sa landrwa kot i ti reste, nou ti vwar ankor bann gran plantasyon lafore. Ki li i ti'n plante. Ti annan son non la konman en *forester*.

Epi, pa telman lontan pase, mon ti ganny demande par, mon pa rapel prezan si *UNEP* oubyen si *SADC*. Mon krwar i plito *SADC* pou fer en lenvanter Legal lo tou sa bann Lalwa isi Sesel ki annan pou fer avek *forestry*. E zot ti pe fer sa lo en pli gran nivo. Mwan mon ti ganny demande pou *focus* lo Sesel.

E mon ti dir, be sa i en pti travay ase fasil aköz mon krwar pa nou annan bokou Lalwa *wrong*. Nou annan en kantite Lalwa ki tous lafore dan nou pei. Kantite. Menm bann ki ou pa pou krwar i annan pou fer avek, *Penal Code* par egzanp. I annan serten lartik ladan, serten seksyon ki koz lo lafore. Bann lofans ki ou kapab komet

ler ou met dife dan en lafore *or whatever*.

En kantite, en kantite. Se pa zis en seksyon, en keksoz ki annan pou fer avek lanvironnman. Me lafore i annan en bokou pli gran lanpller ozordi. I annan en lanpller *carbon capture*. Sa i kler. Mon pa pou koz lo la ozordi. Lezot in, lezot in fer sa pwen.

Me mon kontan ki Onorab, Onorab William in anmenn sa Mosyon. Aköz sa Mosyon i en Mosyon apropiye. I en Mosyon parey Mosyon bomaten, i en Mosyon ki fer nou reflexir en pe. Aköz enn bann keksoz Mr Speaker, ki nou en pei beni oubyen ki nou en pei ki pa beni, nou en pei ki ver. E enn bann gran problem ler ou antoure avek labote, laverdir ek lanatir, se ki ou nepli war. Ou pran li for *granted*.

E nou vwar nou, toulezour. Si nou asize tanzantan, nou pas en pti git letan pou nou mazin en pe, pou nou obzerv serten keksoz, nou ava vwar ki annefe i annan dan tou sa labote, i annan bann *item* ki ankor pli *beau e ki stand out*.

Mon ava donn ou 2 legzanp Mr Speaker. Tou le bomaten ler mon al travay, mon pas lo sa morso semen ant *roundabout* Roche Caiman avek

*roundabout* Eden. E koman ou antre lo sa bout semen i annan kote gos, o bor *Palais des Sport*, en gran pye kalisdipap. Son non pa kalisdipap, be i dan fanmir kalisdipap, en gran, en tre gran pye ki eksepsyonneman zoli. I tousel, i gran e i en zean e i vremen zoli.

E mon demann mon lekor konbyen dimoun ki remark sa, akoz? Akoz otour li i annan lezot, i annan lezot pye dibwa. I enn bann keksoz ki bokou pei i fer ki nou, ki nou, nou pa fer, se tir bann keksoz otour en keksoz ki zoli, pou donn sa ki zoli son lespas ek son lanpler. E lo sa morso semen set en keksoz ki vre sanblab leman nou pa'n fer.

E en pti pe pli devan i annan en lot pye parey, me li i mwen zoli e i annan en gran brans ki vir lo semen. E tou le bomaten mon dir ek mon lekor, mon dir "en zour dan en labriz sa brans pou desire pou tonbe. Fotespere i tonm ler, dan milye lannwit e non pa ler en loto pe pase o bor."

E ankor enn fwa set en keksoz ki nou pa obzerve. Mwan mon ti an kontan ki ti ava annan en seksyon dan nou popilasyon, ki pe fer letour toultan e ki pe valoriz sa bann keksoz ki pe dir, "sa brans la, i ganny drwa tonbe. Alor annou avan ki i tonbe, annou koup li.

Oubyen sa pye dibwa i zoli annou donn li plis labote. Annou netway otour li. "

Onorab William ler i al kot li tou le swar e i desann Souvenir, zis o bor sa pti *view point* ki annan, ki mon ti dir li lotrozour. I en *view point* ki ler ou debout lo la ou pa vwar *view*. Akoz i annan pye dibwa ki bar ou. La mon war zot in koup en pe e kekfwa ou war en pti pe lanmer. Me o bor li la i annan en pye albizya. En vye pye albizya ki vremen, vremen, vremen *magnifique*.

Me malerezman in toufe dan kannel, in toufe dan bwa zonn, in toufe avek en kantite lezot keksoz anba li. E ou pa vwar son labote. Nou en pei touristik. Nou en pei ki valoriz labote. Nou en pei ki rekonnnet labote. Nou pa fer ase pou valoriz sa bann keksoz. E mon krwar sa Mosyon ozordi i donn nou *cause for reflection*. E nou bezwen, mon krwar reflesir.

Mon kontan, mon kontan sa mo dan sa Mosyon apremidi ki koz lo mentenans. E mon a vin en pti kou lo la taler. Me pou le moman Mr Speaker, permet mwan pou revwar en pti pe bann proze rebwazman dan lepase. Si nou regard en pti pe an aryer.

E nou regard en pe bann dibwa ki nou annan isi. Nou ava



konpran egzakteman sa ki'n arive dan nou listwar. A en serten moman kot nou pa ti enport dibwa pou fer konstriksyon. Ozordi nou enport *pine*, alor nou'n aret vwar nou bann dibwa. Nou'n aret valoriz nou bann dibwa.

Annefe i pli bonmarse pou enport *pine* sorti dan en pei. Met li lo en bato anmenn li isi, aköz in fini ganny koupe. In fini ganny sye. In fini ganny son longer. E i fasil pou travay avek. Dan lepase pa ti leka. E se pou sa rezon ki bann Gouvernman kolonyal ti'n fer plizyer tantativ pou anmenn dibwa, ki ti a kapab pous vit e ki ti a kapab ganny servi konman materyo konstriksyon.

Albizya i enn. I pous tre vit. I en dibwa leze. Fasil pou travay. Fasil pou fer lakaz avek. Plafon, klwazon, eksetera, me malerezman ler nou'n aret servi albizya ki nou'n vwar? Albizya in vin en lespes anvai sant partou.

E ozordi nou bezwen *re-embark* albizya, aköz i napa valer. I pa ni vo lapenn pou koup en pye dibwa pou sye. Aköz napa personn ki pou aste son dibwa. Alor nou pe fer *re-embark* e les li mor.

Dezyenm tantativ ti santol. E ler nou mont Sans Souci, nou vwar bann fore

santol ki *forestry Division* Lagrikiltir ti plante. E nou vwar li dan bann *rows*. Ankor enn fwa napa demann pou dibwa santol dan konstriksyon. Aköz nou servi *pine*.... Bann lezot dibwa ki nou, nou prefere al koup fore kot nou zanmi. Al koup *hard wood* Lendonezi, Malezi, *Congo*, eksetera, e olye servi sa ki pou nou.

E trwazyenm tantativ sete *mahogany*. Parey nou konnen la resaman dan mwan Septanm, ler *mahogany* i konmans sanz kouler son fey, nou vwar partou. E mwan mon distrik, louvers an larivyer Les Mamelles, i annan gran lafore *mahogany* ki'n ganny plante par *Forestry* Divizyon Lafore Gouvernman.

Ankor dan en tantativ rebwazman. Me sa fwa si pou reservi dibwa *mahogany*. Pa pou konstriksyon lakaz, aköz i en dibwa ki ser. Me pou servi li dan pake, dan meb, dan lartizana. Me ankor enn fwa, nou vwar ki nou prefere fer vin bann dibwa deor ki'n fini ganny sye. Ki'n fini ganny galere. Ki fasil pou travay avek.

Alor, tousala pou dir Mr Speaker, ki nou annan en listwar lafore isi Sesel. Nou annan en listwar lafore. Sa ki Mosyon pe demann nou se, annou pa bliye sa listwar.

Annou fer sa listwar reviv. Me dan en fason ki ava itil. Pa vo lapenn nou al plant albizya personn pa pou servi. Pa vo lapenn nou al plant santol personn pa pou servi.

Alor annou rod bann dibwa ki olye fer vin sa bann, sa bann dibwa reserse, dibwa rar. Ki sorti dan bann lezot pei. Nou a kapab servi nou dibwa isi. Nou'n ganny 2 *setback*, par egzanp 1 avek takamaka, lot avek sandragon. Akoz tou lede in ganny afekte avek en viris. E donk se prezan ki takamaka pe rebran. Sandragon li i ankor dan leral. I annan tre pe pye ki ankor reste.

Me i annan en dibwa ki ganny servi bokou dan meb. Dan konstriksyon meb e sa se kalisdipap. E malerezman isi Sesel, personn pa plant kalisdipap. Nou ankor pe *harvest* kalisdipap ki pous natirelman. E mon krwar se la kot nou annan en nouvo louvertir ekonomik ki nou kapab swiv. E sa set en keksoz ki mwan lo nivo nou parti, mon'n koz lo la a plizyer reprim.

Mr Speaker i annan en kantite propriyete isi Sesel. Ki swa pou Leta, ki swa pou prive, ki pa pe ganny servi. I annan en kantite. Ler ou al dan sid, ou vwar i annan bann gran propriyete.

Maravi, Baie Lazare, Anse Poules Bleues, Takamaka. I annan en kantite propriyete ki pa pe ganny servi. Anse Royale menm. Ki pa pe ganny servi. Sirtou dan leo. Akoz i tro lwen pou lagrikiltir. Akse i difisil. E i pa rantab pou fer keksoz avek. Me, me i kapab rantab si nou servi li pou *forestry*.

E mon pa vwar Mr Speaker akoz, swa, e la nou kapab fer, swa *the stick* swa *the carrot*. Oubyen tou le de. Mon pa vwar akoz nou pa kapab ankouraz bann dimoun ki annan sa bann propriyete, pou zot transform sa bann propriyete ki dan labandon e plant kalisdipap. Plant bwa nwar, plant gayak, plant bwadnat. Tou bann pye dibwa ki kapab anmenn en gran valer ekonomik pou nou pei.

*And why not* ki nou, nou kapab eksporte ver bann lezot pei ki anvi transform sa bann dibwa rar, sa bann dibwa ser dan meb. E mon krwar sa set en louvertir ki i annan bokou, bokou merit. E nou pa'n ase mazin lo la. An menm tan, nou ava pe *green* nou pei. Nou ava pe tir bann, bann lespes anvai sant. Ki wi i en gro problem. Nou ava pe tir bann lespes ki pa rantab. E ziska ki nou lendistri kannel i rebran. Kannel i en pes ki pa rantab.

E nou ava pe transform sa bann landrwa dan bann landrwa prodiktif, ki kapab prodwir en keksoz pou benefis nou lendistri lokal, me osi ki kapab akse ver leksportasyon.

Nou annan en problem *economies of scale*. Nou en pti pei. Me nou annan mon sir sifizaman later pou nou re bwaze, pou fer nou pei vin zoli. E an menm tan, pou anmenn en benefis ekonomik pou sa bann propriyeter later. Me pou bann ferme osi ki kapab plant pye dibwa pou rekolte.

Enn bann gran defi avek dibwa se son letan. Mon fek lir dan en liv i annan en proverb Sinwan ki dir, meyer moman pou plant en pye dibwa se 20an pase. Dezyenm meyer moman pou plant en pye dibwa, se ozordi. *Obviously*, ler ou plant en pye dibwa, ou rekolt pou vin lwen dan le fitir.

Me si ou konmanse, en zour ou bann zanfana ava rekolte ler, e si zot, zot kontinyen. Zot, zot ava annan en retonbe ekonomik ki pou signifikan. Alor Mr Speaker i annan sifizaman rezon pou nou rebwaze. Non selman pou fer nou pei vin zoli. Me pou nou tir en benefis ekonomik dan sa ki nou pe fer.

E mwan mon ava koz lo en leksperyans ki mwan mon

annan personnelman. Farquhar ler *Fantala* in vini. In tir tou pye koko. In met tou keksoz ater. E son lanmen apre *Fantala*, i ti parey son landmen apre *Hiroshima*.

Me, me *IDC* pe fer en rebwazman, e sa zil pou rebran son lanpler koko. In ganny mansyonnen. Koko pe ganny plante. Me osi bann lezot lespes, bann lezot lespes rar. Donk i annan en pe partou lo nou teritwar sa bann, sa bann posibilite. Sa bann proze.

Me annou pa, annou pa espere. Annou ekout sa proverb Sinwan. E annou komans ozordi, si nou anvi vwar en retonbe. E pou sa rezon mon ava felisit Onorab William pou anmenn sa Mosyon apremidi.

Mon dernyen mo Mr Speaker i lo mentenans. Parey mon ti dir taler mon kontan sa mo mentenans. Akoz mentenans set en lot sa bann keksoz ki nou Seselwa nou pa fer. Nou pa responsab dan plizyer keksoz. Nou'n koz lo enn de bomaten. Me enn bann keksoz ki nou pa fer se mentenans.

E sa a tou nivo. A tou nivo. Gouvernman i fer en zoli batiman e apard Lasanble Nasyonal ek la mon war *Supreme Court* pe swiv. La mazorite bann lezot landrwa

napa okenn mentenans ki ganny fer. Bann zarden i *overgrown* e bokou dimoun i fer zot lakaz. E bann blok ki ankor reste zot, ni sa nou pa tire. Nou koup en pye dibwa nou les son siko la e zerb ki vin anvair sa siko nou pa retire.

E sa set en gran problem ki nou annan. E mon regard dan sa bann proze lafore ki nou annan isi Sesel. Ler ou mont, ler ou mont Sans Souci, e ki bann travayer lafore i netway dan sa bann plantasyon, i en keksoz ki fantastik pou regarde. Ou vwar sa bann laliny pye dibwa avek son sou-bwa ki'n ganny netwaye. I en keksoz ki vremen zoli.

E se sa ki nou devret pe fer koman en pei. Tou dilon nou semen nou pa devret les kannel avek tou sort kalite dibwa anvai. I byen ki i annan bokou pti kontrakter ki pe fer 1 met oubyen 1 met edmi. Sa i normal. Nou pei pe pran en nouvo laspe. Me dan bann lezot landrwa kot zot pa kapab fer sa, nou vwar la kannal lanmor ki dan mon distrik ankor, zis desann. Bann - Onorab Cosgrow ler i desann tou le bomaten i war.

I pa ti devret koumsa. Ou pa ti devret annan tou sa kannel ki pe bar en *million-dollar view*, si mon kapab dir.

Sa se bann keksoz ki nou devret fer. Se bann mentenans ki nou pa fer ase. E i vre, i vre! I annan mendev. I annan fason pou ankouraz bann dimoun ki pe asize, pe asize lo *ghetto*, pou zot al travay dan sa bann landrwa.

Si nou regard Mr Speaker, bann portre Sesel dan bann lannen 1940, 1950, avan louvertir *airport*, nou ava vwar en lot, en lot Sesel. Kot tou keksoz ti annord. Tou bann pye dibwa ti'n byen *trimmed*. Akoz? Akoz nou ti bezwen sofaz pou kalorifer, pou lendistri kannel e pou lendistri koko.

Alor konman en fey kannel, koman en koko ti tonbe, nou anmase, ou met li dan kalorifer, i ti gard landrwa prop. Depi sa, akoz nou pa bezwen fer li, nou pa fer li. E nou pa kapab tonm dan sa latrap. Nou bezwen konnen ki, si nou anvai nou lendistri touris i kontinyen; si nou anvai mentenir sa standar ki nou annan; si nou anvai rebwaz nou bann landrwa, nou bezwen osi fer son mentenans ki vin avek.

Akoz enn san lot pa pou anmenn nou okenn par. Pye dibwa pou mor si zis ou plante e ou pa netway o bor li. E nou pei pa pou zoli, si ler in fini gran ou pa netway anba li. Alor Mr Speaker, avek sa detrwa mo, mon ti a kontan reasir Onorab

William ki mon apresye son Mosyon. Mon ti a kontan ki nou pran sa bann pwen ki'n ganny met devan apremidi an konsiderasyon. E fer ki nou kapab *achieve* sa ki sa Mosyon pe demann nou. Mersi Mr Speaker.

### **MR DEPUTY SPEAKER**

Mersi Onorab Georges. Onorab Aglae.

### **HON EGBERT AGLAE**

Mersi Mr Speaker. Bonn apremidi tou dimoun ki a lekout. Mr Speaker Mosyon ki devan nou pe demande ki i annan en kanpany, ouswa en relansman kanpany, kot i konsern restorasyon lo bann lafore. Kot in annan bann aktivite imen, ouswa bann serten pti dezans mon kapab dir ki'n arive, dan serten landrwa ki'n koz, ki annan lenterferans dan sa norm ki sipoze egziste dan nou lafore.

Mr Speaker, mou oule konmans koumsa par en ti *tour* osi kot i konsern lepase. Valer ki en pye dibwa ti annan dan devlopman pei li menm, i pa zis Sesel, i dan bann lezot pei osi ki'n war zot bezwen fer serten sakrifis, kot i konsern parti en bout zot leritaz. Sa i zot lafore. Pou ganny serten *dividend* ekonomik e osi *allow* bann lezot

pei ki pe depan lo la pou zot kapab devlope.

Me malgre tousala Mr Speaker, menm si in anmenn serten ekonomik *dividend*, in vin avek konsekans ki ase grav ozordi. E i annan pei ki'n perdi plizyer ektar lafore. E kot osi i annan landrwa ki lagrandisman dezer in permet, fas sa aktivite imen ki in arive dan lepase.

Me ozordi kot nou'n arive Mr Speaker, mon war e mon satisfè ki i annan sa volonte. E menm sa volonte politik par bann diferan pei ki pe met zefor. Kot i konsern *reforestation* e osi asir konservasyon bann ki egziste. E osi konmans sa konversasyon devlopman soutenab.

E mon osi rekonforte par lefe ki bann gran pei pwisans. Bann ki'n devlope fas a destriksyon serten parti lafore en lot pei. Zot pe sey zwenn ansanm pou met finans. E boner mon koleg Onorab Loze in koz lo *carbon financing*. I bann *scheme* ki pe ganny met an plas, pou kapab fer bann travay nesaser, pou kapab rebwaz bann diferan landrwa ki'n ganny afekte.

Dan nou konteks malgre Sesel i ptipti, nou osi a bann moman letan nou ti pe koup pye dibwa, pou kapab fer bann

devlopman li menm. E osi mon mazin byen pye dibwa ti ganny koupe, pou fer nou bann navir ki, mon rapel laplipar ti an dibwa sa bann letan. E lontan en metye parey sarpantye ti vremen popiler, parey fermye. Parey mason en pe. Me sarpantye ti en metye ki ti vremen popiler.

E mwan mon konesans se ki, preski sak lakour ki ou ti pase lontan, ou ti war en ti langar. En ti tabliye, en ti tabli, kot ti annan serten meb ki ti kapab pe ganny fer ouswa repare. E tousala se dibwa ki ti sorti dan nou prop lafore li menm.

Mr Speaker, mon osi rekonforte baze ki, ozordi i annan pei ki'n al pli devan kot i konsern zot fason fer. Kot i konsern zot bann navir, zot bann bato. E menm pe servi sa *Blue Grant* ki egziste. I annan pei *SADC* ki ladan e mon okouran *La Tanzanie* i enn ki ladan. Kot i pe rod *funding* pou li kapab retir tou sa bann bato dibwa ki egziste e met bann bato. Swa an metal, ouswa an *fibreglass*.

Sa avek bi ede ki zot anvi *phase out*, laplipar sa bann bato dibwa. Pou fer ki i a redwir demann pou dibwa, pou reparasyon sa bann menm bato, ki ler i ariv lo serten laz, e

osi anpese ki nouvo navir i ganny konstri, ki pe ede dan eleman destriksyon lafore. E nou bezwen konsyan osi poudir, en pye dibwa pou li matir, i pran plizyer lannen pou li vin lo en nivo rantab. E nou mazin en poudir avek bann destriksyon ki arive, i pou pran plizyer lannen osi pou kapab *etame* en program restorasyon.

Lot eleman Mr Speaker ki mon pou, mon anvi touse mwan, se sa eleman konservasyon *versus* demann pou devlopman e osi devlopman soutenab. Mon krwar nou bezwen ganny sa konsepsyon, sa 2 eleman byen. Pou en pti pei parey Sesel. Kot nou annan *minimum* teren ki nou kapab devlope, sirtou lo lakot.

E bokou nou landrwa ki pe reste avek satirasyon devlopman lakot, ki fer ankor dan 15an 20an, 25an, 30an, nou pe bezwen kontinyen pe grenp montanny, pou nou kapab anmenn bann devlopman neser. E se la ki devlopman soutenab, sa laspe konservasyon osi, sa lespri par deryer i bezwen ganny *sink in* dan en plan nasyonal atraver nou bann Lazans.

Premyerman, Polisi ki pou gid bann devlopman lavenir e osi Lalwa ki pou govern sa 2

eleman enportan. San ki nou bezwen *infringe* lo drwa konstitisyonnèl en dimoun, *the right to enjoy his property* ou swa pou li devlop son propriyete. Mon koz koumsa akoz, mwan mon en distrik ki annan en gran porsyon ki rezerv. Mon kapab dir plis ki 60poursan. Akoz nou pe servi forse apepre 25 poursan nou later dan distrik. E larestan i ganny mete dan rezerv.

E menm si dan rezerv, i annan ki bokou, ki later ki prive laba, e i annan bokou ki pa pe kapab zouir zot propriyete. Akoz i annan bann restriksyon devlopman lo la. E mwan, mon pa kont sa bann restriksyon. Me selman nou pou bezwen pran serten desizyon a lavenir lo lafason.

Akoz letan ou pe anpes en dimoun parey monn dir, i enn son drwa anba *Civil Code* nou'n koz lo la e Konstitisyon i mansyonnen tousala. Pou ki zot osi zot kapab vwar ki mannyer zot kapab zouir sa zot annan, san ki nou pe bezwen detri sa ki deza egziste.

I enportan pou nou kapab konmans bann konversasyon lo la. E pou nou, avek en popilasyon ki pou kontinyen grandi, i pou annan demann pou zot kapab ganny plis lespas pou devlope.

E Mr Speaker, mon rapel parol, mon pou sit son non, *Dr Shah*, ki ti dir mwan en zour, i pa ti zanmen mazinen si dan konservasyon i ti kapab annan kantite larzan reveni ki kapab anmennen pou pei. I koz sa i dir mwan sa akoz - zil Kouzen sa letan ki ozordi i anba zot responsabilite anba *Nature Seychelles*, ki sa bann letan pa ti pe ganny okipe. E ler zot lafanmir, zot, zot menm zot, zot ti aste sa zil. Zot ti mont ek en program pou kapab fer li vin parey en ti sant, ki ava annan biodiversite e osi son bann eleman *wildlife* dan en sans.

E apre bokou lannen. In pran bokou lannen pou zot kapab ariv lo sa nivo ki zot ete ozordi. E ozordi i *happy* dan en sans ki i kapab zouir en travay e ki pe anmenn serten reveni benefis pou pei, dan plas ki ti pou annan zis, dan en fason parey nou bann zil lontan bokou ti annan. Koko, bann keksoz koumsa. Me avek diversifikasyon, konservasyon li menm, in anmenn bokou fri e pe anmenn bokou benefis pou pei.

Lot pwen ki mon ti a kontan touse Mr Speaker, se in annan bann program dan lepase ki'n ganny mete pou kapab replant bann plan kot in neser. E enn bann partikilye

*projet* ki resaman Desanm 2020, ti fer lo Praslin. Kot target ti pe fer pou plant environ 250mil pye dibwa. Pou kapab rebwaz parti sa zil. Ki ti pe ganny afekte avek lerozyon e osi fas a menas dife ki sa zil in sibir dan lepase.

E sa linisyativ ti konmanse par TRASS. En lorganizasyon lokal menm se, *Terrestrial Restoration Society of Seychelles*. Se zot ki ti konmans sa an Desanm 2022. E tou resaman mon ti ganny sans al Praslin osi, Mon'n vwar poudir, depi ler ou pe vini lo bato, sa bann rouzer ki ou ti pe war lo latet montanny Praslin ou pa pe tro war ozordi. I vedir ki i annan en fri ki'n aporte. Travay ki'n ganny fer, in anmenn benefis.

En lot proze ki ti demare, sa ti an 2015 dan mon distrik Port Glaud, sa bann letan mon ti ankor en DA, kot ler dife ti pran en parti Port Launay e osi en parti *lower* Mont Blanc. E sirtou sa sit Port Launay kot ti annan en bon pe plant andemik - mon mazin Mr Pat Mathiot ki ti monte pou al fer en pti *survey* dan en sans. Kantite lefe sa dife in poze lo biodiversite.

E laba nou ti war ki ti annan bokou ban bwa andemik. Bwa koulev, lantannyen fey, bwa dible,

kolofant, bwa zoli ker, e bann lezot bwa ki vreman enportan e andemik. E ladan, program ti ganny mete avek serten nou bann NGOs. Ti annan SNPA, ti annan *Ephelia*, ti annan *Wildlife Club*, Lotorite distrik li menm. Kot nou ti bezwen konmans en program rebwazman pou kapab refer sa landrwa. E la ozordi di-si mon kapab dir, 7an *almost* - 7an apre si ou get sa landrwa kot i ete, mannyer i ete. In fini ganny rebwaze.

So alor, bann program i nesese pou kontinyen pou nou kapab - sirtou avek zenn zenerasyon. E bokou i vin avek ledikasyon. E mon konforte ki dan bokou lekol ozordi, nou annan bann klib lanvironnman, ki ganny met an mars avek Minister Ledikasyon, pou ede sansibiliz sa program.

E enn bann fe se, ki mannyer nou bezwen petet aprofondi en ti gin pli profon, pou kapab anmenn nou bann zenn osi pou kontan lanatir e vwar valer ki sa lekosistenm ki nou viv ladan, i en *cycle* ki zonn i bezwen plant, pou li kapab osi kontinyen respire.

So Mr Speaker, devlopman i enportan ki i arive, me selman nou bezwen rod lapratik ki pou kapab kree sa balans pou ekosistenm. E nou



pa zis pe koz plant la. Akoz en labita ki'n ganny kree, ouswa ki'n ganny *maintained*, i osi kree labita pou zannimo viv. Bann diferan lespes kapab sirviv. E letan nou vin dan en fason agresiv, nou pe zis brize, kase dan en sans. I kree serten lenterferans dan *cycle* lanatir li menm.

E se la ki i enportan letan nou pe fer bann, sirtou mon pou dir Gouvernman la, nou pe fer bann *housing estate* dan diferan landrwa. I annan serten landrwa nouvo lokasyon ki pe ganny  *earmark* pou fer.

E la nou bezwen konnen ki mannyer nou fer li. Akoz lo plan ki ganny soumet avek *Planning*, i kapte tou sa bann pye dibwa ki annan lo plan. E ladan ou bezwen al kot Lanvironnman pou dir lekel ki ou pe koupe. Si ou pa pe koup isi, ouswa i dir ou sa ou pa kapab koupe. Be nou bezwen annan en plan osi, ki ler nou'n koupe. Si nou'n koup 5, 6, nou rod fason pou nou plant ankor 15, 20. Se sa mon krwar lesansyel ki nou kapab re-kree sa balans dan sa *cycle* la.

E osi dan kominote, i enportan pou nou kapab kontiny kanpany plant pye dibwa. Sirtou bann pye dibwa ki en pe andemik. Ouswa bann pye dibwa ki aport *la nourriture*.

Akoz nou pa konnen ki arive demen. Nou bezwen bann pye dibwa. Bann pye fri li menm. E nou koz bokou ozordi. I anna resers ki pe ganny fer *actually* la pou konnen kantite friyapen ki egziste. I kler ki bokou sa bann pye fri ozordi in ganny koupe.

So, i annan bann nesesite pou nou get bann lokasyon, landrwa, vwar, parey loter Mosyon in demann pou ganny en *survey* ganny fer. Vwar kote ki nou kapab, pa zis dan lafore anler laba.

Me osi annou get dan nou kominote kote ki nou kapab anmenn en pti pe sa eleman rebwazman, replante, me bann pye ki mon krwar i annan rantabilite ladan. So avek sa Mr Speaker, mon pou aport mon kontribisyon lo Mosyon. Mersi.

### **MR DEPUTY SPEAKER**

Bon ti napa lezot Manm ki'n endik mwan ki zot oule entervenir lo sa Mosyon. We, donk mon pou prezan envit loter Mosyon pou li fer son *summing-up*. Mersi.

### **HON WAVEN WILLIAM**

Mersi Mr Speaker. An premye lye mon ti a kontan remerisi tou bann Manm ki'n kontribye anver met bann kontribisyon pozitiv. Avans bann sizesyon lo

kwa ki kapab ganny fer. Pas en pe lo bann listwar avek bann realite ki nou lanvironnman in pas atraver, i pe fer fas avek.

Mr Speaker, i donn mwan bokou lespwar. Lespwar ki nou lo bon semen. E ki nou bezwen kontinyen sa travay, pou nou kontinyen prezerv e konserv nou lanvironnman. Prenon kont, Mr Speaker, sa menas kont sanzman klima.

Mr Speaker, letan mon ti pe partisip dan sa 45em Lasanble Zeneral IPU ki ti fer *Rwanda*. I ti merveye ou vwar i fason *Rwanda* en pei ki zot apel li Pei Mil Kolin. Son devlopman kan mannyer i *blend* avek bann rebwazman. Ki'n fer pou kapab fer sir ki zot minimiz potansyel bann lerozyon ki kapab arive. Ti vremen merveye Mr Speaker pou vwar sa travay ki'n ganny fer.

Mr Speaker, e pou kapab fer en bon travay parey mon premye rekomandasyon, se ki, wi nou annan en ta lenformasyon. Me mon santi pou dir sa bann lenformasyon i en pe eparpiye. E i annan sa nesesite si ou anvi en plandaksyon vremen vize e pli *focus* avek aktyalite ozordi, i annan sa nesesite an premye lye, pou fer en *survey* pou kapab met ou azour vremen

avek presizeman realite ki nou lanvironnman i ladan.

Mr Speaker, i osi enportan ki nou regard osi lo kote teknolozi. Ozordi nou'n devlope. Lemonn in devlope. E progre lavansman dan teknolozi i fer ki, keksoz i kapab ganny fer dan en pti pe, dan en fason pli vit. E pli presi an servan teknolozi modern. E i enportan ki nou bann antreprenner, bann ki anvi al dan sa direksyon. Zot bezwen pe viz ver bann teknolozi modern.

Mr Speaker, resaman sa lannen, Lasanble Nasyonal in adopte en parti lanmar, par deryer batiman e lenformasyon ki nou annan, se ki Lasanble Nasyonal nou anvi replant bann plan mangliye. Ki mon krwar i normal. Akoz ki Lasanble konman Setyenm Lasanble pa lans sa kanpany rebwazman, par annan en aktivite anyel pou ankouraz? Akoz nou bezwen *lead by example*.

Mr Speaker, lot benefis ki nou bezwen pran la aktyelman, e mon konnen poudir nou annan en personnalite enportan dan pei la. Prens *Monaco*. Ki i osi vremen mon kapab dir, atire avek sa laspe lanvironnman. Nou annan prezans nou bann Anbasader e bann osi Konsil Onorer.

E mon konnen ki demen, tou distrik pe ganny prezans sa bann Konsil Onorer. E mon krwar sa size lanvironnman pou monte vizavi bann proze. E nou bezwen kapab pran lavantaz sa bann tel prezans bann dimoun isi dan nou pei.

Mr Speaker, mon osi note osi ki *IDC* in fer bokou progres. Mon'n deza travay *IDC*. Mon konnen ki mannyer ti ete oparavan. E mon konnen ki bann aktivite ki ti pe ganny fer e ozordi mon vwar poudir in annan en evolisyon, dan lafason ki zot pe zer bann zil an term, donn valer azoute serten bann prodwi. Tel parey koko, delwil koko, e osi pye sed Mr Speaker. E dibwa koko Mr Speaker. E ou pou reste etonnen sa dibwa letan in ganny verni, ki mannyer i zoli letan meb i ganny fer avek.

Mr Speaker, me nou bezwen, nou bezwen si nou vwar pou dir i annan valer ekonomik ladan, i annan sa lenportans pou nou anmenn sa kontinite, dan fer sir ki bann plantasyon i ganny bann mentenans ki nou pa perdi sa bann valer.

Mr Speaker, lot keksoz mon mazine se ki ler mon regard otour nou pei, tou le-z-an nou fer en *Clean Up The World*. Mon vwar poudir nou

sitwayen i kontinyelman zet salte an bonnavini. Ki i anmenn en kou lo Gouvernman, ki en kanpanya tou le-z-an, ou a krwar plis salte i ganny anmase.

Be si nou kapab agrandi sa kanpanya. Sa en legzanp mon pe donner. Kot nou kapab netway osi bann fore. E mon kontan ki Leader Zafer Gouvernman in koz lo lafore Sans Souci, wi. Mon rapel letan mon ti ankor zanfan, mon ti reste Bel Air. I ti en plezir pou pas laba Sans Souci pou regarde ki fason sa bann pye santol i anliny avek kanmarad. I prop. Ou kapab vwar vreman lwen.

E osi la misère an desandan kot *STA*, ki mannyer, bann plan *mahogany* in ganny plante. Me ozordi parey nou konnen, nou vwar pou dir i pe ganny anvair. E sa mentenans pa pe ganny fer. I annan sa nesesite pou nou revwar sa plan dan lavenir.

Lot pwen ki mon anvair azoute, wi, sa laspe finansman i enportan. Me pou ou ganny finansman, avek okenn lorganizasyon enternasyonal, ou pou bezwen prezant en proze ki kredib. E ou pou bezwen annan bann eksper ki kapab travay lo sa bann proze pou fer sir sa proze i ganny met devan.

I pa ganny rezete me i ganny aksepte, baze lo nesesite, baze lo sa laspe soutenabilite. Ki ozordi i an vog dan bann konversasyon globalman.

Mr Speaker mon pa pou dir bokou parey mon'n dir se ki Bondye in beni nou, avek en lanvironnman. E nou zom ek fanm nou rol se, enn mentenir li e fer sir ki nou gard li sen pou zenerasyon ki vini.

E dernyerman mon ti a kontan ki lanfaz osi i ganny mete dan bann lekol ki bann zanfan - se bann zanfan Mr Speaker. Bann zanfan zot vremen retenir keksoz e fer bann keksoz pli byen letan zot grandi. Akoz, letan ou entrodwi sa bann kalite fason fer avek zot, zot toultan retenir li. E mon kontan ki bokou bann lekol ozordi, zot annan bann klib lanvironnman. E kot mon dan Grand Anse Mahe, La Misère i annan, Grand Anse Mahe i annan.

E nou osi lo kote distrik nou'n lans nou en Lasosyasyon Lanvironnman. Me selman i domaz ki letan nou, nou pe restor bann plan lo lans Grand Anse, i annan bann dimoun ki vini an deor ki, par egzanp Mr Speaker, zot vin tir bann zenn palmis avek bann pye koko ki lo rido. E sa ki fer se ki pye koko i mor e avek vandswet, tou

dimoun i konnen i annan en degradasyon ki arive. E nou osi vremen konsernen avek sa sityasyon.

Mr Speaker pou zis pou montre ou, nou'n met osi bann zoli lansenny, ou dekouraz a dimoun pou pa zet salte. Nou'n met *bin* anplis o bor lans. Be *still* ou vwar ki dimoun pa respekte. Me zot zet salte an bonnavini. E tou letan ou bezwen retournen, pas deryer.

Konmdir Onorab Arissol, pa vin zet salte Grand Anse. Bann ki sorti dan zot distrik. Zet salte en lot landrwa ouswa met li dan *bin*. *Bin* pa lwen. Mr Speaker avek sa 2 pti mo, mon anvi dir ou mersi. E remersye tou bann Manm pou zot sipor lo sa Mosyon.

### **MR DEPUTY SPEAKER**

Bon, nou ava remersi Onorab pou sa *summing-up*. Aprezan i ava ler pou nou pran en vot lo sa Mosyon prezante par Manm Elekte pou distrik Grand Anse Mahe. Onorab Waven William ki lir koumsa;

An vi kanpanye e demann pou koup plis pye dibwa otour pei, Lasanble i demann Gouvernman pou entrodwir en plan rebwazman e mentenans nou fore.

Mon ti ava demann tou bann Manm ki an faver, endike

silvouple? Mersi. Okenn Manm ki kont? Mersi.

Donk Mosyon rezilta pou vot i koumsa. 22 Manm in vot an faver. Okenn Manm pa'n vot kont. E okenn Manm pa'n abstenir. Donk Mosyon in ganny aprouve par linanimite.

Sa i ti nou dernyen *item* lo nou *Order Paper* pou ozordi, donk Lasanble pou adjourn la. Mon konnen poudir tou Manm Lasanble in ganny envite pou resepsyon *State House* tanto. I korek?

Alor nou pou zwenn, Merkredi prosen. Parski Mardi prosen i en konze piblik. Donk nou pou annan zis en sesyon travay semenn prosen, ki pou Merkredi. Alor mersi, e nou ava rezwenn.

**(ADJOURNMENT)**